

欽定唐書

卷一百五十三之一百六十四


土岐文庫

文庫17

W202

24

西



文庫 17
W202
29

唐書卷一百五十三

宋 端 明 殿 學 士 宋 祁 撰

列傳第七十八

段 顛

段秀實字成公本姑臧人曾祖師潛仕為隴州刺史留不歸更為汧陽人秀實六歲母疾病不勺飲至七日病間乃肯食時號孝童及長沈厚能斷慨然有濟世意舉明經其友易之秀實曰摻章擿句不足以立功乃棄去天寶四載從安西節度使馬靈督討護密有功授安西府別將靈督罷又事高仙芝仙芝討大食圖怛邏斯城會虜救至仙芝兵卻士相失秀實夜聞副將李嗣業聲識之因責曰憚敵而奔非勇也免己陷眾非仁也嗣業慙乃與秀實收散卒復成軍還安西請秀實為判官遷隴州大推府果毅後從封常清討大勃律次賀薩勞城與虜戰勝之常清逐北秀實曰賊出羸師餌我也請大索悉得其膠伏虜師燿改綏德府折衝都尉肅宗在靈武詔嗣業以安西兵五千走行在節度使梁宰欲逗留觀變嗣業陰然可秀實責謂曰天子方急臣下乃欲晏然公常自稱大丈夫今誠兒女耳嗣業因請宰遂東師以秀實為副嗣業為節度使而秀實方居父喪表起為義王友充節度判官安慶緒奔鄴嗣業與諸將圍之以輜重

乾隆四年校刊 唐書卷一百五十三列傳

昭和六十年二月一日
上海圖書館藏

010185193743

委河內署秀實兼懷州長史知州事兼留後時師老財乏秀實督餽係道募士市馬以助軍諸軍戰愁思
罔嗣業中流矢卒衆推荔非元禮代將其軍秀實聞之卽遣白孝德書使發卒護喪送河內親與將吏迎
諸境傾私財葬之元禮高其義奏擢試光祿少卿俄而元禮爲麾下所殺將佐多死惟秀實以恩信爲士
卒所服皆羅拜不敢害更推白孝德爲節度使秀實凡佐三府益知名時吐蕃襲京師代宗幸陝勸孝德
卽日鼓行入援孝德徙邠寧署支度營田副使於是邠寧乏食乃請屯奉天仰給畿內時公廩竭縣吏不
知所出皆逃去軍輒散剽孝德不能制秀實曰生我爲軍侯豈至是邪司馬王稷言之遂知奉天行營事
號令嚴壹軍中畏戢兵還孝德薦爲涇州刺史封張掖郡王時郭子儀爲副元帥居蒲子晞以檢校尙書
領行營節度使屯邠州士放縱不法邠人之嗜惡者納賄竄名伍中因肆志吏不得問白晝羣行丐頡於
市有不噉輒擊傷市人椎釜鬲嬰盜盈道至撞害孕婦孝德不敢劾秀實自州以狀白府願計事至則曰
天子以生人付公治公見人被暴害怏然且大亂若何孝德曰願奉教因請曰秀實不忍人無寇暴死
天子邊事公誠以爲都虞候能爲公已亂孝德卽檄署付軍俄而晞士十七人入市取酒刺酒翁壞釀器
秀實列卒取之斷首置梁上植市門外一營大譟盡甲孝德恐召秀實曰奈何秀實曰請辭於軍乃解佩
刀選老嫗一人持馬至晞門下甲者出秀實笑且入曰殺一老卒何甲也吾戴頭來矣甲者愕眙因曉之

曰尙書固負若屬邪副元帥固負若屬邪奈何欲以亂敗郭氏晞出秀實曰副元帥功塞天地當務始終
今尙書恣卒爲暴使亂天子邊欲誰歸罪罪且及副元帥今邠惡子弟以貨竄名軍籍中殺害人藉藉如
是幾日不大亂亂由尙書出人皆曰尙書以副元帥故不戢士然則郭氏功名其與存者有幾晞再拜曰
公幸教晞願奉軍以從卽叱左右皆解甲令曰敢譴者死秀實曰吾未晡食請設具已食曰吾疾作願宿
門下遂臥軍中晞大駭戒候卒擊柝衛之且與俱至孝德所謝不能邠由是安初秀實爲營田官涇大將
焦令譔取人田自占給與農約熟歸其半是歲大旱農告無入令譔曰我知入不知旱也責之急農無以
償往訴秀實秀實署牒免之因使人遜諭令譔怒召農責曰我畏段秀實邪以牒置背上大杖擊二
十輿致廷中秀實泣曰乃我困汝卽自裂裳裹瘡注藥責己馬以代償淮西將尹少榮頗剛鯁入罵令譔
曰汝誠人乎涇州野如赭人饑死而爾必得穀擊無罪者段公仁信大人惟一馬賣而市穀入汝汝取之
不恥凡爲人傲天災犯大人擊無罪者尙不愧奴隸邪令譔聞大愧流汗曰吾終不可以見段公一夕自
恨死馬璘代孝德每所咨逮璘處決不當固爭之不從不止始璘城涇州秀實爲留後以勞加御史中丞
大厯三年遂徙涇州是軍自四鎮北庭赴難征伐數有功旣驟徙相與出怨言別將王童之謀作亂約曰
聞警鼓而縱秀實知之召鼓人陽怒失節戒曰籌盡當報因延數刻盡四鼓而曙明日復有告者曰夜

焚稟積約救火則亂秀實嚴警備夜中果火發令軍中曰敢救者斬童之居外請入不許明日捕之并其黨八人斬以徇曰後徙者族軍遂遷涇州于時食無久儲郭無居人朝廷患之詔璘領鄭穎二州以佐軍命秀實爲留後軍不乏資二州以治璘嘉其績奏爲行軍司馬兼都知兵馬使吐蕃寇邊戰虜倉師不利璘爲虜隔未能還都將引潰兵先入秀實讓曰兵法失將麾下斬公等忘死而欲安其家邪乃悉城中士使銳將統之依東原列奇兵示賊將戰虜望之不敢逼俄而璘得歸久之璘有疾請秀實攝節度副使秀實按甲備變璘卒命愿將馬頌主喪李漢惠主賓客家人位於堂宗族位於廷賓將位於牙內尉吏士卒位於營次非其親不得居喪側朝夕臨三日止有族談離立者皆捕囚之都虞候史廷幹裨將登珍張景華欲謀亂秀實送廷幹京師徙珍景華于外一軍遂安卽拜四鎮北庭行軍涇原鄭穎節度使數年吐蕃不敢犯塞又按格令官使二料取其一非公會不舉樂飲酒室無妓媵無贏財賓佐至議軍政不及私十三年來朝對蓬萊殿代宗問所以安邊者畫地以對件別條陳帝悅慰賚良渥又賜第一區實封百戶還之鎮德宗立加檢校禮部尙書建中初宰相楊炎追元載議欲城原州詔中使問狀秀實言方春不可興土功請須農隙炎謂沮己遂召爲司農卿朱泚反以秀實失兵必恨憤且素有人望使騎往迎秀實與子弟訣而入泚喜曰公來吾事成矣秀實曰將士東征宴賜不豐有司過耳人主何與知公本以忠義聞天

下今變起倉卒當諭衆以禍福掃清宮室迎乘輿公之職也泚默然秀實知不可乃陽與合陰結將軍劉海賓姚令言都虞候何明禮欲圖泚三人者皆秀實素所厚會源休教泚僞迎天子遣將韓旻領銳師三千疾馳奉天秀實以爲宗社之危不容喘乃遣人諭大吏岐靈岳竊取令言印不獲乃倒用司農迎追其兵旻至駱驛得符還秀實謂海賓曰旻之來吾等無遺類我當直搏殺賊不然則死乃約事急爲繼而令明禮應於外翌日泚召秀實計事源休姚令言李忠臣李子平皆在坐秀實戎服與休並語至僭位勃然起執休腕奪其象笏奮而前唾泚面大罵曰狂賊可磔萬段我豈從汝反邪遂擊之泚舉臂捍笏中顛流血巖面匍匐走賊衆未敢動而海賓等無至者秀實大呼曰我不同反胡不殺我遂遇害年六十五海賓明禮靈岳等皆繼爲賊害帝在奉天恨用秀實不極才垂涕悔悵初秀實自涇州被召戒其家曰若過岐朱泚必致贈遺慎毋納至岐泚固致大綾三百家人拒不遂至都秀實怒曰吾終不以汗吾第以置司農治堂之梁間吏後以告泚泚取視其封帕完新秀實嘗以禁兵寡弱不足備非常言於帝曰古者天子曰萬乘諸侯曰千乘大夫曰百乘蓋以大制小以十制一今外有不廷之虜內有梗命之臣而禁兵寡少卒有患難何以待之且猛虎所以百獸畏者爲爪牙也若去之則犬彘馬牛皆能爲敵帝不用及涇卒亂召神策六軍無一人至者世多其謀興元元年詔贈太尉諡曰忠烈賜封戶五百莊第各一區長子三品諸

子五品並正員官帝還都又詔致祭旌其門閭親銘其碑云太和中子伯倫始立朝有詔給鹵簿賜度支綾絹五百以少牢致祭伯倫累官福建觀察使終太僕卿時宰相李石請文宗加贈祿鄧曰自古殺身利社稷未有如秀實者帝惻然爲罷朝可其請孫凝文楚珂知名凝自鄭滑節度使入爲右金吾衛大將軍封西平郡公甘露之變凝當誅裴度奏忠臣後宜免死貶循州司馬文楚咸通末爲雲州防禦使時李國昌鎮振武國昌子克用欲得雲中引兵攻之殺於關雞臺下沙陀之亂自此始珂僖宗時居潁州黃巢圍潁刺史欲以城降珂募少年拒戰衆裹糧請從賊遂潰拜州司馬

劉海賓者彭城人以義俠聞爲涇原兵馬將與秀實友善累戰功兼御史中丞劉文喜據涇州叛海賓與其子光國給以奏請及入對因言姦慝可誅狀既還光國手斬文喜獻闕下拜左驍衛大將軍封五原郡王海賓樂平郡王贈太子太保實封百戶

顏真卿字清臣祕書監師古五世從孫少孤母殷躬加訓導既長博學工辭章事親孝開元中舉進士又擢制科調醴泉尉再遷監察御史使河隴時五原有冤獄久不決天且旱真卿辨獄而兩郡人呼御史雨復使河東劾奏朔方令鄭延祚母死不葬三十年有詔終身不齒聞者聳然遷殿中侍御史時御史吉溫以私怨構中丞宋渾誦賀州真卿曰奈何以一時忿欲危宋璟後乎宰相楊國忠惡之諷中丞蔣冽奏爲

東都採訪判官再轉武部員外郎國忠終欲去之乃出爲平原太守安祿山逆狀牙孽真卿度必反陽託霖雨增陣溶陸料才壯儲詹廩日與賓客泛舟飲酒以紓祿山之疑果以爲書生不虞也祿山反河朔盡陷獨平原城守具備使司兵參軍李平馳奏玄宗始聞亂歎曰河北二十四郡無一忠臣邪及平至帝大喜謂左右曰朕不識真卿何如人所爲乃若此時平原有靜塞兵三千乃益募士得萬人遣錄事參軍李擇交統之以刁萬歲和琳徐浩馬相如高抗朗等爲將分總部伍大饗士城西門慷慨泣下衆感勵饒陽太守盧全誠濟南太守李隨清河長史王懷忠景城司馬李暉鄴郡太守王燾各以衆歸有詔北海太守賀蘭進明率精銳五千濟河爲助賊破東都遣段子光傳李愷盧奕蔣清首狗河化真卿畏衆懼給諸將曰吾素識愷等其首皆非是乃斬子光藏三首它日結芻纒體斂而祭爲位哭之是時從父兄杲卿爲常山太守斬賊將李欽湊等清土門十七郡同日自歸推真卿爲盟主兵二十萬絕燕趙詔卽拜戶部侍郎佐李光弼討賊真卿以李暉自副而用李銑賈載沈震爲判官俄加河北招討採訪使清河太守使郡人李遵來乞師寧曰聞公首奮裾唱大順河朔恃公爲金城清河西鄰也有江淮租布備北軍號天下北庫計其積足以三平原之有士卒可以二平原之衆公因而撫有以爲腹心它城運之如臂之指耳真卿爲出兵六千謂曰吾兵已出子將何以教我寧曰朝家使程千里統衆十萬自太行而東將出嚙口限賊不

得前公若先伐魏郡斬賊守袁知泰以勁兵拔嚙口出官師使討鄴幽陵平原清河合十萬衆徇洛陽分犀銳制其衝公堅壁勿與戰不數十日賊必潰相圖死真卿然之乃檄清河等郡遣大將李擇交副將范冬馥和琳徐浩與清河博平士五千屯堂邑袁知泰遣將白嗣深乙舒蒙等兵二萬拒戰賊敗斬首萬級知泰走汲郡史思明圍饒陽遣游奕兵絕平原救軍真卿懼不敵以書招賀蘭進明以河北招討使讓之進明敗於信都會平盧將劉正臣以漁陽歸真卿欲堅其意遣賈載越海遣軍資十餘萬以子頗爲質頗甫十歲軍中固請留之不從肅宗已卽位靈武真卿數遣使以蠟丸裹書陳事拜工部尙書兼御史大夫復爲河北招討使時軍費困竭李萼勸真卿收景城鹽使諸郡相輸用度遂不乏第五琦方參進明軍後得其法以行軍用饒雄祿山乘虛遣思明尹子奇急攻河北諸郡復陷獨平原博平清河固守然人心危不復振真卿謀於衆曰賊銳甚不可抗若委命辱國非計也不如徑赴行在朝廷若誅敗軍罪吾死不恨至德元載十月棄郡度河間關至鳳翔謁帝詔授憲部尙書遷御史大夫方朝廷草昧不暇給而真卿繩治如平日武部侍郎崔漪諫議大夫李何忌皆被劾斥降廣平王總兵二十萬平長安辭日當闕不敢乘趨出樞極乃乘王府都虞候管崇嗣先王而騎真卿劾之帝還奏慰答曰朕子每出諄諄教戒故不敢失崇嗣老而蹇卿姑容之百官肅然兩京復帝遣左司郎中李選告宗廟祝署嗣皇帝真卿謂禮儀使崔器

曰上皇在蜀可乎器遽奏改之帝以爲違讖又建言春秋新宮災魯成公三日哭今太廟爲賊毀請築壇於野皇帝東向哭然後遣使不從宰相厭其言出爲馮翊太守轉蒲州刺史封丹陽縣子爲御史唐旻誣劾貶饒州刺史乾元二年拜浙西節度使劉展將反真卿豫飭戰備都統李暉以爲生事非短真卿因召爲刑部侍郎展卒舉兵度淮而暉奔江西李輔國遷上皇西宮真卿率百官問起居輔國惡之貶蓬州長史代宗立起爲利州刺史不拜再遷吏部侍郎除荆南節度使未行改尙書右丞帝自陝還真卿請先謁陵廟而卽宮宰相元載以爲迂真卿怒曰用捨在公言者何罪然朝廷事豈堪公再破壞邪載銜之俄以檢校刑部尙書爲朔方行營宣慰使未行留知省事更封魯郡公時載多引私黨畏羣臣論奏乃給帝曰羣臣奏事多挾讒毀請每論事皆先白長官長官以白宰相宰相詳可否以聞真卿上疏曰諸司長官者達官也皆得專達於天子耶官御史陛下腹心耳目之臣也故出使天下事無細大得失皆俾訪察還以聞此古明四目達四聰也今陛下欲自屏耳目使不聰明則天下何望焉詩曰營營青蠅止于棘讒言罔極交亂四國以其能變白爲黑變黑爲白也詩人疾之故曰取彼讒人投畀豺虎豺虎不食投畀有北昔夏之伯明楚之無極漢之江充皆讒人也陛下惡之宜矣胡不回神省察其言虛誣則讒人也宜誅殛之其言不誣則正人也宜獎勵之捨此不爲使衆人謂陛下不能省察而倦聽覽以是爲辭臣竊惜之昔太

宗勤勞庶政其司門式曰無門籍者有急奏令監司與杖家引對不得關礙防擁蔽也置立仗馬二須乘者聽此其平治天下也天寶後李林甫得君羣臣不先咨宰相輒奏事者託以他故中傷之猶不敢明約百司使先關白時聞人哀思藝日宣詔至中書天子動靜必告林甫林甫得以先意奏請帝驚喜若神故權寵日甚道路以目上意不下宣下情不上達此權臣蔽主不遵太宗之法也陵夷至于今天下之蔽皆萃陛下其所從來漸矣自艱難之初百姓尚未凋竭太平之治猶可致而李輔國當權宰相用事遞爲姑息開三司誅反側使餘賊潰將北走党項哀嘯不逞更相驚恐思明危懼相挺而反東都陷沒先帝由是憂勤損壽臣每思之痛貫心骨今天下瘡痍未平干戈日滋陛下豈得不博聞讜言以廣視聽而塞絕忠諫乎陛下在陝時奏事者不限貴賤羣臣以爲太宗之治可致而待且君子難進易退朝廷開不諱之路猶恐不言況懷厭怠令宰相宣進止御史臺作條目不得直進從此人不奏事矣陛下聞見止于數人耳目天下之士方銷口結舌陛下便爲無事可論豈知懼而不敢進卽林甫國忠復起矣臣謂今日之事曠古未有雖林甫國忠猶不敢公爲之陛下不早覺悟漸成孤立後悔無及矣於是中人等騰布中外後攝事太廟言祭器不飭載以爲誹謗貶映州別駕改吉州司馬遷撫湖二州刺史載誅楊綰薦之擢刑部尚書進吏部侍郎以爲禮儀使因奏列聖諡繁請從初議爲定哀慘固排之罷不報時喪亂後典法湮放真

卿雖博識今古屢建議釐正爲權臣沮抑多中格云楊炎當國以直不容換太子少師然猶領使及盧杞益不喜改太子太師并使罷之數遣人問方鎮所便將出之真卿往見杞辭曰先中丞傳首平原面流血吾不敢以衣拭親舌舐之公忍不見容乎杞矍然下拜而銜恨切骨李希烈陷汝州杞乃建遣真卿四方所信若往諭之可不勞師而定詔可公卿皆失色李勉以爲失一元老貽朝廷羞密表固留至河南河南尹鄭叔則以希烈反狀明勸不行答曰君命可避乎既見希烈宣詔希烈養子千餘拔刃爭進諸將皆慢罵將食之真卿色不變希烈以身扞磨其衆退乃就館逼使上疏雪己真卿不從乃詐遣真卿兄子峴與從吏數輩繼請德宗不報真卿每與諸子書但戒嚴奉家廟恤諸孤詔無它語希烈遣李元平說之真卿叱曰爾受國委任不能致命顧吾無兵戮汝尙說我邪希烈大會其黨召真卿使倡優斥侮朝廷真卿怒曰公人臣奈何如是拂衣去希烈大慙時朱滔王武俊田悅李納使者皆在坐謂希烈曰聞太師名德久矣公欲建大號而太師至求宰相孰先太師者真卿叱曰若等聞顏常山舌吾兄也祿山反首舉義師後雖被執詬賊不絕于口吾年且八十官太師吾守吾節死而後已豈受若等脅邪諸賊失色希烈乃拘真卿守以甲士掘方丈坎於廷傳將阬之真卿見希烈曰死生分矣何多爲張伯儀敗希烈令齎旌節首級示真卿真卿慟哭投地會其黨周曾康秀林等謀襲希烈奉真卿爲帥事洩曾死乃拘送真卿蔡州真

卿度必死乃作遺表墓誌祭文指寢室西壁下曰此吾殯所也希烈僭稱帝使問儀式對曰老夫耄矣曾
寧國禮所記諸侯朝覲耳興元後王師復振賊慮變遣將辛景臻安華至其所積薪于廷曰不能屈節當
焚死真卿起赴火景臻等遽止之希烈弟希倩坐朱泚誅希烈因發怒使閹奴等害真卿曰有詔真卿再
拜奴曰宜賜卿死曰老臣無狀罪當死然使人何日長安來奴曰從大梁來罵曰乃逆賊耳何詔云遂縊
殺之年七十六嗣曹王臯聞之泣下三軍皆慟因表其大節淮蔡平子顏頊護喪還帝廢朝五日贈司徒
謚文忠贈布帛粟加等真卿立朝正色剛而有禮非公言直道不萌於心天下不以姓名稱而獨曰魯
公如李正己田神功董秦侯希逸王玄志等皆真卿始招起之後皆有功善正草書筆力迺婉世寶傳之
貞元六年赦書授顏五品正員官開成初又以曾孫弘式爲同州參軍

贊曰唐人柳宗元稱世言段太尉大抵以爲武人一時奮不慮死以取名非也太尉爲人姁姁常抵首拱
手行步言氣卑弱未嘗以色待物人視之儒者也遇不可必達其志決非偶然者宗元不妄許人諒其然
邪非孔子所謂仁者必有勇乎當祿山反哮喘無前魯公獨以烏合嬰其鋒功雖不成其志有足稱者晚
節偃蹇爲姦臣所擠者殞賊手毅然之氣折而不沮可謂忠矣詳觀二子行事當時亦不能盡信於君及
臨大節蹈之無貳色何耶彼忠臣誼士靈以未見信望于人要返諸己得其正而後慊於中而行之也嗚

呼雖千五百歲其英烈言言如嚴霜烈日可畏而仰哉

唐書卷一百五十三考證

段秀實傳孝德薦為涇州刺史封張掖郡王○舊書秀實拜涇州刺史兼御史大夫四鎮北庭行軍涇原
 鄭頴節度使三四年間吐蕃不敢犯塞德宗嗣位就加檢校禮部尚書張掖郡王臣酉按秀實初為涇
 州刺史名位尚卑無封王之理後以節度封王于事理為近當從舊書
 令謹聞大愧流汗曰吾終不可以見段公一夕自恨死○沈炳震曰按舊書大厯八年監倉之戰令謹尚
 為都將此云自恨死疑未的也

唐書卷一百五十三考證

唐書卷一百五十四

宋 端 明 殿 學 士 宋 祁 撰

列傳第七十九

李晟

李晟字良器洮州臨潭人世以武力仕然位不過裨將晟幼孤奉母孝身長六尺年十八往事河西王忠嗣從擊吐蕃悍曾乘城殺傷士甚眾忠嗣怒募射者晟挾一矢殪之三軍謹奮忠嗣撫其背曰萬人敵也鳳翔節度使高昇召署列將擊疊州叛羌於高當川又擊連狂羌於罕山破之累遷左羽林大將軍廣德初擊党項有功授特進試太常卿大厯初李抱玉署晟右軍將吐蕃寇靈州抱玉授以兵五千擊之辭曰以眾則不足以謀則多乃請千人繇大震關趨臨洮屠定秦堡執其帥慕容谷鍾虜乃解靈州去遷開府儀同三司以右金吾衛大將軍為涇原四鎮北庭兵馬使馬璘與吐蕃戰鹽倉敗績晟率游兵拔璘以歸封合川郡王璘內忌晟威略歸之朝為右神策都將德宗始立吐蕃寇劍南方崔寧未還蜀士大震詔晟將神策兵救之踰漏天拔飛越等三城絕大渡斬虜千級虜遁去建中二年魏博田悅反晟為神策先鋒與河東馬燧昭義李抱真合兵攻之斬楊朝光晟乘冰度洛水破悅又戰洹水悅大敗遂進攻魏加檢校

左散騎常侍兼魏府左司馬朱滔王武俊圍康日知于趙州也抱真分兵二千戍邢燧怒欲班師晟曰奉詔東討者吾三帥也邢趙比壤今賊以兵加趙是邢有晝夜憂李公分衆守之不爲過公柰何遽引去燧悟釋然卽造抱真壘與交歡晟建言以兵趨定州與張孝忠合以圍范陽則武俊等當捨趙帝壯之授御史大夫又俾神策三將軍莫仁擢等隸之晟自魏引而北武俊果解去晟留趙三日與孝忠連兵北略恆州圍朱滔將鄭景濟於清苑決水灌之悅武俊引兵戰白樓孝忠兵笮晟引步騎擊破之清苑益急滔武俊大懼悉起兵來救圍晟軍晟內攻景濟而外抗滔等自正月至五月不解會晟疾甚不能興軍中共計引還定州而賊猶不敢逼疾間將復進會帝出奉天有詔召晟卽日治嚴而孝忠以軍介二盜間倚晟爲重數止晟無西晟語衆曰天子播越人臣當百舍一息義武欲止吾吾當以子爲質乃以憑約昏并遣良馬孝忠有親將謁晟晟解玉帶遺之使喻孝忠乃得踰飛狐次代州詔迎拜神策行營節度使進臨渭北壁東渭橋所過樵蘇無犯時劉德信自扈澗敗歸亦次渭南軍器無制德信入謁晟晟責所以敗斬之以數騎入壁勞其軍無敢動晟已并兵則軍益振於是朔方李懷光方軍咸陽不欲晟當一面請與晟合有詔徙屯乃引趨陳濤斜與懷光聯壘晟每與賊戰必錦裘繡帽自表指顧陣前懷光望見惡之戒曰將務持重豈宜自表褻爲賊餌哉晟曰昔在涇原士頗相畏伏欲令見之奪其心爾懷光不悅遷延有異志晟

使間說懷光曰賊據京邑天子暴露于外公宜速進兵雖晟不肖願爲公先驅死且不悔懷光不納每兵至都城下而懷光軍多鹵掠晟軍整戢懷光使分所獲遺之又辭不敢受懷光謀沮撓其軍卽奏言神策兵給賜比方鎮獨厚今桀逆未平軍不可以異且衆以爲言臣無以解惟陛下裁處懷光欲晟自削其軍則士怨易撓帝議諸軍與神策等力且不贍遣翰林學士陸贄臨詔懷光令與晟計所宜者懷光曰粟賜不均軍何以戰贄數顧晟晟曰公元帥軍政得專之晟將一軍唯所命其增費損調敢不聽懷光默然計塞顧刻削粟賜事出己乃止懷光屯咸陽凡八旬帝數促戰以伺賊隙爲言卒不出兵陰通朱泚反迹寢露晟懼爲所并上言當先變制備請假裨佐趙光銑唐良臣張或爲洋利劍三州刺史各勒兵以通蜀漢衿喉未報會吐蕃欲佐誅泚帝議幸咸陽督戰懷光大駭疑帝奪其軍圖反益急晟與李建徽陽惠元皆聯屯適有使者到晟軍晟乃令曰有詔徙屯卽結陣趨東渭橋後數日懷光并建徽惠元兵惠元死之日帝進狩梁州略谷道隘儲供不豫從官乏食帝歎曰早用晟言三蜀之利可坐有也顧渾瑊曰渭橋在賊腹中兵孤絕晟能辦勝邪瑊曰晟秉義挺忠卒然不可奪臣策之必破賊帝乃安自行在遺晟將張少弘口詔進晟尙書左僕射同中書門下平章事晟受命拜且泣曰京師天下本若皆執羈勒誰將復之乃繕甲兵治陣墮以圖收復是時晟提孤軍橫當寇鋒恐二盜合以軋之則卑詞厚幣僞致誠於懷光者時

敷唐單憑乃使張或假京兆少尹多署吏調畿內賦不淹旬芻米告具乃陳兵下令曰國家多難乘輿播遷見危死節自吾之分公等此時不誅元凶取富貴非豪英也渭橋斷賊首尾吾欲與公戮力一心建不世之功可乎士皆雪泣曰惟公命於是駱元光以華州之衆守潼關尚可孤以神策兵保七盤皆受晟節度戴休顏舉奉天韓游瓌悉邠盜軍從晟懷光始懼晟乃移書顯讓之使破賊自贖懷光不聽然其下益攜落畏爲晟襲乃奔河中其將孟涉段威勇以兵數千自拔歸晟皆表以要官帝遣使者問道詔晟兼河中晉絳慈隰節度使又兼京畿渭北鄜坊丹延節度招討使帝欲益西幸晟請駐梁漢以繫天下望又進京畿渭北鄜坊商華兵馬副元帥時京兆司錄參軍李敬仲自賊中來乃署節度府判官以諫議大夫鄭雲逵爲行軍司馬擢張或自副神策軍及晟家皆爲賊質左右有言者晟涕數行下曰陛下安在而欲恤家乎泚使晟吏王無忌婿款壁門三公等家無恙晟怒曰爾乃與賊爲間乎叱斬之時輪纒不屬盛夏士有衣裘者晟能與下同甘苦以忠誼感發士心終無攜怨邏士得姚令言崔宣諜者晟命釋縛飯飲之遣還敕曰爲我謝令言等善爲賊守勿不忠于泚乃引兵叩都門賊不敢出振旅而還明日會諸將圖所向衆對先拔外城然後清宮晟曰外城有里閭之隘若設伏格戰居人囂潰非計也賊重兵精甲聚苑中令直擊之是披其心腹將圖走不暇諸將曰善乃自東渭橋移壁光泰門以薄都城連溝柵而賊將張庭芝

李希倩求戰晟顧曰賊不出是吾憂也今乃冒死來天誘之矣勒吳詵等縱兵盛擊賊攻華師急晟以精騎馳救中軍譟而從大破之乘勝入光泰門再戰賊卻僵尸相藉餘衆走白華賊大哭終夜不息翌日將復戰或請待西師晟曰賊旣敗當乘機撲殄苟俟西軍是容其爲計豈吾利邪乃悉軍軍光泰門使王伾李演將騎史萬頃將步抵苑北晟先夜墮苑垣爲道二百步比兵至賊已伐木塞以拒戰晟叱諸將曰安得縱賊今先斬公矣萬頃懼先登拔柵以入伾督騎繼之賊崩潰執其將段誠諫大兵分道進雷譟震地令言庭芝希倩等殊死鬪晟令唐良臣等步騎奔突賊陣成輒北十餘遇皆不勝感入白華賊伏千騎出官軍背晟以麾下百騎自馳之左右呼曰相公來賊驚潰禽馘略盡泚率殘卒萬人西走田子奇追之餘黨悉降晟引軍屯含元外廷舍右金吾次令軍中曰五日內不得輒通家問違者斬遣京兆尹李齊運部長安萬年令分慰居人秋毫無所擾別將高明曜取賊妓一司馬仙取賊馬一卽斬以徇坊人之遠者宿昔乃知王師之入也明日孟涉屯白華尚可孤屯望仙門駱元光屯章敬寺晟屯安國寺斬賊用事者及臣賊宦暨于市表著節不屈者擇文武攝臺省官以俟乘輿條脅汙于賊者請以不死露布至梁帝感泣羣臣上壽且言晟蕩夷兇慙而市不易廛宗廟不震長安之人不識旗鼓雖三代用師不能加之帝曰天生晟爲社稷萬人豈獨朕哉拜晟司徒兼中書令實封千戶晟遣大將吳詵以兵三千到寶雞清道自請

迎扈不許帝至自梁晟以戎服見三橋帝駐馬勞之晟再拜頓首賀克殄大盜廟朝安復已卽跪陳備爪牙臣不能指日破賊致乘輿再狩乃臣不任職之咎敢請死伏道左帝爲掩涕命給事中齊映起之使就位有詔賜第永崇里涇陽上田延平門之林園女樂一列晟入第京兆供帳教坊鼓吹迎導詔將相送之帝紀其功自文于碑敕皇太子書立于東渭橋以示後世云又令太子錄副以賜始晟屯渭橋也熒惑守歲久乃退府中皆賀曰熒惑退國家之利速用兵者昌晟曰天子暴露人臣當力死勤難安知天道邪至是乃曰前士大夫勸晟出兵非敢拒也且人可用而不可使之知也夫惟五緯盈縮不常晟懼復守歲則我軍不戰自屈矣皆曰非所及也涇州倚邊數戕其帥晟請治不襲命者因以訓耕積粟實塞下羈制西戎帝乃拜晟鳳翔隴右涇原節度使兼行營副元帥徙王西平郡實封千五百戶晟請與李楚琳俱行亦將治殺張鎰罪帝方務安反側不許晟至鳳翔亂將王斌等十餘人以次伏誅時宦者尹元貞持節到同華擅入河中諭慰李懷光晟劾元貞矯使欲洗宥元惡請治罪又言赦懷光有五不可河中抵京師三百里同州制其衝兵多則示未信少則力不足忽驚東偏何以待之一也今赦懷光則必以晉絳慈隰還之渾瑊康日知又且遷徙二也兵力未窮忽宥反逆四夷聞之謂陛下兵屈而自罷耳今回紇拒北吐蕃梗西希烈僭准蔡若棄疆示弱以招窺覷三也懷光旣赦則朔方將士悉復敘勳行賞追還繡纛今府庫空

殫物不酬滿是激其叛四也旣解河中諸道還屯當有賜賚賞典不舉怨言必起五也今河中米斗五百芻粟且罄人餓死墻壁間其大將殺戮幾盡圍之旬時力窮且潰願無養腹心疾爲後憂臣請選精兵五千約十日糧可以破賊帝方以賊委馬燧渾瑊故不許晟至涇而田希鑿逆謁執之并其黨石奇等悉伏誅表右龍武將軍李觀爲涇原節度使晟常曰河隴之陷非吐蕃能取之皆將臣胥貪暴其種落不得耕稼日益東徙自棄之爾且土無繒絮人苦役擾思唐之心豈有旣乎因悉家貲懷輯降附得大酋浪息曩表以王號每虜使至必召息曩於坐衣大錦袍金帶夸異之虜皆指目歆豔吐蕃君臣大懼相與議尙結贊者善計乃曰唐名將特李晟與馬燧渾瑊爾不去之必爲吾患卽遣使委辭因燧請和且求盟因盟謀執瑊以賣燧於是結贊大興兵踰隴岐無所掠陽怒曰召吾來乃不牛酒犒軍徐引去以是間晟晟選兵三千使王佖伏涇陽旁擊其中軍幾獲結贊晟又遣野詩良輔等攻摧沙堡拔之結贊屢乞和會晟朝京師奏言戎狄無信不可許宰相韓滉與晟合因請調軍食以給西師然天子內厭兵疑將臣生事亦會滉卒而張延賞當國故與晟有隙後雖詔講解而陰不與也密言晟不可久持兵更薦劉玄佐李抱真經略西北俾立功以間晟帝惑其言貞元三年帝坐宣政殿引見晟備冊禮進拜太尉中書令罷其兵詔晟乘輅謁太廟視事尙書省賜良馬錦綵千計是歲瑊與吐蕃盟平涼虜劫之瑊挺身免詔罷燧河東皆如結

贊計云通王府長史丁瓊者嘗爲延賞擠抑內怨望乃見晟曰以公功乃奪兵柄夫惟位高者難全蓋早圖之晟曰君安得不祥之言執以聞明年詔爲晟立五廟追賁高祖芝以下祔其主給牲器牀幄禮官相事七日與馬燧見延英帝嘉其勳下詔曰昔我烈祖乘乾坤盪滌掃隋季荒蕪體元御極作人父母則有熊羆之士不二心之臣左右經綸參翊締構昭文德恢武功威不若康不义用端命于上帝付畀四方王業既成太階既平乃圖厥容列于凌煙閣懋昭績效表式儀形以弗忘朝夕永垂乎來裔君臣之義厚莫重焉歲在己巳秋九月我行西宮瞻望崇構見老臣遺像嗚然肅然和敬在色想雲龍之協期感致業之艱難親往思今取類非遠且功與時並才與世生苟蘊其才遇其時尊主庇人何代蔑有在中宗時有如桓彥範等著輔戴之績在玄宗時有如劉幽求等申彌翼之勳在肅宗時有如郭子儀掃除氛祲今顧晟等保靈朕躬咸宣力肆勤光復宗祏訂之前烈夫豈多謝闕而未錄孰旌厥賢況功紀德文祖所爲也在予其曷敢怠有司宜敘先後各圖其象于舊臣之次命皇太子書其文以賜晟晟刻石于門七年以臨洮未復請附萬年詔可九年薨年六十七帝聞流涕詔百官就第進弔比大斂帝手詔誓以存保世嗣申告柩前冊贈太師諡曰忠武及葬又御望春門臨送遺謁者宣詔于柩車百官拜哭于道憲宗元和中詔其家與屬籍以晟配饗德宗廟廷僖宗狩蜀倉部員外郎袁皓采晟功烈爲興元聖功錄徧賜諸將表

勵之晟性疾惡臨下明每治軍必曰某有勞某長于是雖厮養小善必記姓名尤惡下爲朋黨者篤分義隆於故舊鳳州刺史譚元澄嘗有德於晟後貶死晟既貴直其枉詔贈元澄靈州刺史晟撫其二子爲成就之在鳳翔嘗曰魏徵以直言致太宗于堯舜上忠臣也我誠慕焉行軍司馬李叔度曰彼縉紳儒者事公勳德何希是哉晟曰君失辭晟幸得備將相苟容身不言豈可謂有犯無隱邪是非唯上所擇爾叔度慙故晟每進對蹇蹇盡大臣節未嘗露于外治家以嚴子姪非晨昏不輒見所與言未嘗及公事正歲崔氏女歸靈讓曰爾有家而姑在堂婦當治酒食且以待賓客卽卻之不得進達禮敦教類若此與馬燧皆在朝每宴樂恩賜使者相銜于道兩家日出無鐘鼓聲則金吾以聞少選使者至必曰今日何不舉樂旣薨城鹽州復故池以新鹽賜宰相帝思晟乃致鹽靈座其眷遇終始無與比者有十五子其聞者愿憲憲聽云

愿少謙謹晟立功時諸子未官宰相以聞卽日召授太子賓客上柱國故事柱國門列戟遂父子皆賜元和初領夏綬銀宥節度使政簡而嚴部有失馬者愿署牒于道以金購之三日失馬并良馬一繫署下且曰逸而至不告罪當死謹以良馬贖愿歸失馬而縱其良境內肅然徙節武靈軍會伐青鄴數有功以久疾用懃代之召爲刑部尙書俄檢校尙書左僕射節度鳳翔自是邇聲色而政衰矣長慶中徙宣武始張

弘靖給其軍頗厚，至府庫殫匱，賞賚不及。弘靖時而侈費過之，以威刑操下，用婚家寶，緩典帳中兵驕，驚怠，沓牙將李臣則等因眾不忍，夜斬緩首，愿聞變不及。巾與左右數人縋而逸，奪野人乘馳，以免其家。死於兵三子，匿而免。兵既亂，因大掠，推李芥主後務，請諸朝時責愿，不職，貶隋州刺史。入為左金吾衛大將軍，復拜河中晉絳等節度使。雖嘗以荒侈敗，不能自悔，軍政愈弛，結納權近，官貨隨賂，遺輒盡，蒲人怨且亂，會卒贈司徒。

憲與愬於諸子號最仁，孝長，喜儒，以禮法自矜，制調太原府參軍事，醴泉尉于頔鎮襄陽，辟署於府。時吳少誠張淮西，獨憚頔威，疆時謂憲為之助，又辟魏博田弘正幕府，遷衛州刺史，以治行稱。徙絳州，絳有幻人誅民以亂，憲執誅之。河中兵本仰食于絳，而汾可輸河，涇歲租與糴常數十萬石，故敖保山為固民之輸者，十牛不勝一車，憲瀆汾相地，治新倉，當費二百萬，請留垣縣粟糶河南，以錢還糴，絳粟既免負載勞，又權其贏，以完新倉，絳人賴利入為宗正少卿，副金吾大將軍，胡証為送太和公主使，還獻回鶻道里記，遷太府卿。太和初，繇江西觀察使，遷嶺南節度使，憲勳伐家子所歷皆以吏能顯，政績暴著，善治律令，性明恕，詳正大獄，活無罪者數百人，卒官下。

愬字元直，有籌略，善騎射，以蔭補協律郎，遷累，衛尉少卿，早喪，所生為晉國王夫人，所鞠王卒，晟以非嫡

敕諸子服，總愬獨號慟，不忍晟乃許服，纒既練，晟薨，與憲廬墓側，德宗敦遣歸，第一夕復往，帝許之，服除授太子右庶子，出為坊晉二州刺史，以治異等，加金紫光祿大夫，進詹事，憲宗討吳元濟，唐鄧節度使高霞寓既敗，以袁滋代將，復無功，愬求自試，宰相李逢吉亦以愬可用，遂檢校左散騎常侍，為隋唐鄧節度使，愬以其軍初傷夷士氣未完，乃不為斥候，部伍或有言者，愬曰：賊方安，袁公之寬，吾不欲使震而備我，乃令于軍曰：天子知愬能忍恥，故委以撫養，戰非吾事也。眾信而安之，乃斥倡優，未嘗嬉樂，士傷夷病疾，親為營護，蔡人以嘗敗辱霞寓等，又愬名非夙所畏者，易之不為備，愬沈鷲務推誠待士，故能張其卑弱，而用之賊來降，輒聽其便，或父母與孤未葬者，給粟帛，遣還勞之，曰：而亦王人也，無棄親戚，眾願為愬死，故山川險易與賊情偽，一能曉之，居半歲，知士可用，乃請濟師，詔益河中，鄆坊二千騎於是繕鎧厲兵，攻鞍馬山下之拔道口，柵戰，崖呀山以取，鑪冶城入白狗汶港，柵披楚城，襲朗山，再執守將平青陵，城禽饒將丁士良，異其才，不殺，署捉生將，士良謝曰：吳秀琳以數千兵不可破者，陳光洽為之謀也，我能為公取之，乃禽以獻，於是秀琳舉文城柵降，遂以其眾攻吳房，殘外垣始出，攻吏曰：往亡日，法當避，愬曰：被謂吾不來，此可擊也。既引還，賊以精騎尾擊，愬下馬據胡牀，令軍曰：退者斬，眾決死戰，射殺其將，賊乃走，或勸遂取吳房，愬曰：不可，吳房拔則賊力專，不若留之以分其力，初秀琳降，愬單騎抵柵下，與語，親釋縛，署以

爲將秀琳爲愬策曰必破賊非李祐無與成功者祐賊健將也守輿橋柵其戰嘗易官軍愬仍祐護獲于野遣史用誠以壯騎三百伏其旁見羸卒若將燔聚者祐果輕出用誠禽而還諸將素苦祐請殺之愬不聽以爲客待間召祐及李忠義屏人語至夜艾忠義亦賊將所謂李憲者軍中多諫此二人不可近愬待益厚乃募死士三千人爲突將自教之會雨自五月至七月不止軍中以爲不殺祐之罰將吏雜然不解愬力不能獨完祐乃持以泣曰天不欲平賊乎何見奪者衆邪則械而送之朝表言必殺祐無與共誅蔡者詔釋以還愬愬乃令佩刀出入帳下署六院兵馬使六院者隋唐兵也凡三千人皆山南奇材銳士故委祐統之祐捧檄嗚咽諸將乃不敢言由是始定襲蔡之謀矣舊令敢舍諜者族愬刊其令一切撫之故諜者反效以情愬益悉賊虛實時李光顏戰數勝元濟悉銳卒屯洄曲以抗光顏愬知其隙可乘乃遣從事鄭澥見裴度告師期于時元和十一年十月己卯師夜起祐以突將三千爲前鋒李忠義副之愬率中軍三千田進誠以下軍殿出文城柵令曰引而東六十里止襲張柴殲其戍敕士少休益治鞍鎧發刃噉弓會大雨雪天晦凜風偃旗裂膚馬皆縮慄士抱戈凍死于道十一二張柴之東陂澤阻與衆未嘗蹈也皆謂投不測始發吏請所向愬曰入蔡州取吳元濟士失色監軍使者泣曰果落祐計然業從愬人人不敢自爲計愬道分輕兵斷橋以絕洄曲道又以兵絕朗山道行七十里夜半至懸瓠城雪甚城旁皆鵝鶩

池愬令擊之以亂軍聲賊恃吳房朗山戍晏然無知者祐等坎墉先登衆從之殺門者發關留持柝傳夜自如黎明雪止愬入駐元濟外宅蔡吏驚曰城陷矣元濟尚不信曰是洄曲子弟來索褚衣爾及聞號令曰常侍傳語始驚曰何常侍得至此率左右登牙城田進誠兵薄之愬計元濟且望救於董重質乃訪其家慰安之使無怖以書召重質重質以單騎白衣降愬待以禮進誠火南門元濟請罪梯而下檻送京師申光諸屯尚二萬衆皆降愬不戮一人其爲賊執事帳內廚廩廝役悉用其舊使不疑乃屯兵鞠場以俟裴度至愬以囊韃見度將避之愬曰此方廢上下分久矣請因示之度以宰相禮受愬諷蔡人聳觀乃還屯文城柵有詔進檢校尙書左僕射山南東道節度使封涼國公實封戶五百賜一子五品官帝方經略隴右故徙愬節度鳳翔李師道反詔愬代愿帥武靈軍旬日踐父兄兩鎮世以爲榮董重質得罪被斥愬請賜軍中自效許之乃署爲牙將愬與賊戰金鄉破之凡十一遇禽其隊帥五十俘馘萬計淄青平進同中書門下平章事徙昭義節度賜第靈里會田弘正守鎮州乃以愬帥魏博長慶初幽鎮亂殺弘正愬素服以令軍曰魏人富庶而通于天化者田公力也上以其愛人使往治鎮且田公撫魏七年今鎮人不知道而戕害之是無魏也父兄子弟食田公恩者何以報之衆皆哭又以玉帶寶劍遺牛元翼曰此劍吾先人嘗以擯大盜吾又以平蔡姦今鎮人逆天公宜用此夷之也元翼感動謝曰敢有不承而愛其死力乃

下令軍中勒兵以俟會愬疾甚不能軍詔田布代之以太子少保還東都卒年四十九贈太尉諡曰武愬行己儉約其昆弟賴家勳貴飾輿馬矜室廬唯愬所處乃父時故院無所增廣始晟克京師市不改肆愬平蔡亦如之功名之奇近世所未有晚雖忽于取士與鄭注善議者不以掩其賢贊曰愬得李祐不殺付以兵不疑知可以破賊也祐受任不辭決策入死以愬能用其謀也祐之才待愬乃顯故曰平蔡功愬爲多

聽字正思七歲以蔭爲協律郎父吏少之不甚敬聽輒使鞭之晟奇其才長乃辟佐于頓府吐突承瓘討王承宗以聽爲神策行營兵馬使既戰斬賊驍將憲宗壯之詔圖狀以獻承瓘數問聽計卒縛盧從史遷左驍衛將軍出爲蔚州刺史州有銅冶自天寶後廢不治民盜鑄不禁聽乃開五鑪官鑄錢日五萬人無犯者徙安州會觀察使柳公綽方討蔡以聽典軍一一咨之聲振賊中召爲羽林將軍帝討李師道出聽楚州刺史淮西兵緜弱郢人素易之聽日整勒士皆奮卽掩賊不虞趨漣水破沭陽絕龍沮堰遂取海州攻胸山降之懷仁東海兩城望風送款以功兼御史大夫夏綬銀宥節度使又徙靈鹽部有光祿渠久廢廢聽始復屯田以省轉餉卽引渠溉塞下地千頃後賴其饒進檢校工部尚書穆宗初立幽鎮反擇名臣節度太原者代裴度使統兵北討始聽爲羽林時有駿馬帝在東宮使左右諷取之聽自以身宿衛不敢

獻於是帝曰李聽往在軍中不與朕馬是必可任乃授檢校兵部尚書充河東節度使敬宗嗣位改議成軍大和初討李同捷而魏博將丁志沼反擊其帥史憲誠詔聽出援擊殺志沼以功封涼國公拜一子五品官王廷湊之亂詔聽悉兵屯貝州史憲誠懼聽因取道襲之衷甲候諸郊聽敕士藥兵野次魏人乃安憲誠既請朝魏人怨詔聽兼帥魏博聽遷延不卽赴魏遂亂殺憲誠共推大將何進滔乘城拒守聽不得入乃屯館陶又不設備魏人襲之師驚潰死殆半輜械盡棄之聽晝夜馳以免於是御史中丞溫造等劾奏魏州亂憲誠死職繇于聽請論如法天子不罪也罷爲太子少師聽素以賂遺得權幸心故多爲助力未幾拜邠寧節度使邠署相傳不利治垣舍前刺史視其壞莫敢葺聽曰將出鑿凶門何避治署邪亟使完新之卒無異改帥武寧軍有故奴爲徐將不喜聽來乃先殺親吏之使徐者以沮聽聽果懼以疾解授太子少保踰歲節度鳳翔又徙陳許鄭注撫其過詔以太子太保分司東都開成初爲河中晉絳慈隰節度使文宗嘆曰付之兵不疑退處散地不怨惟聽爲可四年以疾求還復拜太子太保卒年六十一贈司徒聽治官苛細急擊斂頗極所欲盛飾車馬服玩或誠之聽曰家聲在人若示衰薄恐不見忠功之效吾欲夸而勸之也好方書擇其驗者題於帷帟墻屋皆滿

聽子琢以家閥擢累義昌平盧鎮海三節度使無顯功不爲士大夫稱道數免復還廣明時沙陀數盜邊

於是琢爲宿將拜檢校尚書右僕射蔚朔等州招討都統行營節度使徙河陽三城坐逗撓下遷刺史卒
王佖者晟之甥武敢閑騎射晟在師佖無不從攻朱泚於光泰門賊方銳佖與李演鏖戰蹀血賊數北諸
軍乘之遂大振以功擢神策將擊吐蕃有功晟視佖與子姓等其給與過之晟兵罷佖亦不見用召爲左
衛上將軍元和中拜朔方靈鹽節度使吐蕃欲作烏蘭橋以過師積材河曲朔方府常遣兵發其木委于
河故莫能成及佖至虜知其寡謀乃厚賂之而亟遂功築月城以守自是虜歲入爲寇朔方乘障不暇人
以咎佖在鎮檢下亡術猜忌多殺人召還爲右衛將軍故事將相除徙皆內出制故號白麻至佖以責罷
遂中書進制久之卒

贊曰晟之屯東渭橋也朱泚盜京師李懷光反咸陽河北三叛相王李納剗河南李希烈訂鄭汲晟無積
賞輸糧提孤軍抗羣賊骨佩安危而氣不少衰者徒以忠誼感人故豪英樂爲之死耳至師入長安而人
不知雖三王之佐無進其能可謂仁義將矣嗚呼功能存社稷不能見信於庸主卒奪其兵哀哉雖然功
蓋天下者惟退禍可以免四子世似其勞是宜有後哉

唐書卷一百五十四

唐書卷一百五十五

宋 端 明 殿 學 士 宋 祁 撰

列傳第八十

馬燧

馬燧字洵美系出右扶風徙爲汝州郟城人父季龍舉孫吳備儻善兵法科仕至鳳州刺史燧姿度魁傑
長六尺二寸與諸兄學輟策歎曰方天下有事丈夫當以功濟四海渠老一儒哉更學兵書戰策沈勇多
算安祿山反使賈循守范陽燧說循曰祿山首亂今雖舉洛陽猶將誅覆公盍斬向潤客牛廷珣傾其本
根使西不得入關退亡所據則坐受禽矣此不世功也循許之不時決會 某卿招循舉兵祿山遣韓朝
陽召循計事因縊殺之燧走西山間道歸平原平原不守復走魏寶應中澤潞節度使李抱玉署爲趙城
尉時回紇還國恃功恣睢所過皆剽傷州縣供餼不稱輒殺人抱玉將饋勞賓介無敢往燧自稱典辦具
乃先賂其酋與約得其旗章爲信犯令者得殺之燧又取死囚給役左右小違令輒戮死虜大駭至出境
無敢暴者抱玉才之因進說曰屬與回紇接且得其情觀僕固懷恩樹黨自重裂河北以授李懷仙張忠
志薛嵩田承嗣等其子場佻勇不義將必窺太原公當備之旣而懷恩與太原將謀舉其城辛雲京覺之

不克當自相衛歸懷恩糧以絕河津抱玉令燧說嵩嵩告絕於懷恩即署燧左武衛兵曹參軍累進至鄆州刺史勸督農力歲一稅人以爲便徙懷州時師旅後歲大旱田蕪不及耕燧務勤教化止橫調將吏有親者必造之厚爲禮瘞暴劣止煩苛是秋稻生于境人賴以濟抱玉守鳳翔表燧隴州刺史西山直吐蕃其上有通道虜常所出入者燧聚石種樹障之設二門爲譙櫓八日而畢虜不能暴從抱玉入朝代宗雅聞其才召見授商州刺史兼水陸轉運使大厯中河陽兵逐六將常休明詔燧檢校左散騎常侍爲三城使汴將李靈耀反帝務息人即授以汴宋節度留後靈耀不拜引魏博田承嗣爲援詔燧與淮西李忠臣討之師次鄭靈耀多張旗幟以犯王師忠臣之兵潰而西燧軍頓熒澤邠人震駭忠臣將遂歸燧止之益治軍忠臣乃還收亡卒復振忠臣行汴南燧行汴北敗賊西梁固靈耀以銳卒八千號餓狼軍燧獨戰破之進至浚儀是時河陽兵寇諸軍田悅帥衆二萬助靈耀永平將杜如江等乘勝距汴一舍而屯忠臣合諸軍戰不利燧爲奇兵擊之悅單騎遁汴州平燧知忠臣暴傲讓其功出舍板橋忠臣入汴果因會擊殺宋州刺史李僧惠燧還河陽秋大雨河溢軍吏請具舟以避燧曰使城中盡魚而獨完其家吾不忍既而水不爲害遷河東節度留後進卽度使太原承鮑防之敗兵力衰軍燧募賻役得數千人悉補騎士教之戰數月成精卒造鎧必短長三制稱士所衣以便進趨爲戰車官以狡狴象列戟于後行以載兵止

則爲陣遇險則制衝冒器用完銳居一年闢廣場羅兵三萬以肆威震北方建中二年朝京師遷檢校兵部尚書封國公還軍初田悅新有魏博恐下未附卽輸款朝廷燧建言悅必反既而悅果圍邢州身攻臨洛築重城絕内外援邢將李洪臨洛將張仞固守詔燧以步騎二萬與昭義李抱真神策兵馬使李晟合軍救之燧出嚀口未過險移書抵悅示之好悅以燧畏己大喜既次邯鄲悅使至燧皆斬之遺兵破其支軍射殺賊將成炫之悅聞使大將楊朝光以兵萬人據雙岡築東西二柵以禦燧燧率軍營二壘間是夜東壘遁燧進營狗明山取棄壘置輜重悅計曰朝光堅柵且萬人雖燧能攻未可以數日下且殺傷必衆則吾已拔臨洛饗士以戰必勝術也卽分恆州兵五千助朝光燧令大將李自良等以騎兵守雙岡戒曰令悅得過者斬燧乃推火車焚朝光柵自晨及晡急擊大破之斬朝光禽其將盧子昌獲首五千執八百人居五日進軍臨洛悅悉軍戰燧自以銳士當之凡百餘返士皆決死悅大敗斬首萬級俘係千餘館穀三十萬斛邢圍亦解以功遷尚書右僕射初將戰燧約衆勝則以家貲賞至是殫私財賜麾下德宗嘉之詔出度支錢五十萬償其財進兼魏博招討使李納李惟岳合兵萬三千人救悅悅裒散兵二萬壁洹水淄青軍其左恆冀軍其右燧進屯鄴請益兵詔河陽李元以兵會次于漳悅遣將王光進以兵守漳之長橋築月壘扼軍路燧於下流以鐵鑊維車數百絕河戰士囊遇水而後度悅知燧食乏深壁不戰燧令

士齋十日糧進營倉口與悅夾洹而軍造二橋逾洹日挑戰悅不出陰伏萬人將以掩燧燧令諸軍夜半食先雞鳴時鳴鼓角而潛師並洹趨魏州令曰聞賊至止爲陣留百騎持火待軍畢發置其旁須悅衆度卽焚橋燧行十餘里悅率李納等兵踰橋乘風縱火譟而前燧乃令士無動命除榛莽廣百步爲場募勇士五千人陣而待比悅至火止氣少衰燧縱兵擊之悅敗走橋橋已焚衆赴水死者不可計斬首二萬級殺賊將孫晉卿安墨啜虜三千人尸相駘藉三十里淄青兵幾殲悅夜走魏州其將拒不納比明追不至悅乃得入抱真凡問曰糧少而深入何也燧曰糧少戰利速兵善於致人今悅與淄青恆三軍爲首尾欲不戰以老我師若分擊左右未可必破悅且來助是腹背支敵也法有攻其必救故趨魏以破之皆曰善悅嬰城自守於是李再春以博州悅兄昂以洛州王光進以長橋皆降悅使符璘李瑤衛還淄青殘兵璘等亦降魏導御溝貫城燧塞其上游魏人恐悅遣許士則侯臧間行告窮於朱滔王武俊會一人者怨望乃連和悅恃燕趙方至卽出兵背城陣燧復與諸軍破之進同中書門下平章事北平郡王魏州大都督長史滔武俊聯兵五萬傅魏會帝遣李懷光以朔方軍萬五千助燧懷光勇于鬪未休士卽與滔等戰不利悅決水灌軍燧兵亦屈退保魏縣滔等瀕河爲壘會涇師亂帝幸奉天燧遣軍太原初李抱真欲殺懷州刺史楊鉢鉢奔燧燧奏其非罪乃免抱真怒及共解邢圍獲軍糧燧自有之以餘給抱真軍抱真益怒

洹之捷軍進薄魏悅以突騎犯燧營李凡救之抱真勒兵不出燧將攻魏取攻具於抱真營并請雜兩軍平其功抱真不聽請獨當一面繇是逗遛帝數遣使講解武俊略趙地抱真分麾下二千人戍邢燧怒謂抱真以兵還守其地我能獨戰死邪將引還李晟和之乃復與抱真善及田昂降燧請以洛州隸抱真而用昭義副使盧玄卿爲刺史兼魏博招討副使李晟兵前獨隸抱真抱真亦請兼隸于燧以示協一然議者咎燧私忍交惡卒不成大功至太原遣軍司馬王權以兵五千走奉天又遣子彙與諸將子壁中涓橋帝已幸梁乃還時天下方騷北邊數有警燧念晉陽王業所基宜固險以示敵乃引晉水架汾而屬之城瀕爲東隍省守陴萬人又醜汾環城樹以固隄詔兼保寧軍節度使帝還京李懷光反河中詔燧爲河東保寧奉誠軍行營副元帥與渾瑊略元光合兵討之時賊黨要廷珍守晉毛朝敷守隰鄭抗守慈燧移檄鐫諭皆以州降因拜燧晉絳慈隰節度使武俊之圍趙也康日知不支將棄趙燧請詔武俊擊朱滔授以深趙以目知爲晉慈隰節度使及三州降燧固讓日知且言因降受節恐後有功者踵以爲利帝嘉許籍府庫兵仗以授日知日知大喜過望燧乃率步騎三萬次于絳略定諸縣降其將馮萬興任象玉遂圍絳拔外郭守將夜棄城去降四千人遣李自良定六縣降其將辛熒收卒五千裨將谷秀遠令掠士女斬以徇與賊戰寶鼎射殺賊將徐伯文斬首萬級獲馬五百于時天下蝗兵艱食物貨翔躡中朝臣多請宥懷

光者帝未決燧以懷光逆計久反覆不可信河中近旬捨之屈威靈無以示天下乃捨軍入朝爲天子自言之且得三十日糧足平河中許之乃與瑊元光韓游瓌之兵合賊將徐廷光守長春宮城燧度長春不下則懷光固守久攻所傷必衆乃挺身至城下見廷光廷光憚燧威拜城上燧顧其心已屈徐曰我自朝廷來可西嚮受命廷光再拜燧曰公等朔方士自祿山以來功高天下奈何棄之爲族滅計若從吾言非止免禍富貴可遂也未對燧曰爾以吾爲欺邪今不遠數步可射我披而示之心廷光感泣一軍皆流涕卽率衆降燧以數騎入其城衆大呼曰吾等更爲王人矣渾瑊亦自以爲不及也歎曰嘗疑馬公能窘田悅今觀其制敵固有過人者吾不逮遠矣進營焦離堡將降餘戍望風遁去燧濟河兵八萬陣城下是日賊將牛名俊斬懷光降衆猶萬六千誅其黨閻晏孟寶張清吳罔等它脅附悉赦之不閱月河中平遷光祿大夫兼侍中賜一子五品官遷太原帝賜宸宸台衡二銘以言君臣相成之美勒石起義堂帝榜其額以寵之貞元二年吐蕃尙結贊破鹽夏二州守之自屯鳴沙及春畜產死糧乏詔燧爲綏銀麟勝招討使與駱元光韓游瓌等會師擊虜燧次石州結贊懼乞盟帝不許乃遣將論頰熱甘辭請于燧且重幣申勸勤明年燧還太原與論頰熱俱朝盛言宜許以盟天子然之燧之朝結贊遽引去帝詔渾瑊與盟平涼虜劫瑊僅得免吐蕃歸燧之兄子弁曰河曲之屯春草未生吾馬飢公若度河我無種矣賴公許和今釋

弁以報帝聞悔怒奪其兵拜司徒兼侍中賜妓樂奉朝請而已與李晟皆圖象凌煙閣後病足不任謁九年十月自力朝廷英詔毋拜時晟已卒帝顧燧曰尙記與太尉晟俱來邪今乃獨見公因悲涕燧亦疾而仆帝親掖之詔左右扶去送至陞燧頓首泣謝固乞骸讓侍中不許卒年七十贈太傅諡曰莊武子彙暢暢少以蔭至鴻臚少卿建中中燧討賊山東暢留京師於是大旱朝廷議括商旅繒錢多亡命入南山爲盜暢客單超俊李雲端等竊議以爲事且危暢是其言遣奴諫燧班師燧怒執奴以聞使兄炫拘暢請罪帝方倚燧貸不問但誅其客勅炫賜暢杖三十然亦罷括商人令燧沒後以貲甲天下暢亦善殖財家益豐晚爲豪幸牟侵又彙妻訟析產貞元末神策中尉楊志廉諷使納田產至順宗時復賜之中官往往逼取暢畏不敢忝以至困窮終少府監贈工部尙書諸子無至廬自託奉誠園亭觀卽其安邑里舊第云故當世視暢以厚畜爲戒有司諡曰縱子繼祖生四歲以門功爲太子舍人五遷至殿中少監燧兄炫字弱翁少以儒學聞隱蘇門山不應辟召至德中李光弼鎮太原始署掌書記常參軍謀光弼器焉刑部郎中田神功帥宣武署節度判官授連潤二州刺史以清白顯燧爲司徒授刑部侍郎辭疾以兵部尙書致仕卒

渾瑊本鐵勒九姓之渾部也世爲阜蘭都督父釋之有才武從朔方軍積戰多遷累開府儀同三司試太

常卿靈朔郡王廣德中與吐蕃戰沒城年十一善騎射隨釋之防秋朔方節度使張齊丘戲曰與乳媪俱來邪是歲立跳盪功後二年從破賀魯部拔石堡城龍駒島其勇常冠軍署折衝果毅節度使安思順授城偏師入葛祿部略特羅斯山破阿布思與諸軍城永清及天安軍遷中郎將祿山反從李光弼定河北射賊驍將李立節貫其左肩死之肅宗卽位城以兵趨行在至天德與虜軍遇敗之從郭子儀復兩京討安慶緒勝之新鄉擢武鋒軍使從僕固懷恩平史朝義大小數十戰功最改太常卿實封二百戶懷恩反城以所部歸子儀會釋之喪起復朔方行營兵馬使從子儀擊吐蕃邠州留屯邠虜復入至奉天城戰漠谷有功遷太子賓客屯奉天周智光反子儀令城以步騎萬人下同州智光平以邠靈隸朔方軍城屯宜祿大厯七年吐蕃盜塞深入城會涇原節度使馬璘討之次黃菩原城引衆据險設槍壘自營遏賊奔突舊將史抗等內輕城顧左右去槍叱騎馳賊既還虜躡而入遂大敗死者十八子儀召諸將曰朔方軍高天下今敗于虜奈何城曰願再戰乃馳朝那與鹽州刺史李國臣趨秦原吐蕃引去城邀擊破之悉奪所掠而還自是歲防長武城盛秋領邠州刺史吐蕃入方渠懷安城擊走之子儀入朝留知邠靈慶兵馬後務回紇侵太原破鮑防軍拜城都知兵馬使自石嶺關而南督諸軍犄角虜引去進兼單于副都護振武軍使子儀爲太尉德宗析所部爲三節度以城兼單于大都護振武東受降城鎮北大都護府綏銀麟勝

州節度副大使未幾崔靈朔方故召爲左金吾衛大將軍建中中李希烈詐爲城書若同亂者帝識其謀用不疑更賜良馬錦幣普王爲荆襄元帥討希烈也以城爲中軍都虞候帝狩奉天城率家人子弟以從授行在都虞候京畿渭北節度使朱泚兵薄城戰譙門晨至日中不解或以芻車至城曳車塞門焚以戰賊乃解泚治攻具矢石四集如雨晝夜不息凡浹日鑿塹圍城城中死者可藉人心危懼或夜縋出掇蔬本供御帝與城相泣泚方據乾陵下瞰城翠翟紅袍左右宦人趨走宴賜拜舞又縱慢辭戲斥天子以爲勝在景刻使騎環馳責大臣不識天命造雲梁廣數十丈施大輪濡氈及革冒之周布水囊爲鄣指城東北構木廬蒙革周置之運薪土其下將塞隍帝召城授以詔書千餘自御史大夫實封五百戶而下募突將死士當賊賜城筆使量功署詔不足則署衣以授因曰朕與公訣矣令馬承倩往有急可奏城俯伏嗚咽帝撫而遣之城前與防城使侯仲莊揣雲梁所道掘大隧積馬矢及薪然之賊乘風推梁以進載數千人王師乘城者皆凍餒甲弊兵鹽城但以忠義感率使當賊人憂不支羣臣號天以禱城中矢自握去被血而戰愈厲雲梁及隧而陷風返悉焚賊皆死舉城歡譟是日詔授城二子官乃第賞將校泚攻城益急會李懷光奔難賊乃去進行在都知兵馬使實封五百戶乘輿進狩山南城以諸軍衛入谷口懷光追騎至後軍擊卻之遷檢校尚書左僕射同中書門下平章事兼靈鹽豐夏定遠西城天德軍節度朔方邠

靈振武道永平軍奉天行營副元帥帝臨軒授鉞用漢拜韓信故事制曰寇賊干紀授爾節鉞以戡多難往欽哉城頓首曰敢不畢力以對揚天子休命乃率諸軍趨京師賊韓旻拒武功城率吐蕃論莽羅兵破之武亭川斬首萬級遂屯奉天以抗西面李晟自東渭橋破賊城與韓游瓌戴休顏以西軍收咸陽進屯延秋門泚平論功以城兼侍中實封戶八百天子還宮授河中絳慈隰節度使河中同陝虢行營副元帥繇樓煩郡王徙咸靈賜大窰里甲第女樂五人將相送歸第與李晟鈞禮俄加朔方行營副元帥與馬燧同討李懷光懷光平檢校司空任一子五品官還屯河中吐蕃相尙結贊陷鹽夏陰闡京師而畏城與李晟馬燧欲以計勝之乃詭辭重禮請燧講好燧苦贊帝乃詔約盟平涼川以城爲會盟使爲結贊所劫副使崔漢衡以下皆陷惟城得免自奉天入朝羸服待罪詔釋之會吐蕃復入盜使城鎮奉天虜罷還河中與元四年虜入涇邠授邠靈慶副元帥進檢校司徒兼中書令十五年卒年六十四羣臣奉慰延英贈太師諡曰忠武喪車至自鎮帝復廢朝城好書通春秋漢書嘗慕司馬遷自敘著行紀一篇其辭一不矜大天性忠謹功高而志益下歲時貢奉必躬闕視每有賜予下拜跪受常若在帝前世方之金日磾故帝終始信待貞元後天子常恐藩侯生事稍桀驁則姑息之惟城有所奏論不盡從可輒私喜曰上不疑我故治補十六年常持軍猜問不能入君子賢之本名日進稍顯改焉五子鎬鑊爲達官

鎬謙喜交士大夫歷鄧唐二州刺史有政譽元和中延州沙陀部苦邊吏貪震擾不安李絳建言宜選才職稱者爲刺史乃任鎬延州會討王承宗而義武節度使任迪簡病不能軍以鎬將家可用乃遷檢校右散騎常侍義武軍節度副使俄代迪簡爲使治兵頗有法然短於計略不持重鎮定二軍間不百里鎬引兵壓鎮境而屯距賊三十里鼓角聲相聞賊始亦畏見鎬無斥候乃潛師入定境焚屠鄉聚鎬軍遂搗亦會中人督戰乃出薄賊大敗而還詔以陳楚代之時師飢凍聞鎬方罷遂亂劫鎬之家至裸辱楚聞馳入城乃定令軍中斂所剽歸鎬以兵衛出之貶韶州刺史後代州刺史韓重華奏收鎬供軍金幣十餘萬乃復貶循州卒贈工部尙書

鑊以陰補諸衛參軍累擢至豐州刺史坐贓七百萬文宗以勳臣子貶袁州司馬還爲袁王傅至太子詹事訓注亂或言鑊匿賈餼爲百騎所捕苦辨乃免然家爲兵剽皆盡文宗憐之授少府監遷殿中宰相以城之裔擬刺史帝曰是豈可以牧民念其父功富之可也宰相言鑊嘗治郡有績從之拜壽州刺史終諸衛大將軍

贊曰唐史臣稱燧沈雄忠力常先計後戰每戰親令于衆無不感槩用命闕必決死未嘗折北名蓋一時然力能得田悅而不取虜不可信而決信之故河北三盜卒不臣平涼大臣奔辱燧之罪也雖然燧賢者

也天下以爲可責故責之不以功掩罪亦不可以罪廢功城親與結贊盟不能料虜詐但以如詔爲恭殆有猛志而無英才乎李晟謂虜不可與盟則燧城固出晟下達甚功名大小信其然乎

唐書卷一百五十五

唐書卷一百五十五考證

渾瑊傳父釋之廣德中與吐蕃戰沒○回鶻傳爲僕固懷恩所殺沈炳震以回鶻傳誤臣酉按回鶻傳云知朔方留後僕固懷恩之走聲爲歸鎮釋之曰是必衆潰將拒之其甥張韶曰彼如悔禍渠可不納釋之信之乃納懷恩懷恩已入使韶殺釋之收其軍其叙次歷歷似不宜誤然舊書傳亦云與吐蕃戰沒于靈武蓋傳聞異詞故新書兩收之

唐書卷一百五十五考證

唐書卷一百五十六

宋 端 明 殿 學 士 宋 祁 撰

列傳第八十一

楊戴陽二李韓杜邢

楊朝晟字叔明夏州朔方人興行間以先鋒功授甘泉府果毅建中初從李懷光討劉文喜涇州斬獲多
 加驃騎大將軍李納寇徐州從唐朝臣往討常冠軍懷光赴難奉天屬朝晟兵千人下咸陽賜實封百五
 十戶懷光反韓游瓌退保邠靈賊黨張昕守邠州大索軍實多募士欲潛歸之朝晟父懷賓為游瓌將夜
 以數十騎斬昕及同謀者游瓌遣懷賓告行在德宗勞問授兼御史中丞朝晟泣見懷光曰父立功於國
 子當誅不可以主兵懷光繫之及諸軍圍河中游瓌營長春宮而懷賓戰甚力懷光平帝原朝晟因為游
 瓌都虞候父子皆開府賓客御史中丞軍中以為榮吐蕃犯邊游瓌自將守靈州而御士寬軍驕及張獻
 甫來代軍遂亂朝晟逃於郊眾脅監軍請以范希朝為節度使希朝時已在京師明日朝晟出給眾曰予
 來賀所請之當也眾稍定朝晟結諸將謀誅首惡者居三日給遣人自邠來曰前請報罷張公已舍邠矣
 反者皆當死吾不願盡誅也第取首惡者眾所謹指斬二百餘人獻甫遂入于軍帝以希朝為節度副使

而朝晟加御史大夫貞元九年城鹽州發卒護境朝晟屯木波堡會獻甫卒有詔代爲邠寧節度使朝晟請城方渠合道木波以遏吐蕃路詔問須兵幾何報曰部兵可辦帝問前日城五原興師七萬今何易邪對曰鹽州之役虜先知之今薄戎而城虜料王師不十萬勢難輕入若發部兵十日至塞下未三旬城畢積芻聚糧留卒守之寇至不可拔萊野翦夷虜且走此萬全計也若發大兵閩月乃至虜亦來來必戰戰則不暇城矣帝納其策師次方渠水乏有青蛇降險下走視其跡水從而流朝晟使築防環之遂爲淳淵士飲仰足圖其事以聞有詔置祠命泉曰應聖已城吐蕃悉衆至度不能害乃引去復城馬嶺而歸開地三百里十七年卒于屯

戴休顏字休顏夏州人家世尚武志膽不常郭子儀引爲大將諡平党項羌以安河曲試太常卿封濟陰郡公進封咸寧郡王兼朔方節度副使城邠州功最遷鹽州刺史朱泚反率兵三千晝夜馳奔問行在德宗嘉之賜實戶二百與渾瑊杜希全韓游瓌等扞禦有勞帝進狩梁洋留守奉天李懷光屯咸陽使人誘之休顏斬其使勒兵自守懷光貽駭自涇陽夜走遷檢校工部尚書奉天行營節度使合渾瑊兵破泚偏師斬首三千級追至中渭橋京師平又與瑊率兵趨岐陽邀泚殘黨加檢校尚書右僕射進戶四百從乘輿至京師賜女樂甲第拜左龍武軍卒贈揚州大都督弟休璿歷開府儀同三司封東陽郡王休晏歷輔

國大將軍封彭城郡公俱以將略稱

陽惠元平州人以趨勇奮事平盧軍從田神功李忠臣浮海入青州詔以兵隸神策爲京西兵馬使鎮奉天德宗初立稍繩諸節度跋扈者於是李正己屯曹州田悅增河上兵河南大擾詔移兵萬二千戍關東帝御望春樓誓師因勞遣諸將酒至神策將士不敢飲帝問故惠元曰初發奉天臣之帥張巨濟與衆約是役也不立功毋飲酒臣不敢食其言既行有饋於道惟惠元軍瓶罍不發帝咨歎不已璽書慰勞俄以兵三千會諸將擊田悅戰御河奪三橋惠元功多以兵屬李懷光及朱泚反自河朔赴難解奉天圍加檢校工部尚書攝貝州刺史詔惠元與神策行營節度使李晟鄜坊節度使李建徽及懷光聯營便橋晟知懷光且叛移屯東渭橋翰林學士陸贄諫帝曰四將接壘晟等兵寡位下爲懷光所易勢不兩完晟既慮變請與惠元東徙則建徽孤立宜因晟行合兩軍皆往以備賊爲解趣裝進道則懷光計無所施帝不從使神策將李昇往伺還奏懷光反明甚是夕奪二軍惠元建徽走奉天懷光遣將冉宗馳騎追及於好畤惠元被髮呼天血流出皆袒裼戰而死二子晟壽匿井中皆及害建徽獨免詔贈惠元尚書左僕射晟殿

中監嵩邠州刺史

少子旻字公素惠元之死被八創墮別井或救得免歷邢州刺史盧從史既縛潞軍潰有驍卒五千從史

乾隆四年校刊

唐書卷一百五十六列傳

二

嘗以子視者奔于旻旻閉城不內衆皆哭曰奴失帥今公有完城又度支錢百萬在府少賜之爲表天子求旌節旻開諭禍福遣之衆感悟遂還軍憲宗嘉之遷易州刺史王師討吳元濟以唐州刺史提兵深入二百里薄申州拔外郭殘其垣以功加御史中丞容州西原蠻反授本州經略招討使擊定之進御史大夫合豈容兩管爲一道卒贈左散騎常侍

李元諒安息人本安氏少爲宦官駱奉先養息冒姓駱名元光美須髯鷲敢有謀以宿衛積勞試太子詹事李懷讓節度鎮國署奏以自副居軍十年士心懾服德宗出奉天賊遣將何望之至華州於是刺史董晉棄城走望之欲聚兵以絕東道元諒自潼關引兵徑薄其城拔之時兵興倉卒裏屬爲鎧剡蒿爲矢募兵數日至萬餘軍氣乃振賊來攻輒卻時尚可孤守藍田元諒屯昭應王權壁中渭橋賊兵不能踰渭南未幾遷鎮國軍節度使封武康郡王先是詔發幽隴兵東討李希烈師方出關泚使劉忠孝召還至華陰華陰尉李夷簡說驛官捕之追及關元諒斬以徇所召兵不得入由是華州獨完俄詔元諒與李晟收京師次滄西元諒先奮鏖賊敗之進屯苑東晟使壞苑垣入泚連戰皆北遂大潰京師平讓功於晟退壁近郊加檢校尚書左僕射實封戶五百賜甲第女樂一子六品官李懷光反與馬燧渾瑊討之其將徐廷光素易元諒數嫚罵爲優胡戲斥侮其祖又使約降曰我降漢將耳及馬燧至降於燧元諒見韓游瓌曰彼

詭吾祖今日斬之子助我乎許諾既而遇諸道卽數其罪叱左右斬之詣燧謝燧大怒將殺元諒游瓌見曰殺一偏裨尙爾卽殺一節度法宜如何燧默然元諒請輸錢百萬勞軍自贖瑊亦爲請燧赦之帝以專殺恐有司劾治前詔勿論貞元三年吐蕃請盟詔以軍從瑊會平涼元諒軍潘原游瓌軍洛口以爲援元諒曰潘原去平涼七十里虜詐不情如有急何以赴請與公連屯瑊以違詔不聽瑊壁盟所二十里元諒密徙營次之既會元諒望雲物曰不祥虜必有變傳令約部伍出陣俄而虜劫盟瑊奔還元諒兵成列出而涇原節度使李觀亦以精兵五千伏險與元諒相表裏虜騎乃解元諒遣車重先而與瑊振旅徐還時以爲有古良將風是會也微元諒觀二人瑊且不免帝嘉歎賜善馬金幣良厚因賜姓及名更節度隴右治良原良原隍堞湮圯旁皆平林薦草虜入寇常牧馬休徒於此元諒培高浚淵身執苦與士卒均糈鬻榛莽闢美田數十里勸士墾藝歲入粟菽數十萬斛什具畢給又築連弩臺遠烽偵爲守備進據勢勝列新壁虜至無所掠戰又輒北由是涇隴以安西戎憚之卒年六十二贈司空諡曰莊威

李觀其先自趙郡徙洛陽故爲洛陽人少沈厚寡言以策干朔方節度使郭子儀子儀遺佐坊州刺史吳仲爲防遏使以親喪解吐蕃內寇代宗幸陝觀隱蓋屋率鄉里子姓千人守黑水虜不敢侵嶺南節度使楊慎微奏爲偏將徐浩李勉代節度常倚以軍政數捕平劇賊遷大將試殿中監召爲右龍武將軍涇師

叛觀適番上卽領兵千餘扈德宗奉天詔盡察諸軍整飭誰邏增募五千人犴旂謹豎士氣益振賜封戶二百授二子八品官從至梁州帝還詔總後軍擢四鎮北廷行軍涇原節度使在屯四年訓部伍儲藏饒衍平涼之盟吐蕃不得志是年觀入朝前一日就道虜至期出精騎徂擊不及去以少府監檢校工部尙書卒贈太子少傅

韓游瓌靈州靈武人始爲郭子儀裨將安祿山反使阿史那從禮將同羅突厥五千騎僞降於朔方出塞門誘河曲九蕃府大胡叛部落凡五十萬子儀使游瓌率辛京杲擊破之九蕃府還附累進邠寧節度留後奉天之狩兵未集游瓌與慶州刺史論惟明以兵三千來赴自乾陵北趨醴泉未至有詔引軍屯便橋次泥泉與泚兵值游瓌欲還奉天監軍翟文秀曰吾壁于此賊敢踰我而西可夾攻取之今入奉天賊亦隨至是引賊迫天子也游瓌曰不然我寡賊衆彼分以亢我餘衆猶能鼓而西也不如先入衛天子且奉天無疆卒安得夾攻吾士乏且寒賊以利誘之衆且潰遂還奉天泚兵躡攻之戰不利泚兵奪門游瓌殊死戰乃解泚大治戰棚雲橋士皆懼游瓌曰賊取佛祠乾木爲攻具可以火之既而賊大譟攻南雉游瓌曰是分吾力也趨北雉遣將郭詢郭廷玉以銳士三百傳滿直出火其棚投薪於中風返棚皆燼賊氣沮故諸將推游瓌赴難功第一帝以衛軍無職局軍置統軍一員以游瓌惟明賈隱林處之李懷光叛誘游

二號第一百二十八

瓌爲變游瓌白發其書帝曰卿可謂忠義矣對曰臣安知忠義但懷光誤臣使震驚乘輿後持臣自解帝嘉其誠從問計欲安出對曰懷光總諸府兵怙以爲亂今邠有張昕靈武有甯景睿河中有呂鳴岳振武有杜從政潼關有李朝臣渭北有竇覲皆守將也陛下以其衆與地授之罷懷光權而尊以元功諸將仰首各聽其帥彼安能以亂帝曰罷懷光權而泚益張若何對曰陛下約士以不次之賞今貢賦方至渾酬之其守自固邠有萬精甲臣得將之可以誅賊四方杖義而起賊不足慮帝美其言會懷光誘復至渾城得書稍嚴卒以警游瓌不知發怒罵罵城帝疑有變卽日幸梁州游瓌使子從帝懷光檄假游瓌邠州刺史欲因張昕殺之游瓌既失兵不知所圖有客劉南金說曰邠有留甲可以立功殆天假也游瓌悟誘舊部兵八百馳入邠說昕曰懷光自蹈禍機公今可取富貴無共污不義也我願以麾下爲公先驅昕不聽游瓌移疾不出陰結其將高固等昕欲殺游瓌戒左右衷甲入昕小史李岌潛白游瓌伏甲先起高固等應之斬昕首以聞時懷光子玟在邠游瓌衛出之曰殺之祇以怒敵至必遽不如捨之玟至涇陽懷光遂走蒲州游瓌屯七盤受李晟節度詔拜邠寧節度使遂會渾城於奉天與城戴休顏分扼京西要險李晟入長安游瓌破泚兵咸陽泚走涇州游瓌使諭涇將楊澄澄拒不納泚遂敗京師平遷檢校尙書左僕射實封戶四百帝至自興元游瓌及城休顏從而李晟尙可孤李元諒奉迎論功與城等皆第一游瓌還

屯邪靈懷光寇同州城元諒敗於乾坑詔游環率兵并力敗賊眾五千于屯遂會城馬燧圍蒲城師次焦籬堡守將尉珪降懷光見勢單感乃縊死貞元二年吐蕃入涇隴邪靈游環追至安化虜營合水北游環策曰賊行無人地必怠可襲取之使將史履澄夜領兵五百入其營斬數百級取馬五千黎明虜以兵尾擊游環羅幟自衛鞞鼓四發虜驚潰去是歲復圍鹽州刺史杜彥光約與之城吐蕃許之又取銀夏麟等州游環請收鹽州以斷戎人走集虜入漢食禾菽方春而病此天亡時也有詔李元諒韓全義率師一萬會游環收鹽州吐蕃請修清水盟以歸侵地馬燧爲之請詔問游環答曰西戎弱則請盟疆則入寇今侵地益深而乞盟詐我也帝不從會盟平涼詔游環以軍屯洛口盟之日游環以勁騎五百待非常令曰卽有變急趨栢泉以分虜勢城被劫馳以免虜見兵出卽解去後吐蕃寇大回原游環方壁長武卽選騎八百迎擊自引兵繼之監軍以爲戎不可易答曰賊攻豐義今游騎先破則彼大眾不敢前豐義全矣戰南原敗之吐蕃夜遁會子欽緒以射生將衛京師與妖人李廣弘謀反謀泄奔邠州中人捕斬以狀示游環游環懼求歸死京師帝不許又執欽緒二息送京師帝亦原之未幾入朝素服聽命有詔復位勞遇如故游環盛言城豐義以遏虜使帝悅趣還軍初游環之朝衆謂且得罪故齋送殊薄旣還舉軍不自安大將范希朝善兵游環畏其逼欲誅之希朝奔鳳翔帝聞召入宿衛游環遣兵築豐義纒二板而潰靈卒數百

大掠游環不能禁詔用張獻甫代之游環畏亂委軍輕出還京師拜右龍武統軍卒諡曰襄廣弘者自言宗室子始爲浮屠妄曰我嘗見岳瀆神當作天子可復冠男子董昌舍廣弘於資敬寺召相工唐郭視之教郭告人曰廣弘且大貴乃誘欽緒神策將魏循李僊越州參軍事劉昉等作亂昉家數具酒大會廣弘所陰相署置又妄曰神戒我十月十日趣舉約欽緒夜擊鼓譟凌霄門焚飛龍殿循等以神策兵迎廣弘事捷大剽三日循僊上變乃禽廣弘及支黨鞫仗內付三司訊實皆殊死廣弘臨刑色自如由是禁人不得入觀祠

杜希全京兆醴泉人以裨將隸郭子儀積功勞至朔方節度使軍令整嚴士畏其威奉天之狩希全與鄜坊節度使李建徽鹽州刺史戴休顏夏州刺史常春引兵赴難次漠谷爲賊邀擊乘高縱石下之疆弩雜發德宗使援之不克還保邠州賊平遷檢校尚書左僕射靈鹽夏節度使封餘姚郡王將卽屯獻醴要八章砭切政病帝嘉納賜君臣箴一篇尋兼夏綏銀節度都統建言鹽州據要會爲塞保鄜自平涼背盟城陷于虜於是靈武勢縣鄜坊單逼爲邊深患請復城鹽州乃詔希全及朔方邪靈銀夏鄜坊振武及神策行營諸節度合選士三萬五千屯鹽州又勅涇原劍南山南軍深入吐蕃牽撓其力使不得犯塞執築凡六千人閱二旬畢由是虜憚不輕入希全居河西久頗越法橫肆帝數容掩其短豐州刺史李景略

名出希全上疑逼已遂排効之帝爲斥以答其意素苦風眩稍劇益忌忍遂誣殺判官李起更下累息卒
贈司空

邢君牙瀛州樂壽人少從幽薊平盧軍以戰功歷果毅折衝郎將安祿山反從侯希逸涉海入青州田神
功爲兗鄆節度使使君牙將兵屯好時防盛秋吐蕃犯京師代宗出陝以扈從功累封河間郡公建中初
李晟從馬燧討田悅以君牙爲都將在武安襄國間凡五戰斬馘功最德宗出奉天晟率君牙倍道赴難
徙屯渭橋軍中便宜惟君牙得豫晟在鳳翔數行邊常以君牙守晟入朝代爲鳳翔觀察使俄領節度檢
校尚書右僕射吐蕃歲犯邊君牙劬耕講戰以爲備戎不得侵又城隴州平戎川號永信城卒官贈司空
初布衣張汾者無紹而干君牙軒然坐客上會吏擿簿書以盜沒宴錢五萬君牙怒其欺汾不謝去曰吾
在京師聞邢君牙一時豪俊今乃與設吏論錢云何君牙慙遽釋吏引爲上客留月餘以五百緡爲謝其
屈己好士類此

唐書卷一百五十六

唐書卷一百五十六考證

韓游瓌傳進邪靈節度留後○舊書作邪靈節度使臣酉按游瓌屯七盤受李晟節度時詔拜邪靈節度
使此處自應是節度留後舊書誤

唐書卷一百五十六考證

唐書卷一百五十七

宋 端 明 殿 學 士 宋 祁 撰

列傳第八十二

陸贄

陸贄字敬輿蘇州嘉興人十八第進士中博學宏辭調鄭尉罷歸壽州刺史張鎰有重名贄往見語三日奇之請為忘年交既行餉錢百萬曰請為母夫人一日費贄不納止受茶一串曰敢不承公之賜以書判拔萃補渭南尉德宗立遣黜陟使庾何等十一人行天下贄說使者請以五術省風俗八計聽吏治三科登雋又四賦經財實六德保罷廢五要簡官事五術曰聽謠誦審其哀樂納市賈觀其好惡訊簿書考其爭訟覽車服等其儉奢省作業察其趣舍八計曰視戶口豐耗以稽撫字視墾田贏縮以稽本末視賦役薄厚以稽廉冒視案籍煩簡以稽聽斷視囚繫盈虛以稽決滯視姦盜有無以稽禁禦視選舉眾寡以稽風化視學校興廢以稽教導三科曰茂異賢良幹蠱四賦曰閭稼以奠稅度產以衰征料丁壯以計庸占商賈以均利六德曰敬老慈幼救疾恤孤賑貧窮任失業五要曰廢兵之冗食蠲法之撓人省官之不急去物之無用罷事之非要時皆違其言遷監察御史帝在東宮已聞其名矣召為翰林學士會馬燧討賊

河北久不決請濟師李希烈寇襄城詔問策安出贊言勞於服遠莫若修近多方以救失莫若改行今幽燕恆魏之勢緩而禍輕汝洛滎汴之勢急而禍重田悅覆敗之餘無復遠略王武俊有勇無謀朱滔多疑少決互相制劫急則合力退則背憎不能有越軼之患此謂緩也希烈果於奔噬忍於傷殘據蔡許富全之地而益以鄧襄虜獲之實東寇則饒道阻北窺則都邑震此謂急也代朔邠靈自昔之精騎上黨盟津今之選師舉而委之山東將多而勢分兵廣而財屈則屯戍失於太繁也李勉文吏也而當汴必爭地哥舒曜之衆烏合也扞襄城方銳之賊本非素習首鼠莫前則守禦失於不足也今若還李瓦河陽以援東都李懷光解襄城之圍專以太原澤潞兵抗山東則梁宋安又言立國之權在審輕重大而未小所以能固故治天下者若身使臂臂使指小大適稱而不悖王畿者四方之本也京邑者王畿之本也其勢當京邑如身王畿如臂而四方如指此天子大權也是以前世轉天下租稅徙郡縣豪傑以實京師太宗列置府兵八百所而關中五百舉天下不敵關中則居重馭輕之意也方世承平久武備微故祿山乘外重之勢一舉而覆兩京然猶諸牧有馬州縣有糧肅宗得以中興乾元後外虞踵發悉師東討故吐蕃乘虛而先帝莫與爲禦是失馭輕之權也既自陝還懲艾前事稍益禁衛故關中有朔方涇原隴右之兵以捍西戎河東有太原之兵以制北虜今朔方太原衆已屯山東而神策六軍悉戍關外將不能盡敵則請濟

師陛下爲之輟邊軍缺環衛竭內廩之馬武庫之兵占將家子以益師賦私畜以增騎又告乏財則爲算室廬貸商人設諸權之科日日以甚萬有一如朱滔李希烈負固邊壘竊發都甸者何以備之夫關中王業根本在焉豪傑之在關中者與籍於營衛不殊車乘之在關中者與列於廐牧不殊財用之在關中者與貯於帑藏不殊一朝有急可取也陛下幸聽臣計使瓦還軍援洛懷光救襄城希烈必走請神策及將家子占而東者追還之凡京師稅間架權酒抽貨貸商點召之令一切停之則端本整擘之術帝不納後涇師急變贊言皆効從狩奉天機務填總遠近調發奏請報下書詔日數百贊初若不經思逮成皆周盡事情衍釋孰復人人可曉旁吏承寫不給它學士筆閣不得下而贊沛然有餘始帝倉卒變故每自尅責贊曰陛下引咎堯舜意也然致寇者乃羣臣罪贊意指盧杞等帝護杞因曰卿不忍歸過朕有是言哉然自古興衰其亦有天命乎今之厄運恐不在人也贊退而上書曰自安史之亂朝廷因循涵養而諸方自擅壤地未嘗會朝陛下將一區宇乃命將興師以討四方一人征行十室資奉居者疲饋轉行者苦鋒鏑去留騷然而閭里不寧矣聚兵日衆供費日博常賦不給乃議感限而加斂焉加斂旣殫乃別配之別配不足於是權算之科設率貸之法興禁防滋章吏不堪命農桑廢于追呼膏血竭于笞捶兆庶嗷然而郡邑不寧矣邊陲之戍以保封疆禁衛之旅以備巡警邦之大防也陛下悉而東征邊備空屈又謬私牧責

將家以出兵籍馬夫私牧者元勳貴戚之門也將家者統帥岳牧之後也其復除征徭舊矣今奪其畜牧事其子孫丐假以給資裝破產以營卒乘元臣貴位孰不解體方且稅侯王之虛算裨販之縉貴不見優近不見異羣情鬱然而關畿不寧矣陛下又謂百度弛廢則持義以掩恩任法以成治斷失於太速察傷於太精斷速則寡恕于人而疑似不容辨也察精則多猜于物而億度未必然也寡恕而下懼禍故反側之釁生多猜而下防嫌故苟且之患作由是叛亂繼產忿讎並興非常之虞惟人主獨不聞凶卒鼓行白晝犯闕重門無結草之禦環衛無誰何之人陛下雖有股肱之臣耳目之佐見危不能竭誠臨難不能効死是則羣臣之罪也陛下方以興衰諉之天命亦過矣書曰天視自我民視天聽自我民聽則天所視聽皆因于人非人事外自有天命也紂之辭曰我生不有命在天此捨人事推天命必不可之理也易曰自天祐之仲尼以謂祐者助也天之所助者順也人之所助者信也履信思乎順是以祐之易論天人祐助之際必先履行而吉凶之報象焉此天命在人蓋昭昭矣人事治而天降亂未之有也人事亂而天降康亦未之有也尚恐有可疑者請以近事信之自比兵興物力耗竭人心驚疑如風濤然洶洶靡定族謀聚議謂必有變則京師之人固非悉通占術曉天命也則致寇之由豈運當然夫治或生亂亂或資治有以無難而亾多難而興治或生亂者恃治而不修也亂或資治者遭亂而能治也無難而失者忽萬幾之重

而忘憂畏也多難而興者涉庶事之艱而知勅慎也今生亂失序之事不可追矣其資治興邦之業在刻勵而謹修之當至危之機得其道則興失則廢其間不容復有所悔也惟勤思而熟計之捨己以從衆違欲以遵道遠儉俟親忠直推至誠去逆詐斯道甚易知甚易行不耗神不劬力第約之於心耳何憂乎亂人何畏乎厄運何患乎不寧哉帝又問贊事切於今者贊勸帝羣臣參日使極言得失若以軍務對者見不以時聽納無倦兼天下之智以爲聰明帝曰朕豈不推誠然顧上封者惟譏斥人短長類非忠直往謂君臣一體故推信不疑至儉人賣爲威福今茲之禍推誠之敝也又諫者不密要須歸曲於朕以自取名朕嗣位見言事多矣大抵雷同道聽加質則窮故頃不詔次對豈曰倦哉贊因是極諫曰昔人有因噎而廢食者又有懼溺而自沈者其爲防患不亦過哉願陛下鑒之毋以小虞而妨大道也臣聞人之所助在信信之所本在誠一不誠心莫之保一不信言莫之行故聖人重焉傳曰誠者物之終始不誠無物物者事也言不誠卽無所事矣匹夫不誠無復有事況王者賴人之誠以自固而可不誠於人乎陛下所謂誠信以致害者臣竊非之孔子曰可與言而不與之言失人不可與言而與之言失言智者不失人亦不失言陛下可審其言而不可不信可慎其所與而不可不誠所謂民者至愚而神夫蚩蚩之倫或昏或鄙此似於愚也然上之得失靡不辨好惡靡不知所祕靡不傳所爲靡不效馭以智則詐示以疑則偷接不以

禮則其徇義輕撫不以情則其效忠薄上行則下從之上施則下報之若影附形若響應聲故曰惟天下至誠爲能盡其性不盡於己而責盡於人不誠於前而望誠於後必給而不信矣今方鎮有不誠於國陛下興師伐之臣有不信於上陛下下令誅之有司奉命而不敢赦者以陛下所有責彼所無也故誠與信不可斯須去已願陛下慎守而力行之恐非所以爲悔也傳曰人誰無過過而能改善莫大焉仲虺歌成湯之德曰改過不吝吉甫美宣王之功曰褒職有闕仲山甫補之夫成湯聖君也仲虺聖輔也以聖輔贊聖君不稱其無過稱其改過周宣中興賢王也吉甫文武賢臣也歌誦其主不美其無闕而美其補闕則聖賢之意貴於改過較然甚明蓋過差者上智下愚所不免惟智者能改而之善愚者恥而非也中古以降其臣尙諛其君亦自聖掩盛德行小道乃有入則造膝出則詭辭姦由此滋善由此沮天子意由此惑爭臣罪由此生媚道行而害斯甚矣太宗有文武仁義之德治致太平之功可謂盛矣然而人到于今以從諛改過爲稱首是知諫而能從過而能改帝王之大烈也陛下謂諫官論事引善自予歸過於上者信非其美然於盛德未有虧焉納而不違傳之適足增美拒而違之又安能禁之勿傳不宜以此梗進言之路也聖人不忽細微不侮讒妄多言無驗不必用質言當理不必違遜於志不必然逆於心不必否異於人不必是同於衆不必非辭拙而效迂者不必愚言甘而利重者不必智者之以實惟善所在則可以

盡天下之心矣夫人情蔽於所信沮於所疑忽於所輕溺於所欲信偏則聽言不盡其實故有過當之言疑甚則雖實不聽其言故有失實之聽輕其人則遺可重之事欲其事則存可棄之人苟縱所私不考其實則是失天下之心矣故常情之所輕聖人之所重不必慕高而好異也陛下又以雷同道說加質則窮臣謂陛下雖窮其辭而未窮其理能服其口而未服其心且下之情莫不願達於上上之情莫不求知於下然而下常苦上之難達上常苦下之難知若是者何九弊不去也所謂九弊者上有六下有二好勝人恥聞過驕辯給術聰明厲威恣彊復上之弊也諂諛顧望畏懦下之弊也好勝而恥過必甘佞辭忌直言則諂諛者進而忠實之語不聞矣驕辯而術明必折人以言虞人以詐則顧望者自便而切摩之益不盡矣厲威而恣彊必不能降情接物引咎在己則畏懦者至而情理之說不申矣人之難知堯舜所病胡可以一酬一詰而謂盡其能哉夫欲治天下而不務得人心則固不治矣務得人心而不勤接下則心固不得矣務接下而不辨君子小人則下固不可接矣務辨君子小人而惡直嗜諛則君子小人固不可辨矣趨和求媚人之甚利存焉犯顏冒禍人之甚害存焉居上者易其言而以美利利之猶懼忠告之不暨況疏隔而猜忌者乎是時賊未平帝欲明年遂改元而術家爭言數鍾百六宜有所變示天下復始帝乃議更益大號贊曰今乘輿播越大慙未去此人情向背天意去就之際陛下宜痛自貶勵不宜益美名以

累謙德帝曰卿言固善然要當小有變革爲朕計之費奏言古之人君德合於天曰皇合於地曰帝合於人曰王父天母地以養人治物得其宜者曰天子皆大名也三代而上所稱象其德不敢有加焉至秦乃兼曰皇帝流及後世昏僻之君始有聖劉天元之號故人主重輕不在稱謂視德何如耳若以時屯當有變革不若引咎降名以祇天戒且矯舊失至明也損虛飾大知也靈與加冗號以受實患哉帝從之會興元赦令方具帝以稟付費使商討其詳費知帝執德不固困則思治泰則易驕欲激之使彊其意卽建言履非常之危者不可以常道安解非常之紛者不可以常令諭陛下窮用兵甲竭取財賦變生京師盜據宮闈今假王者四凶僭帝者二豎其他顧瞻懷貳不可悉數而欲紓多難收羣心惟在赦令而已動人以言所感已淺言又不切人誰肯懷故誠不至者物不感損不極者益不臻夫悔過不得不深引咎不得不盡招延不可不廣潤澤不可不弘使天下聞之廓然一變人人得其所欲安有不服哉其須改革科條已別封上臣聞知過非難改之難言善非難行之難易曰聖人感人心而天下和平夫感者誠發於心而形於事事或未諭故宣之於言言必顧心心必副事三者相合乃可求感惟陛下先斷厥志以施其辭度可行者而宣之不可者措之無苟於言以重取悔帝納之始帝播遷府藏委棄衛兵無褚衣至是天下貢奉稍至乃於行在夾廡署瓊林大盈二庫別藏貢物費諫以爲瓊林大盈於古無傳舊老皆言開元時貴臣

二號第一百二十六

飾巧以求媚建言郡邑賦稅當委有司以制經用其貢獻悉歸天子私有之蕩心侈欲亦終以餌寇今師旅方殷瘡痛呻吟之聲未息遽以珍貢私別庫恐羣下有所觖望請悉出以賜有功今後納貢必歸之有司先給軍賞環怪織麗無得以供是乃散小儲成大儲捐小寶固大寶也帝悟卽撤其署李懷光有異志欲怒其軍使叛卽上言兵粟薄與神策不等難以戰李晟密言其變因請移屯帝遣費見懷光議事費還奏懷光寇奔不追師老不用羣帥欲進輒沮止其謀此必反宜有以制之因勸帝許晟移軍初費與懷光語及晟懷光妄說曰吾無所藉晟費卽美其彊雄使不得讎覆至是請下詔書如其意者且無辭歸短於朝又建遣李建徽陽惠元與晟并屯東渭橋託言晟兵寡不足支賊俾爲掎角懷光雖不欲遣且辭窮無以沮解帝猶豫曰晟移屯懷光固怏怏若又遣建徽等俱東彼且爲辭少須之晟已徙營不聞旬懷光果奪兩節度兵建徽挺身免惠元死之行在震驚遂徙幸梁道有獻瓜果者帝嘉其意欲授以試官費曰爵位天下公器不可輕也帝曰試官虛名且已與宰相議矣卿其無嫌費奏信賞必罰霸王之資也輕爵褻刑衰亂之漸也非功而獲爵則輕非罪而肆刑則喪天寶之季嬖幸傾國爵以情授賞以寵加綱紀始壞矣羯胡乘之遂亂中夏財賦不足以供賜而職官之賞興焉職員不足以容功而散試之號行焉今所病者爵輕也設法貴之猶恐不重若又自棄將何勸焉陛下謂試官爲虛名豈思之未熟邪夫立國惟義與

權誘人惟名與利名近虛於教爲重利近實於德爲輕凡所以裁是非立法制則存乎其義參虛實揣輕重則存乎其權專實利而不濟之以虛則物有匱耗而不給矣專虛名而不副之以實則情有誕謾而不趨矣故錫貨財列粟秩以彰實也差品列異服章以飾虛也居上者達其變相須以爲表裏則爲國之權得矣按甲令有職事官有散官有勳官有爵號其賦事受奉者惟職事一官以敘才能以位勳德所謂施實利而寓虛名也勳散爵號止於服色資蔭以馭崇貴以甄功勞所謂假虛名佐實利者也今員外試官與勳散爵號同然而突銛鋒排禍難者以是酬之可謂重矣今獻瓜一器果一盛則受之彼忘驅命者有以相謂矣曰吾之驅命乃同瓜果草木也若草木然人何勸哉夫田父野人必欲得其歡心厚賜之可也俄以勞選諫議大夫仍爲學士時鳳翔節度使李楚琳殺張鎰得位雖數貢奉議者頗言其挾兩端有所狙伺然帝亦不能容其使至皆不得召欲以渾瑊代之贊諫曰楚琳之罪舊矣今議者乃始紛紜不亦晚哉且勤王之師在畿內者急宣亟告景刻不可差商嶺旣回遠而駱谷又爲賊所扼通王命者唯襄斜爾若復阻則諸鎮之向背者我勝則來賊勝遂往此焉幾會不容差跌使楚琳逞憾敢爲猖狂南塞要衝東與賊合則我咽喉梗而心膂分矣豈不病哉今願望兩端是乃天誘其衷通歸塗濟大業也帝釋然盡召見其使優詔勞安之帝欲以內外從官普號定難元從功臣贊曰宮官具寮恪居奔走勞則有何

功之云難則嘗之何定之云今與奮命者齒恐沮戰士之心結勳臣之憤帝乃止京師已平帝欲召渾瑊訪奔亡內人給裝使赴行在贊諫曰大難始平而百役疲瘵之毗重傷殘廢之卒皆忍死扶疾想聞德音蓋事有先後義有輕重重者宜先輕者宜後昔武王克殷有未下車而爲之者有下車而爲之者當今所務謂宜以大臣馳傳迎復神主修飭郊丘展禋享之禮申告謝之意恤死義槁有功崇進忠直優問耆耄定反側寬脅從官失職復廢業是皆宜先不可後也葺宮室治服玩耳目之娛巾櫛之侍是皆宜後不可先也且內人當離潰之後或爲將士所私昔人掩絕纓飲盜馬者豈忘其愛邪知爲君之體然也天下固多寡人何必獨此帝不復下詔猶遣使諭城資遣初劉從一姜公輔等材下不逮贊遠甚徒以單言暫謀偶有合由下位建台宰而贊孤立一意爲左右權倖沮短又言事無所回諱陰失帝意久之不得宰相還京但爲中書舍人母韋猶在江東帝遣中人迎還京師俄以喪解官客東都諸方贈遺一不取惟韋舉以布衣交先以聞故所致輒稱詔受之又詔中人護父柩至自吳會葬洛陽服除以權知兵部侍郎復召爲學士入謝伏地顛泣帝爲興改容慰撫眷遇彌渥天下屬以爲相而竇參素不平忌之贊亦數言參罪失貞元七年罷學士以兵部侍郎知貢舉明年參黜乃以中書侍郎同中書門下平章事帝始任楊炎盧杞引樹私黨排忠良天下怨疾貞元後懲艾其失雖置宰相至除用庶官反覆參詰乃得下及贊秉政始請

臺閣長官得自薦其屬有不職坐舉者帝初許之或言諸司所引皆親黨招賂遺無實才帝復詔宰相自擇贊奏言齊桓公問管仲害霸對曰得賢不能任害霸也任賢不能固害霸也固始而不終害霸也與賢人謀事而小人議之害霸也所謂小人者非悉懷險詖以覆邦家也蓋趨向狹促以沮議爲出衆自異爲不羣趣小利昧遠圖效小信傷大道爾所謂臺省長官僕射尙書丞郎御史大夫中丞是也陛下擇輔相多出其中行實不能頓殊也今乃謂不能進一二屬吏豈後位宰相則可擇天下材乎夫求才者貴廣考課者貴精往武后收人心務拔擢非徒人得薦士亦許自舉其才豈不易哉然而課責嚴進退速故當世稱知人之明累朝賴多士之用陛下賞鑒獨任難於公舉有登延之路無練覈之方武后以易得人陛下以精失士今擇宰相以重於庶品選長官以愈於下流及宰相獻言長吏薦士則又納橫議廢始謀是任以重者輕其言待以輕者重其事也帝雖嘉之然卒停薦士詔舊制吏部選以歲集乾元後天下兵興率三年一調吏員稽壅則案牘叢淆僞冒蒙真吏緣以爲姦廢置無綱至十年不被調者缺員或累歲不補贊乃請以內外員三分之一每歲計闕集人檢梃吏姦天下便之當是時賈耽盧邁趙憬同輔政凡有司關白三人者更相顧不肯判贊又請如故事旬一人秉筆所咨輒判又以西北邊歲調河南江淮兵謂之防秋士不素練戰數敗將統制不一亡以應敵乃上陳其弊曰自祿山搆亂肅宗始撤邊備以靖中邦借外

二號第一百二十七

威靈內難於是吐蕃乘釁回紇矜功中國不振四十餘年率傷耗之民竭力以事西輸賄繒北償馬資尙不足滿其意於是調斂四方以屯疆陲又不能遏其侵故小入則驅略深入則戒嚴于時議安邊者皆務所難忽所易勉所短略所長行之而要之而不精圖之而功靡就夫勢有難易事有先後力大而敵脆則先所難是謂奪人之心也力寡而敵堅則先所易是謂觀釁而動也今財匱於中人勞未瘳而欲發師徒以犯獯寇境復其侵疆攻其堅城前有勝負未必之虞後有餽運不繼之患萬一橈敗適所以啟戎心挫國威也以此安邊可謂不量勢而務所難矣天之授有分地之產有宜是以五方之俗長短各殊勉所短而敵長者殆用所長而乘短者彊且以水草爲居討獵爲生便於馳突不恥敗亡此戎狄所長中國之短也而欲益兵蒐乘爭驅角力交鋒原野之上決命尋常之間以此禦寇可謂勉所短而校其長矣務所難勉所短勞費百倍終無成功雖果成之不挫則廢誠以越天授違地產虧時勢以反物宜者也胡不守所易用所長乎若乃擇將吏脩紀律訓齊師徒耀德以佐威能邇以示遐禁侵暴以彰吾信抑攻取以昭吾仁彼求和則善之而勿與盟彼爲寇則備之而不報復此當今所易也賤力貴智好生惡殺輕利重人忍小全大安其居而動俟其時後行修封疆守要害蹊蹻列屯營謹禁防明斥候務農足食非萬全不謀非百克不鬪寇小至則遏其入寇大至則邀其歸據險以乘之多方以誤之使其勇無所加衆無所用掠則靡

獲攻則不能進有腹背支敵之虞退有首尾不相救之患是謂乘其弊不戰而屈人兵此中國之長也我之所長戎狄之短也我之所易戎狄之難也以長制短則用力寡而見功多以易敵難則財不匱而事速成捨此不務而反爲所乘斯謂倒持戈矛以鐔授寇者也今皆務之矣尙且守封未固寇戎未懲者何邪病在謀無定用衆無適從任者不必才才者不必任聞不必實實不必聞所信不必誠所誠不必信行不必當當不必行又有六失焉夫兵有攻討有鎮守權以紆難暫以應機事有便宜謀有奇詭不恤常制不徇衆情死生進退唯將所命攻討之兵也人情者利焉則勸習焉則安保親戚而後樂生顧家業而後忘死可以治術馭不可以法制驅鎮守之兵也王者欲備封疆禦戎狄則選鎮守之兵以置之古之善選置者必辨其土宜察其技能知其好惡用其力不違其性齊其俗不易其宜引其善不責其所不能禁其非不處其所不欲類其部伍安其家室然後能使之樂其居定其志以惠則感而不驕以威則肅而不怨靡督課而自用弛禁防而不攜故守則固戰則彊其術無它便於人而已今遠調屯士以戍邊陲邀所不能疆所不欲廣其數不考於用責其力不察其情斯可爲羽衛之儀而無益備禦之實也何者窮邊之地千里蕭條寒風裂膚豺狼爲隣晝則荷戈以耕夜則倚烽以覘有剽害之慮無休暇之娛非生其域習其風幼而視焉長而安焉則不能寧居而狎其敵也關東百物阜殷士怵溫飽比諸邊隅不翅天地間絕塞荒

陬則辛酸動容聆疆蕃勁虜則懾駭褫情又使去親族捨國廬甘所辛酸抗所懾駭將冀爲用不亦疏乎又有休代之期無統制之善資奉姑息譬如驕子進不邀以成功退不處以嚴憲屈指計歸張頤待餉師一挫傷則乘其危橋布路東潰平居殫資儲以奉浮冗臨難棄城鎮以搖疆場其弊豈特無益哉謫徙之人本以增戶實邊立功自贖既無良之人而思亂幸災又甚於戍卒適有防衛之煩而無立功之益雖前代之固非可遵者也帥臣身不臨邊而以偏師戍守大抵士之犀銳悉選以自奉委疲羸者以守要衝寇至而不支則劫執芟蹂恣所欲得比都府聞之虜已旋返治兵若此斯可謂措置乖方一失也賞以存勸罰以示懲以懋有庸以威不恪故賞罰之於馭衆譬輓軌所以行車銜勒所以服馬也今將之號令不能行之軍國之典刑不能施之將上下遵養以苟歲時欲褒一有功慮無功者怨嫌疑而不賞欲責一有罪畏同惡者諫隱忍而不誅故忘身效節者抵諫於衆債軍緩救者畜姦不畏褒貶稱毀紛然相亂公者直己不求諸人則罹困厄姦者行私苟媚於衆則取優崇此義士勇夫所以痛心解體也又如遇敵而守不固陳謀而功不成責將帥曰資糧不足責有司曰須給無乏更相爲解而朝廷含糊未嘗究詰故抱直者吞聲罔上者不慙馭衆若此可謂課責虧度二失也以課責之虧措置之乖將不得竭其才卒不得盡其力屯集雖衆無施戰陣虜常橫行以謂境無人焉吏習其常惟曰兵少不敵朝廷莫之省則

又調發益師無裨於備禦而有弊於供億閭井日耗斂求日繁傾家析產權鹽稅酒無慮所入半以事邊制用若此可謂財匱於兵衆矣三失也今四夷最彊盛者莫如吐蕃舉吐蕃衆未當中國十數大郡而內虞外備與中國不殊所以能寇邊者無幾又器不犀利甲不精完材不趨敏動則中國懟其衆不敢抗靜則憚其疆不敢侵何哉良以我之節制多而彼之統帥一也且節制多則人心不一人心不一則號令不行號令不行則進退難必進退難必則疾徐失宜疾徐失宜則機會不及機會不及則氣勢自衰斯乃勇廢爲庸衆失爲弱開元天寶時制西北二蕃則朔方河西隴右三節度而已尙慮權分或詔兼領之中興未遑外討則僑四鎮隸安定以隴右附扶風所當二蕃則朔方涇原隴右河東四節度而已以關東戍卒屬之雖任未得人而措置之法存焉自賊泚亂以誘涇原懷光反以汧朔方則分朔方爲三節度其鎮軍且四十皆特詔任之各有中人監軍咸得相抗既無軍法臨下莫能稟屬邊書告急方使關白用兵是謂從容拯溺緝讓救焚矣兵以氣若勢爲用者也氣聚則盛散則消勢合則威析則弱今之邊戍勢弱氣消建軍若此謂力分於將多矣四失也治戎之要在均齊而已故軍法無貴賤之差多少之異所以同其志盡其力也被邊長鎮之兵皆百戰傷夷角所能則習度所處則危者服役則勞察臨敵則勇然衣粟止於當身又爲家室所分居常凍餒而關東戍士歲月更代怯於應敵懈於服勞然衣粟優厚繼以茶藥資

以蔬醬豐寡相懸勢則遠甚又有以邊軍詭爲奏請遙隸神策者粟賜之饒有三倍之必此士類所以忿恨經費所以漏匱夫事業未異給養頓殊人情所不甘也不爲戎首已可嘉者況使協力同心以攘寇難臣知有所不能焉養士若此可謂怨生於不均矣五失也凡任將帥必先考察行能然後指所授之方所委之要令自揣可否以見要領須某甲兵藉某參屬用若干步騎計若干資糧何所列屯何時成功觀其言校其實若曰不足取當艱之於初不宜詒悔於後也若曰可任則當要之於終不宜掣肘於內也故疑者不使使者不疑勞神於拔選端拱於委任然後覈否臧信賞罰受賞者不爲濫當罰者不敢辭付授專則苟且之心息矣是以古之遣將者君推轂而命之又賜鈇鉞故軍容不入國國容不入軍機宜不以遠決號令不以兩從今陛下命帥先求易制者多其部使力分輕其任使心弱由是分閫責成之義廢死綏任咎之志衰一則聽命二則聽命止取承順可矣若有意乎靖難則不可兩疆相接兩軍相持事機所急鱗不留息況千里之遠九重之深陳述之難明聽覽之不專欲事無遺策雖聖亦有所不能焉守城者以寡不敢抗分鎮者以無詔不敢救逗留之頃寇已奔逼牧馬屯牛鞠椎剽矣嗇夫樵婦罄俘囚矣假令詔至發兵更相顧望莫敢遮礙敗者減百爲一獲者衍百爲千帥守以總制在朝不卹於罪陛下以權出己不究厥情用帥若此可謂機失於遙制矣六失也臣愚謂宜罷四方之防秋者以其數折而三之其一責

本道節度募壯士願屯邊者從焉其一則第以本道衣粟責關內河東募用蕃夏子弟願傳軍者給焉其一以所輸資糧給應募者以安其業詔度支市牛召工就諸屯繕完器具至者家給牛一耕耨水火之器畢具一歲給二口糧賜種子勸之播時須一年則使自給有餘粟者縣官倍價以售既息調發之煩又無幸免之弊出則人自爲戰處則家自爲耕與夫暫屯遽罷豈同日論哉然後建文武大臣一人爲隴右元帥自涇隴鳳翔薄長武城盡山南西道凡節度府之兵皆屬焉又詔一人爲朔方元帥由鄜坊邠靈鞏靈夏凡節度府之兵屬焉又詔一人爲河東元帥舉河東極振武節度府之兵屬焉各以臨邊要州爲治所所部州若府遴選良吏爲刺史外奉軍興內課農桑慎守中國所長謹行當今所易則八利可致六失可去矣帝愛重其言不從也班宏判度支卒官贊薦李異帝漫許之而自用裴延齡贊言延齡僻戾躁妄不可用不聽俄而延齡姦佞得君天下仇惡無敢言贊上書苦諫帝不懌竟以太子賓客罷贊本畏慎未嘗通賓客延齡揣帝意薄譏短百緒帝遂發怒欲誅贊賴陽城等交章論辯乃貶忠州別駕後稍思之會薛延爲刺史諭旨慰勞草草數上表請贊代領劍南帝猶銜之不肯與順宗立召還詔未至卒年五十二贈兵部尚書諡曰宣始贊入翰林年尚少以材幸天子常以輩行呼而不名在奉天朝夕進見然小心精潔未嘗有過由是帝親倚至解衣衣之同類莫敢望雖外有宰相主大議而贊常居中參裁可否時號內相

嘗爲帝言今盜徧天下宜痛自咎悔以感人心昔成湯罪己以興楚昭王出奔以一晉善後國陛下誠不吝改過以言謝天下使臣持筆亡所忌庶叛者革心帝從之故奉天所下制書雖武人悍卒無不感動流涕後李抱真入朝爲帝言陛下在奉天山南時赦令至山東士卒聞者皆感泣思奮臣是時知賊不足平議者謂興元戡難功雖爪牙宣力蓋贊有助焉狩山南也道險澀與從官相失夜召贊不得帝驚且泣詔軍中得贊者賞千金久之上謁帝喜見顏問自太子以下皆賀及輔政不敢自顧重事有可否必言之所言皆剴拂帝短惡到深切或規其太過者對曰吾上不負天子下不負所學皇宅卹乎旣放荒遠常閩戶人不識其面又避謗不著書地苦瘴癘祇爲今古集驗方五十篇示鄉人云贊曰德宗之不亡顧不幸哉在危難時聽贊謀及已平追仇盡言佛然以讒倖逐猶棄梗至延齡輩則寵任磐桓不移如山昏佞之相濟也世言贊曰罷翰林以爲與吳通玄兄弟爭寵寶參之死贊漏其言非也夫君子小人不兩進邪諂得君則正士危何可嘗耶觀贊論諫數十百篇譏陳時病皆本仁義可爲後世法炳炳如丹帝所用纔十一唐祚不競惜哉

唐書卷一百五十七

唐書卷一百五十七考證

陸贄傳以水草為居討獺為生○討字疑射字之誤

唐書卷一百五十七考證

唐書卷一百五十七考證

唐書卷一百五十八

宋 端 明 殿 學 士 宋 祁 撰

列傳第八十三

韋張巖韓

韋臯字城武京兆萬年人六代祖範有勳力周隋間臯始仕為建陵挽郎諸帥府更辟擢監察御史張鎰節度鳳翔署營田判官以殿中侍御史知隴州行營留事德宗狩奉天李楚琳殺鎰劫眾叛歸朱泚隴州刺史郝通奔降楚琳始泚以范陽軍鎮鳳翔既歸節而留兵五百戍隴上以部將牛雲光督之至是雲光謀請臯為帥將劫以臣泚別將翟暉伺知以白臯雲光懼不克率眾出奔至汧陽遇泚奴使臯所謂雲光曰太尉已為天子使我以御史中丞授臯若聽固吾人也不受可遂誅之請以兵俱許之臯迎勞先納奴僞受泚詔即讓雲光曰既去而復何也對曰向未知公之命故去今還願與公同生死臯曰大使固善苟無它圖請釋甲以安眾而後可入也雲光以臯諸生亡能為乃命士委杖鎧臯受而內其卒明日置酒大會奴雲光與其下至臯伏甲左右廡酒行盡殺之以其首徇泚復使它奴拜臯鳳翔節度使臯亦斬之及從騎三人縱一人使報泚帝聞乃授臯隴州刺史置奉義軍拜節度使寵其功臯遣兄平及弁繼至奉天

乾隆四年校刊

唐書卷一百五十八 列傳

士氣益壯乃築壇血牲與士盟曰協力一心以誅元惡有渝此盟神其殛之又馳使吐蕃與連和隴坻遂安帝自梁洋還召爲左金吾衛將軍遷大將軍貞元初代張延賞爲劍南西川節度使初雲南蠻羈附吐蕃其盜塞必以蠻爲鄉道臯計得雲南則斬虜右支乃間使招徠之稍稍通西南夷明年蠻大首領苴那時以王爵讓其兄子烏星始烏星幼那時攝領其部故請歸爵臯上言禮讓行于殊俗則佛戾者化願皆封以示褒進詔可又明年雲南款邊求內屬約東蠻鬼主驃傍苴夢衝等絕吐蕃盟五年東蠻斷瀘水橋攻吐蕃請臯濟師臯遣精卒二千與蠻共破吐蕃於臺登殺青海大會乞臧遮遮臘城酋悉多楊朱及論東柴等虜墜死崖谷不可計多獲牛馬鎧裝遮遮尙結贊之子虜貴將悍雄者也既敗酋長百餘行哭隨之悍將已亡則屯柵以次降定進檢校吏部尙書初東蠻地二千里勝兵常數萬南倚閩羅鳳西結吐蕃徂勢疆弱爲患臯能綏服之故戰有功詔以那時爲順政王夢衝懷化王驃傍和義王刻兩林勿鄧等印以賜之而夢衝復與吐蕃盟臯遣別將蘇崖召之結其叛斬于琵琶川立次鬼主樣棄等蠻部震服乃建安夷軍於資州維制諸蠻城龍谿於西山保納降羌九年天子城鹽州策虜且來撓襲詔臯出師率維之乃命大將董勳張芬分出西山靈關破峨和通鶴定廉城踰的博嶺遂圍維州搏樓雞攻下羊溪等三城取劍山屯焚之南道元帥論莽熱來援與戰破其軍進收白岸乃城鹽州詔臯休士以功爲檢校尙書右

僕射扶風縣伯於是西山羌女訶陵南水白狗通租弱水清遠咄霸八國會長皆因臯請入朝乃遣幕府崔佐時由石門趣雲南而南詔復通石門者隋史萬歲南征道也天寶中鮮于仲通下兵南溪道遂閉至是蠻徑北谷近吐蕃故臯治復之絲黎州出邛部直雲南置清溪關號曰南道乃詔臯統押近界諸蠻西山八國雲南安撫使俄進同中書門下平章事十三年復嵩州吐蕃怨完壘造舟謀擾邊臯輒破卻之自是疊貢臘城等九節度嬰籠官馬定德與大將舉落皆降昆明管些蠻又內附贊普怒遂北掠靈朔破麟州以取償焉帝詔臯深入以榜虜臯遣大將陳泊等出三奇崔堯臣趨石門無衣山仇冕董振走維州邢毗出黃崖略棲雞老翁城高倜王英俊繇峨和清溪道薄故松州元膺出濕山成溪臧守至道黎嵩韋良金趨平夷路惟明自靈關夏陽攻通租偏松城王有道涉大度河陳孝陽率蠻苴那時等道西瀘攻昆明諾濟師無慮五萬以八月悉出塞十月大破吐蕃拔其保鎮捕候追奔轉戰千里遂圍維州吐蕃釋靈朔兵使論莽熱以內大相兼東境五節度大使率雜虜十萬來救師伏以待虜乘勝深入師譟而奮虜大潰生禽莽熱獻諸朝帝悅進檢校司徒兼中書令南康郡王帝製紀功碑褒賜之順宗立詔檢校太尉會王叔文等干政臯遣劉闢來京師謁叔文曰公使私於君請盡領劍南則惟君之報不然惟君之怨叔文怒欲斬闢闢遁去臯知叔文多釁又自以大臣可與國大議卽上表請皇太子監國又上牋太子暴叔文

伍之姦且勸進會大臣繼請太子遂受禪因投旒姦黨是歲臯暴卒年六十一贈太師諡曰忠武臯治蜀二十一年數出師凡破吐蕃四十八萬禽殺節度都督城主籠官千五百斬首五萬餘級獲牛羊二十五萬收器械六百三十萬其功烈爲西南劇善拊士至雖昏嫁皆厚資之婿給錦衣女給銀塗衣賜各萬錢死喪者稱是其僚掾官雖顯不使還朝卽署屬州刺史自以侈橫務蓋藏之故劉闢階其厲卒以叛朝廷欲追繩其咎而不與臯者詆所進兵皆鏤定秦字有陸暢者上言臣向在蜀知定秦者匠名也繇是議息暢字達夫臯雅所厚禮始天寶時李白爲蜀道難篇以斥嚴武暢更爲蜀道易以美臯焉始臯務私其民列州互除租凡三歲一復臯沒蜀人德之見其遺象必拜凡刻石著臯名者皆鑿其文尊諱之兄聿弟平聿以蔭調南陵尉遷祕書郎以父嫌名換太子司議郎辟淮南杜佑府元和初爲國子司業劉闢與盧文若反臯子行式娶文若女弟聿不以聞闢平行式妻當沒掖庭有司并按聿或以道遠不應坐乃皆赦之終太子右庶子平與臯斬朱泚使者間走奉天上功擢萬年尉平子正貫字公理少孤臯謂能大其門名曰臧孫雄隱爲單父尉不得意棄官去改今名舉賢良方正異等除太子校書郎調華原尉後又中詳閑吏治科遷萬年主簿擢累司農卿坐尙食乏供貶均州刺史久之進壽州團練使宣宗立以洽當最拜京兆尹同州刺史俄擢嶺南節度使南海舶賈始至大帥必取象犀明珠上珍而售以下直正貫旣至無所

取吏咨其清南方風俗右鬼正貫毀淫祠教民毋妄祈會海水溢人爭咎撤祠事以爲神不厭正貫登城沃酒以誓曰不當神意長人任其咎無隸下民俄而水去民乃信之居鎮三歲旣病遣令無厚葬無用鼓吹無請諡卒年六十八贈工部尙書

劉闢者字太初擢進士宏詞科佐臯府遷累御史中丞度支副使臯卒闢主後務諷諸將徵旌節憲宗以給事中召之不奉詔時帝新卽位欲靜鎮四方卽拜檢校工部尙書劍南西川節度使闢意帝可動益驚蹙吐不臣語求統三川欲以所善盧文若節度東川卽以兵取梓州且以術家言五福太一舍于蜀乃造大樓以祈祥帝始重征討而宰相杜黃裳勸帝且言闢妄書生耳可鼓而俘也薦高崇文李元弈等將神策行營兵皆西使嚴礪李康犄角之詔許自新闢不聽崇文取東川帝乃下詔奪其官進破鹿頭關遂下成都闢從數十騎走至羊灌田自投水不能死騎將鄺定進禽之文若先殺其族繼石自沈于江失其尸檻車送關京師尙冀不死食飲于道晏然將至都神策以兵迎之係其首曳而入驚曰何至是邪帝御興安樓受俘詔詰反狀闢曰臣不敢反五院子弟爲惡不能制詔問遣使賜節何不受乃伏罪獻廟社徇于市斬于城西南獨柳下子超郎等九人與部將崔綱以次誅始闢嘗病見問疾者必以手行入其口闢卽裂食之唯盧文若至如平常故益與之厚而皆夷族

張建封字本立鄧州南陽人客隱兗州父玠少任俠安祿山反使李廷偉脅徇山東魯郡太守韓擇木迎館之玠率豪桀段絳等集兵將斬以徇擇木不許唯司兵參軍張孚助其謀乃殺廷偉并其黨以聞擇木孚皆受賞而玠去之江南不自言功建封少喜文章能辯論慷慨尚氣自許以功名顯李光弼鎮河南盜起蘇常間殘掠鄉縣代宗詔中人馬日新與光弼麾下進討建封見中人請前喻賊可不須戰因到賊屯開譬禍福一日降數千人縱還田里由是知名湖南觀察使韋之晉辟署參謀授左清道兵曹參軍不樂職輒去命狐彰節度滑毫奏置幕府彰不朝覲建封非之往見轉運使劉晏晏奏試大理評事使筦漕務歲餘罷時馬燧爲三城鎮遏使雅知之表爲判官權監察御史燧伐李靈耀軍中事多所諏訪從鎮河東授侍御史卽表其能於朝楊炎將任以要職盧杞不喜出爲岳州刺史李希烈旣破梁崇義跋扈不臣壽州刺史崔昭與相聞德宗召宰相選代昭者杞倉卒不暇取它吏卽白用建封希烈數敗王師張甚遂僭卽天子位淮南節度使陳少游陰附之希烈遣將楊豐齎赦二畀建封少游豐至建封縛致軍中會中人來對之斬其首因送僞書于行在少游聞之恚汗不自處建封乃劾其附賊狀帝方蒙難不暇治也希烈又署杜少誠爲淮南節度使約破壽州以趣江都建封壁霍丘秋柵拒之賊不能東遷團練使帝還自梁少游卒憂死進兼御史大夫濠壽廬觀察使是時四方尚多故乃繕陴隍益治兵四鄙附悅希烈使票

一二號第一百二十五

帥悍卒來戰建封皆沮劔之賊平進封階又任一子正員官貞元四年拜御史大夫徐泗濠節度使始李洧以徐降洧卒高承宗獨孤華代之地迫于寇常困蹙不支於是李泌建言東南漕自淮達諸汴徐之埭橋爲江淮計口今徐州刺史高明應甚少脫爲李納所并以梗餉路是失江淮也請以建封代之益與濠泗二州夫徐地重而兵勁若帥又賢卽淄青震矣帝曰善繇是徐復爲雄鎮久之檢校尙書右僕射十三年來朝帝不待日召見延英殿詔會朝赴大夫班以示殊寵建封賦朝天行以獻帝眷遇異等賜名馬珍具是時宦者主宮市置數十百人閤物慶左謂之白望無詔文驗駁但稱宮市則莫敢誰何大率與直十不償一又邀闈闕所奉及脚傭至有重荷趨肆而往返者有農賈一驢薪宦人以數尺帛易之又取它費且驅驢入宮而農納薪辭帛欲亟去不許恚曰惟有死耳遂擊宦者有司執之以聞帝黜宦人賜農帛十匹然宮市不廢也諫臣交章列上皆不納故建封請問爲帝言之帝頗順聽會詔書蠲民逋賦帝問何如答曰殘逋積負決無可斂雖蠲除之百姓尙無所益又陳河東節度使李說華州刺史盧徵皆病不能事左右得以爲姦右金吾大將軍李翰好刺細事規寵人疾惡之帝悉嘉可未幾制詔官師過從人情之常自今金吾勿以聞元已賜宴曲江特詔與宰相同榻食其還鎮帝賦詩以餞于時雖馬燧渾瑊劉玄佐李抱真等勳寵卓越未有以詩餞者帝又使左右以所持鞭賜之曰卿節誼歲寒弗渝故用此爲況建封又

賦詩以自警勵十六年以病求代詔韋夏卿代之未至而建封卒年六十六冊贈司徒治徐凡十年躬於所事一軍大治善容人過至健黠亦未嘗曲法假之其言忠義感激故下皆畏悅性樂士賢不肯游其門者禮必均故其往如歸許孟容韓愈皆奏署幕府有文章傳于時

子愔始以蔭補虢州參軍事建封卒府佐鄕通誠者攝留事畏其軍亂因浙西戍兵過徐謀引以爲援舉軍怒斧庫取兵環府大譟殺通誠及大將數人乃表于朝請愔爲留後假旄節帝不許披濠泗隸淮南詔杜佑討徐亂泗州刺史張伍以兵攻埇橋與徐軍遇伍大敗帝未有以制乃授愔右驍衛將軍徐州刺史知留後以伍爲泗州留後杜兼爲濠州留後俄進愔武寧軍節度使元和初以疾求代召爲工部尙書以王紹節度武寧濠泗隸徐徐人喜遂不敢亂而愔得行未踰境卒愔治徐七年其政稱治贈尙書右僕

射

嚴震字遐聞梓州鹽亭人本農家子以財役里閭至德乾元中數出貲助邊得爲州長史西川節度使嚴武知其才署押衙遷恆王府司馬委以軍府衆務武卒罷歸會東川節度使李叔明表爲渝州刺史震以叔明姻家移疾去山南西道節度府又表爲鳳州刺史母喪解起爲興鳳兩州團練使好興利除害建中中劍南黜陟使韋棫狀震治行爲山南第一乃賜上下考封鄜國公治鳳十四年號稱清嚴遠邇咨美遷

山南西道節度使朱泚反遣腹心穆廷光等遺帛書誘之震卽斬以聞是時李懷光與賊連和奉天危感帝欲徙蹕山南震聞馳表奉迎遣大將張用誠以兵五千扞衛用誠至盩厔有反計帝憂之會震牙將馬勛嗣至帝告以故勛曰臣請歸取節度符召之卽不受斬其首以復命帝悅使計日往勛還得符請壯士五人與偕出略谷用誠以爲未知其謀以數百騎逐勛館之左右嚴侍勛未發陰令焚草館外士寒爭附火勛從容引符示之曰大夫召君用誠懼將走壯士自後禽之用誠子斫勛傷首左右扞刀得免遂仆用誠而格殺其子勛卽軍中士皆擐甲矣勛昌言曰若父母妻子在梁州今棄之而反何所利邪大夫取用誠爾若等無與衆乃服不敢動卽縛用誠送於震杖殺之而拔其副以統師始勛赴行在踰半日期帝頗憂比至大喜翌日發奉天既入略谷懷光以騎追襲賴山南兵以免尋加檢校戶部尙書馮翊郡王實封二百戶天子至梁州宰相以爲地貧無所仰給請進幸成都震曰山南密邇畿輔李晟銳於收復方藉六師爲聲援今引而西則諸將顧望責功無期帝未決會晟表至亦請駐蹕梁洋議遂定然梁漢間刀耕火耨民采稻爲食雖領十五郡而賦入纔比東方數大縣自安史後山賊剽掠戶口流散震隨宜勸課鳩斂有法民不煩擾而行在供億具焉車駕將還加檢校尙書左僕射詔改梁州爲興元府卽用震爲尹加實封二百戶久之進同中書門下平章事貞元十五年卒年七十六贈太保諡曰忠穆

從孫讓與宰相楊收善咸通中繇桂管觀察使擢爲江西節度使改號鎮南軍時南蠻內寇詔讓募士三萬備之或言讓廣補卒擅納緡廩及收得罪韋保衡以讓素善收賂賄狼藉遣使按覆詔賜死
韓弘滑州匡城人少孤依其舅劉玄佐舉明經不中從外家學騎射由諸曹試大理評事爲宋州南城將事劉全諒署都知兵馬使貞元十五年全諒死軍中思玄佐以弘才武共立爲留後請監軍表諸縣詔檢校工部尙書充宣武節度副大使知節度事先是曲環死吳少誠與全諒謀襲陳許使數輩仍在館弘始得帥欲以忠自表於衆卽驅出少誠使斬之選卒三千會諸軍擊少誠敗之汴自劉士寧以來軍益驕及殺陸長源主帥勢輕不可制弘察軍中素恣橫者劉鏐等三百人一日數其罪斬之牙門流血丹道弘言笑自如自是訖弘去無一敢肆者李師古屯曹州以謀鄭滑或告師古治道矣兵且至請備之弘曰師來不除道也師古情得乃引去累授檢校司空中書門下平章事弘以官與太原王鐔等論書宰相恥爲鐔下憲宗方用兵淮西藉其重更授檢校司徒班鐔上嚴綬以王師敗乃拜弘淮西諸軍行營都統使并兩河而令李光顏烏重胤擊賊弘不親屯遣子公武領兵三千屬光顏然陰爲逗撓計以危國邀功者每諸將告捷輒紮日不怡元濟平以功加兼侍中封許國公李師道誅弘大懼因請入朝册拜司徒中書令以足疾命中人掖拜固願留京師帝崩攝冢宰俄出爲河中節度使以病請還復拜司徒中書令卒年五

十八贈太尉諡曰隱始弘自汴來朝獻馬三千絹五十萬它錦綵三萬而汴之庫廩錢尙百餘緡絹亦百餘萬馬七千糧三百萬斛兵械不可數弘爲人莊重寡言罪殺人問法何如不自爲輕重沉謀勇斷故少誠師道等皆憚之詔使至或驚侮不爲禮齊蔡平勢屈而後請覲然天子尊寵異等能以名位始終亦其天幸

子公武字從偃起家衛尉主簿爲宣武行營兵馬使以討蔡功檢校左散騎常侍鄜坊等州節度使弘入朝爲右金吾將軍弘出河中弘弟充徙宣武乃曰二父居重鎮我以孺子又當執金吾職乎因固辭改古驍衛大將軍性恭遜不以富貴自處卒贈戶部尙書諡曰恭

充本名瓌少亦依舅家李元爲河陽節度使署牙將元改昭義又從之元嘗謂賓佐曰充後當貴諸君必善事之未幾弘領宣武召主親兵元曰我知君舊矣吾兒不才無足累君者二女方幼以爲託遂辭去累授御史大夫弘峻法人人不自保充謙慎無少懈念弘在鎮久不入見天子身又得士不自安因請入宿衛弘許之不卽遣後因獵單騎走洛陽朝廷亮其節擢右金吾衛將軍轉大將軍斥軍士虛名不如令者七百人歷少府監鄜坊等州節度使穆宗立幽鎮魏復亂王承元以冀兵二千屯滑州朝廷恐冀兵相誅爲叛徙承元鄜坊而授充檢校尙書左僕射爲義成軍節度使會汴軍逐李愿以李芥主留事帝謂充素

爲汴士悅向詔節度宣武兼統義成兵討齊戰郭橋破之會李質斬齊遂入汴初陳許李光顏亦奉詔討齊屯尉氏意先得汴欲俘掠以餌軍而汴監軍姚文壽亦欲內光顏充聞其謀馳至城下汴人望見充歡躍無復貳者始帝遣人問破賊期充對汴天下咽喉臣頗習其人然王師臨之一月可破方二旬卽克帝喜曰充料敵若神加檢校司空籍齊所脅爲兵者三萬悉縱之又責首亂者千餘斥出境令曰敢後者斬由是內外按堵汴人愛賴之卒年五十五贈司徒諡曰肅充雖將家性儉節歷三鎮居處服玩如儒生乘機決策無餘悔世推善將李元浚充爲嫁二女周其家自弘去汴監軍選軍中敢士二千直閣下日秩酒肴物力幾屈然不敢廢充未入時李質總軍事乃曰韓公至而頓去二千人食豈不失人心乎不去且無以繼可以弊事遺吾帥乎因悉罷之而後迎充李質者節士也始爲牙將及齊爲留後邀帥節勸之不從齊疽發于首委質以兵遂禽齊終金吾將軍

贊曰臯建封弘本諸生震興田畝間未有以異人及投隙龍驤皆爲國梁楹光奮一時使不遭與庸夫汨汨並鬻而腐可也臯弘雖陰慝卒能以誠言自解長沒天年宜哉

唐書卷一百五十八

唐書卷一百五十八考證

章臯傳始臯務私其民列州互除租凡三歲一復臯沒蜀人德之見其遺像必拜○臣酉按舊書云臯重

賦歛以事月進致蜀土虛竭與新書所記殊不類然臯治蜀久功烈爲西南最新書似得其實

張建封傳是時宦者主宮市建封乘間爲帝言之帝頗順聽○臣酉按舊書亦載此事于嘉納之下卽記

蘇弁希旨上信之凡言宮市者皆不聽較新書似詳備若止如新書云云則似宮市竟因此而罷矣

唐書卷一百五十八考證

唐書卷一百五十九

宋 端 明 殿 學 士 宋 祁 撰

列傳第八十四

鮑李蕭薛樊王吳鄭陸盧柳崔

鮑防字子慎襄州襄陽人少孤寡彊志于學善辭章及進士第歷署節度府僚屬入為職方員外郎薛兼訓帥太原被病代宗授防少尹節度行軍司馬召見慰遣之俄知留後兼太原尹節度使人樂其治詔圖形別殿入為御史大夫歷福建江西觀察使召拜左散騎常侍從德宗奉天進禮部侍郎封東海郡公貞元元年策賢良方正得穆質裴復柳公綽歸登崔郾韋純魏弘簡熊執易等世美防知人時比歲旱策問陰陽祲沴質對漢故事免三公卜式請烹弘羊指當時輔政者右司郎中獨孤惴欲下質防不許曰使上聞所未聞不亦善乎卒置質高第帝見策嘉揖初防與知雜御史竇參遇導騎不引避參譏其僕及為相防尹京兆迫使致仕授工部尚書防吒曰吾與蕭昕子齒而同昕老坐宰相餘忿邪不得志卒年六十九贈太子少保諡曰宣防於詩尤工有所感發以譏切世儆當時稱之與中書舍人謝良弼友善時號鮑謝云

李自良兗州泗水人天寶亂往從兗鄆節度使能元皓以戰多累授右衛率從袁儻討賊袁晁積闕至試殿中監事浙東薛兼訓節度府兼訓徙太原又爲牙將鮑防代總節度事會回紇入寇防遣大將焦伯瑜等擊之自良曰寇遠來難與爭鋒請築二壘搃歸路堅壁勿出求戰不許師老而墮其勢易乘防不聽伯瑜戰百井大敗由是知名馬燧代防表爲軍候自良爲人勤且有謀燧倚信之從討田悅還攻李懷光河中數履鋒陷陣功在諸將右貞元三年燧來朝德宗罷燧兵以自良代之自良以事燧久不敢當議者多其讓乃授右龍武大將軍入謝帝終以河東近胡謂曰卿於進退盜不有禮然守北門無易卿者勉爲朕行乃以檢校工部尚書充河東節度使居治九年舉不愆法簡儉易循民不知有軍上下諧附卒于官贈尚書左僕射

蕭昕字中明梁鄆陽王恢七世孫世居河南再中博學宏辭科調壽安尉累遷左補闕哥舒翰爲副元帥拒安祿山辟掌書記翰敗僞道走蜀肅宗立奉誥冊見行在歷中書舍人禮部侍郎代宗狩陝昕由武關從帝擢國子祭酒建請崇太學以樹教本帝寤其言詔羣臣有籍于朝及神策六軍子弟隸業者聽補生員大厯中持節弔回紇回紇恃功廷讓昕曰乃中國亂非我無以平奈何市馬不時歸我直衆失色昕徐曰國家龜定寇難功雖絲毫不遺賞況隣國乎僕固懷恩我之叛臣爾與連禍又引吐蕃暴我如何天會

其衷吐蕃敗北回紇悔懼叩顙乞和非天子卹舊功則隻馬不得出塞下孰爲失信者回紇大慙因厚禮昕遣使者約和轉工部尚書封晉陵侯德宗出奉天明年八十餘步出城賊求之急獨竄山谷間僅至奉天遷太子少傅爵郡公兼禮部尚書知貢舉久之以太子少師致仕卒年九十三贈揚州大都督諡曰懿昕始薦張鎬來瑱在禮部擢杜黃裳高郢裴瑒其後鎬興布衣不數年位將相瑒爲將有威名黃裳等繼輔政並爲名宰云

薛播河中寶鼎人曾祖文思官中書舍人播早孤伯母林通經史善屬文躬授經諸子及播兄弟故開元天寶間播兄弟七人皆擢進士第爲衣冠光躋累授殿中侍御史遷武功萬年令温敏而裕與人交有常李栖筠常袞崔祐甫並器之祐甫輔政拜中書舍人出爲汝州刺史坐小累貶泉州再遷至河南尹以禮部侍郎卒贈本曹尚書子公達擢進士第佐鳳翔軍會帥不文嘗集射設的高數十尺令曰中者酬錦與金一軍莫能中公達執弓矢揖曰請爲公歡射三發連中衆大呼笑帥不喜乃自免去復佐河陽軍以國子助教居東都卒

樊澤字安時河中人少孤依外家客河朔相衛節度使薛嵩表爲堯山令舉賢良方正次潼關雨淖困不能前有熊執易者同舍逆旅哀之輟所乘馬傾褚以濟自罷所舉是歲澤上第楊炎善之擢左補闕澤有

武力喜兵法議者謂有將帥器嘗召對延英德宗嘆其論兵與我意合累遷山南東道司馬就拜節度使每射獵諸將憚其材武數與李希烈礪禽票將張嘉瑜杜文朝梁俊之等賊氣沮縮遂取唐隋二州貞元三年爲荆南節度使會山南東道副曹王臯卒軍亂剽居人以澤威惠著襄漢間復徙山南東道加檢校尚書右僕射十四年卒年五十七贈司空諡曰成訃至帝爲撤宴廢朝

子宗師字紹述始爲國子主簿元和三年擢軍謀宏遠科授著作佐郎歷金部郎中綿州刺史徙絳州治有迹進諫議大夫未拜卒始宗師家饒于財悉散施烟舊賓客妻子告不給宗師笑不答然力學多通解著春秋傳魁紀公樊子凡百餘篇別集尙多韓愈稱宗師論議平正有經據嘗薦其材云

王緯字文卿并州太原人父之咸爲長安尉與弟之賁之奐皆有文緯舉明經以書判入等歷長安尉大厯中與李泌俱爲路嗣恭江西觀察判官泌見惡於元載嗣恭希意欲殺之緯護解僅免泌執政奏於己有私恩德宗許爲泌報故進緯給事中浙西觀察使缺泌擬緯帝曰是朕爲君報德者乎黃門要地獨不留議事耶對曰浙西賦入尤劇緯清而忠能惠養民故請遣之制可初州縣有韓滉時罰錢未入者十八萬緡府史請裒爲進奉緯上疏願蠲以紓民詔聽之貞元十年加御史大夫兼諸道鹽鐵轉運使裴延齡以諸道貢錢四百萬緡獻爲羨錢以圖寵緯奏此諸州經費大忤延齡意改檢校工部尚書卒年七十一

贈太子少保緯居官以清白稱然好用刻深吏督察其下條約苛碎人不聊云

吳濟章敬皇后弟也繇布衣與兄淑一日賜官封皆等而濟畏太盛乞解太子詹事換檢校賓客兼家令進累左金吾衛大將軍濟才敏銳而謙畏自將帝數顧訪尤見委信是時令狐彰田神功等繼沒其下乘喪挾兵輒偃蹇搖亂濟持節至汴滑委悉慰說裁所欲爲奏各盡其情亦度朝廷可行者故軍中驩附帝才其爲重之元載當國久復狀日肆帝陰欲誅未發也顧左右無可與計即召濟圖之俄而收載賜死於是王縉楊炎王昂韓會包佶等皆當坐濟建言法有首從從不應死一用極刑虧德傷仁縉等繇是得減死丁後母喪解職既除拜右衛將軍德宗初出爲福建觀察使政勤清美譽四騰與宰相竇參有憾參數加短毀又言濟風痺不長趨走帝召還驗其疾非是繇是不直參擢濟陝虢觀察使代李翼翼參黨也宣武劉玄佐死以濟檢校兵部尚書領節度使馳代未至汴軍亂立玄佐子士寧帝欲遣兵內濟而參請授士寧以沮濟還爲右金吾衛大將軍貞元十四年夏大旱穀貴人流亡帝以過京兆尹韓皋罷之即召濟代皋已謝督視事明日詔乃下濟爲人彊力劬儉瞿瞿未嘗擾民上下愛向京師苦宮市疆估取物而有司附媚中官率阿從無敢爭濟見便殿因言中人所市不便宵民徒紛紛流議宮中所須責臣可辦若不欲外吏與聞禁中事宜料中官高年謹信者爲宮市令平賈和售以息衆譴又言掌閑驥騎飛龍內園美

睿園禁兵諸司雜供役手資課太繁宜有蠲省帝輒順可初府中易湊貴戚子不便簿領每有疑獄時其將出則遮湊取決幸倉卒得容欺湊叩鞍一視凡指撻盡中其弊初無留思衆畏服不意湊精裁道如此倣史非大過不榜責召至廷請服原去其下傳相訓勗舉無稽事文敬太子義章公主仍薨帝悼念厚葬之車土治墳農事廢湊候帝間徐言極爭不避或勸論事宜簡約不爾爲上厭苦湊曰上明睿憂勞四海不以愛所鍾而疲民以逞也顧左右鉗噤自安耳若反復啟寤幸一聽之則民受賜爲不少橋舌阿旨固善有如窮民上訴叵云罪何以能進兼兵部尙書及屬病門不內醫巫不嘗藥家人泣請對曰吾以庸謹起田畝位三品顯仕四十年年七十尙何求自古外戚令終者可數吾得以天年歸侍先人地下足矣帝知之詔侍醫敦進湯劑不獲已一飲之卒年七十一贈尙書右僕射諡曰成先是街樾稀殘有司蒔榆其空湊曰榆非人所蔭玩悉易以槐及槐成而湊已亾行人指樹懷之唐興后族退居奉朝請者猶以事失職而湊任中外未嘗以罪過罷爲世外戚表云淑子士矩

士矩文學蚤就喜與豪英游故人人助爲談說開成初爲江西觀察使饗宴侈縱一日費凡十數萬初至庫錢二十七萬緡晚年纔九萬軍用單匱無所仰事聞中外共申解得以親議文宗弗窮治也貶蔡州別駕諫官執處其罪不納於是御史中丞狄兼蒼建言陛下擢任士矩非私也士矩負陛下而治之亦非私

也請遣御史至江西卽訊使杜江淮它鎮循習意帝聽乃流端州

鄭權汴州開封人擢進士第佐涇原節度劉昌府昌被病入朝度其軍必亂以權寬厚容衆檄主後務昌去軍果亂權挺身冒刃明諭逆順殺首亂者一軍畏伏德宗方厭兵藩屯校佐得士心者皆就命之權自試參軍拜行軍司馬擢累河南尹進拜山南東道節度使徙領德棣滄景軍時討李師道權身將兵出屯奏置歸化縣綏納降附滄州刺史李宗爽數違命權劾奏詔追之宗爽以州兵留己自解憲宗更以烏重胤代權滄人懼共逐宗爽還京師有詔斬以徇徙權節度邢靈或訟宗爽爲權所誣左遷原王傅改右金吾衛大將軍穆宗立以左散騎常侍持節爲回鶻告哀使以足疾辭不許肩昇就道權識詣魁然有閔辯與可汗爭曲直持議明壯虜禮異之使還三遷工部尙書用度豪侈乃結權幸求鎮守於是檢校尙書右僕射嶺南節度使多哀貲珍使吏輸送凡帝左右助力者皆有納焉人笑之卒于官

陸亘字景山蘇州吳人元和三年策制科中第補萬年丞再遷太常博士禮史孟真練容典博士降色訪逮史倚以倨橫會將冊皇太子草儀真參議偃蹇亘榜逐之胥曹失色遷累戶部郎中太常少卿歷兗蔡魏蘇四州刺史浙東觀察使徙宣歙太和八年卒年七十一贈禮部尙書亘文明嚴重所到以善政稱初爲兗州對延英具陳節度分兵屯屬州刺史不能制故易亂帝因詔屯士得隸刺史温州瀕海經賊亂奪

官吏半祿代民租後相訟更以爲姦巨還官全稟繩賊非吏畏而賴之

盧坦字保衡河南洛陽人仕爲河南尉時杜黃裳爲尹召坦立堂下曰某家子與惡人游破產盍察之坦曰凡居官廉雖大臣無厚畜其能積財者必剝下以致之如子孫善守是天富不道之家不若恣其不道以歸於人黃裳驚其言自是遇加厚李復爲鄭滑節度使表爲判官監軍薛盈珍數干政坦每據理拒之有善笛者大將等悅之詣復請爲重職坦笑曰大將久在軍積勞亟遷乃及右職奈何自薄欲與吹笛少年同列邪諸將慙遽出就坦謝復病甚盈珍以甲士五百內牙中封府庫舉軍大恐坦勸止之軍乃安復卒詔姚南仲代之盈珍以南仲本書生易之曰是將材邪坦私謂人曰姚大夫外柔中剛監軍若侵之必不受我留恐及禍乃從復喪歸東都爲壽安令盈珍果與南仲不相中幕府多黜死者河南賦限已窮縣人訴機織未就坦詣府請申十日不聽坦諭縣人第輸勿顧限違之不過罰令俸爾由是知名累爲刑部郎中兼侍御史知雜事赤縣尉爲臺所按京兆尹密救之帝遣中人就釋坦白中丞請中覆中人走以聞帝曰吾固宜先命有司遂下詔乃釋數月遷中丞初諸道長吏罷還者取本道錢爲進奉帝因赦令一切禁止而山南節度使柳晟浙西觀察使閻濟美格詔輸獻坦劾奏晟濟美白衣待罪帝諭坦曰二人所獻皆家財朕已許原不可失信坦曰所以布大信者赦令也今二臣違詔陛下奈何以小信失大信乎帝曰

朕既受之奈何坦曰出歸有司以明陛下之德帝納之李錡誅有司將毀其祖墓坦上疏諫止裴均爲僕射將居諫議常侍上坦引故事及姚南仲舊比均曰南仲何人曰守正而不交權幸者均怒遂罷爲左庶子數月拜宣歙池觀察使初劉闢屠蘇疆坐誅疆兄弘官晉州自免去人莫敢用者坦奏弘有才行其弟從闢時距三千里宜不通謀今坐廢非用人意因請署判官帝曰使疆不誅尙錄其材況彼兄耶時江淮旱穀踊貴或請抑其價坦曰所部地狹穀來他州若直賤穀不至矣不如任之既而商以米至乃多貸兵食出諸市估遂平再遷戶部侍郎判度支或告泗州刺史薛審爲代北水運時畜異馬不以獻事下度支坦遣吏驗未反帝遲之更遣中人劉泰往坦曰事付有司而又遣宦官豈有司不足信乎三奏帝乃止表韓重華爲代北水運使開廢田列壁二十益兵三千人歲收粟二十萬石河毀西受降城宰相李吉甫議徙天德坦以爲城當磧口得制北狄之要美水豐草邊鄙所利若避河流不過徙數里奈何徇一時省費墮萬世策邪天德故城地壤瘠瘠北倚山去河遠烽候無所統接虜騎唐突勢不容知是無故而感地二百里故曰非便城使周懷義亦以爲言吉甫不悅出坦爲東川節度後數月懷義憂死燕重旣代之遂徙天德師人怨殺重旣覆其家初坦與宰相李絳議多協絳藉爲己助及坦出半歲而絳罷治東川盡蜀山澤鹽井權率之籍吳少誠之誅詔以兵二千屯安州坦每朔望使人問其父母妻子視疾病醫藥

故士皆感慰無逃還者惟請收軍吏閏月糧助行營爲人所非元和十二年卒年六十九贈禮部尚書舊制官階勳俱三品始聽立戟後雖轉四品官非貶削者戟不奪坦爲戶部侍郎時階朝議大夫勳護軍以嘗任宣州刺史三品請立戟許之時鄭餘慶淹練舊章以爲非是爲憲司劾正詔罰一月俸奪戟自貞元以來立戟十八家不應令並追正之

閻濟美者第進士有長者名貞元末繇婺州刺史爲福建觀察使徙浙西爲治簡易居鎮未嘗增常賦罷浙西也方在道見詔而貢獻無所還故帝爲言之尋出華州刺史入爲祕書監以工部尚書致仕卒諡曰温

柳晟河中解人六世祖敏仕後周爲太子太保父潭尙和政公主官太僕卿晟年十二居父喪爲身孝代宗養宮中使與太子諸王受學於吳大瓘并子通玄率十日輒上所學既長詔大瓘等卽家教授拜檢校太常卿德宗立晟親信用事朱泚反從帝至奉天自請入京師說賊黨以攜沮之帝壯其志得遣泚將右將軍郭常左將軍張光晟皆晟雅故晟出密詔陳禍福逆順常奉詔受命約自拔歸要籍朱旣昌告其謀泚捕繫晟及常外獄晟夜半坎垣毀械而亾斷髮爲浮屠間歸奉天帝見爲流涕乘輿還京師擢原王府長史吳通玄得罪晟上書理其辜其弟止曰天子方怒無詒悔不聽凡三上帝意解通玄得減死晟累遷

將作少監以護作崇陵封河東縣子授山南西道節度使府兵討劉闢還未扣城復詔戍梓州軍曹怒脅監軍謀變聞疾驅入勞士卒旣而問曰若等何爲成功曰誅驕不受命者晟曰若知劉闢得罪天子而誅之奈何復欲使後人誅若等耶士皆免冑拜從所徙入爲將作監使回鶻奉册立可汗逆謂曰屬聞可汗無禮自大去信自疆夫禮信不能爲何足奉中國乎可汗諸貴人愕然駭皆跪伏成禮還爲左金吾衛大將軍爵爲公卒年六十九詔從官臨弔贈太子少保晟敏于辯下士樂施唯自興元入朝貢獻不如詔爲御史中丞盧坦所劾憲宗以其賢置弗暴云

崔戎字可大玄隲從孫也舉明經補太子校書郎判入等調藍田主簿辟淮南李鄴府衛次公代鄴憲宗稱戎才故次公倚成于職裴度節度太原署參謀時王承宗以鎮叛度請戎往諭承宗至泣下乃聽命入爲殿中侍御史擢累諫議大夫雲南蠻亂成都詔戎持節劍南爲宣撫使奏罷稅外薑芋錢當賦錢者率三之以其一準繒布優其估以與民綏招流亾凡廢若置公私莫不便之還拜給事中出爲華州刺史吏以故事置錢萬緡爲刺史私用戎不取及去召吏曰籍所置錢享軍吾重矜激以夸後人也徙兗海沂密觀察使民擁留于道不得行乃休傳舍民至抱持取其鞵時詔使尙在民泣詣使請白天子勾戎還使許諾戎患責其下衆曰留公而天子怒不過斬吾二三老人則公不去矣戎夜單騎亾去民追不及乃止至

兗州鉏滅姦吏十餘輩民大喜歲餘卒年五十五贈禮部尚書

子雍字順中由起居郎出爲和州刺史應勦以兵劫烏江雍不能抗遣人持牛酒勞之密表其狀民不知訴諸朝宰相路巖素不平因是傳其罪賜死宣州

唐書卷一百五十九

唐書卷一百六十

宋 端 明 殿 學 士 宋 祁 撰

列傳第八十五

徐呂孟劉楊潘崔章

徐浩字季海越州人擢明經有文辭張說稱其才繇魯山主簿薦爲集賢校理見喜雨五色鶴賦咨嗟曰後來之英也進監察御史裏行辟幽州張守珪幕府歷河陽合治有績東都留守王倕表署其府民有妄作符命者衆不爲疑浩獨按篆詰狀果詐爲之遷累都官郎中爲嶺南選補使又領東都選肅宗立繇襄州刺史召授中書舍人四方詔令多出浩手遣辭贍速而書法至精帝喜之又參太上皇誥冊寵絕一時授兼尚書右丞浩建言故事有司斷獄必刑部審覆自李林甫楊國忠當國專作威福許有司就宰相府斷事尚書以下未省卽署乖慎卹意請如故便詔可故詳斷復自此始進國子祭酒爲李輔國譖貶廬州長史代宗復以中書舍人召遷工部侍郎會稽縣公出爲嶺南節度使召拜吏部侍郎與薛邕分典選浩有妾弟冒優託之遷擬長安尉御史大夫李栖筠劾之帝怒黜邕歙州刺史浩明州別駕德宗初召授彭王傅進郡公卒年八十贈太子少師諡曰定始浩父嶠之善書以法授浩益工嘗書四十二幅屏八體皆

乾隆四年校刊

唐書卷一百六十列傳

一

儲草隸尤工世狀其法曰怒猊抉石渴驥奔泉云晚節治廣及領選頗嗜財或於所嬖卒以敗
呂渭字君載河中人父延之終浙東節度使渭第進士從浙西觀察使李涵爲支使進殿中侍御史大厯
末涵爲元陵副使渭又爲判官涵繇御史大夫擢太子少傅渭建言涵父名少康當避宰相崔祐甫善其
言擢司門員外郎御史共劾渭昔涵再任少卿不以嫌今謂少傅爲慢官疑渭爲涵游說乃貶渭歙州司
馬貞元中累遷禮部侍郎始中書省有古柳建中末枯死德宗自梁還復榮茂人以爲瑞柳渭令貢土賦
之帝聞不以爲善又與裴延齡爲姻家擢其子操上第會入閣遺私謁之書于廷出爲潭州刺史卒贈陝
州大都督四子温恭儉讓

温字和叔一字化光從陸質治春秋梁肅爲文章貞元末擢進士第與韋執誼厚因善王叔文再遷爲左
拾遺以侍御史副張薦使吐蕃會順宗立薦卒於虜虜以中國有喪留温不遣時叔文秉權與游者皆貴
顯温在絕域不得遷常自悲元和元年乃還而柳宗元等皆坐叔文貶温獨免進戶部員外郎温藻翰精
富一時流輩推尚性險躁譎詭而好利與竇羣羊士諤相昵羣爲御史中丞薦温知雜事士諤爲御史宰
相李吉甫持之久不報温等怨時吉甫爲宦侍所抑温乘其間謀逐之會吉甫病夜召術士宿于第卽捕
士掠訊且奏吉甫陰事憲宗駭異既詰皆妄言將悉誅羣等吉甫苦救乃免於是貶温均州刺史士諤

資州議者不厭再貶爲道州久之徙衡州治有善狀卒年四十

恭字恭叔尚氣節喜縱橫孫奭術爲山南西道府掌書記進殿中侍御史終嶺南府判官儉亦爲御史讓
太子右庶子皆美材

孟簡字幾道德州平昌人曾祖詵武后時同州刺史簡舉進士宏辭連中累遷倉部員外郎王叔文任戶
部簡以不附離見疾不敢顯黜宰相韋執誼爲徙它曹元和中拜諫議大夫知匭事韓泰韓華之復刺史
吐突承瓘爲招討使簡皆固爭詣延英言不可狀以悻切出爲常州刺史州有孟漬久淤闕簡治導漑田
凡四千頃以勞賜金紫召爲給事中代李遜爲浙東觀察使遜抑士族右編人至橫恣不檢及簡一反之
農估兼受其弊時謂兩失之以工部侍郎召還初使府得代詔至署留後卽行李脩觀察浙西始請留故
使交政及簡還半道堂牒還之如例乃聽解進戶部加御史中丞戶部有二員判使按者居別一署謂之
左戶元和後選委華重宰相多由此進崔羣旣相而簡代之故簡意且柄任及出山南東道節度使內不
樂政頗嚴峭時有詔置臨漢監以牧馬命簡兼使職簡以親吏陸翰主奏邸關通閣侍翰持之數傲狠簡
怒追還以土囊斃之家上變發簡姦賊御史劾驗得遺吐突承瓘貲七百萬左授太子賓客分司東都再
貶吉州司馬以赦令進睦州刺史復徙常州仍太子賓客分司卒簡尤工詩聞江淮間尚節義與之交者

雖歿視卹其孤不少衰晚路殊蹙急佞佛過甚爲時所詬常與劉伯芻歸登蕭俛譯次梵言者

劉伯芻字素芝兵部侍郎迺之子行修謹淮南杜佑奏署節度府判官府罷召拜右補闕遷主客員外郎數過友家飲噉爲韋執誼劾貶處州參軍久乃除考功員外郎裴迥待之善擢累給事中李吉甫當國而迥卒不加贈伯芻爲申理乃贈太子少傅或言其妻迥從母也吉甫欲按之求補號州刺史稍遷刑部侍郎左散騎常侍卒贈工部尚書伯芻風度高嚴善談諳而動與時適論者少之

子寬夫寶厯中爲監察御史奏言以王府官攝祠位輕非嚴恭意請以尚書省東宮三品若左右丞侍郎通攝俄轉左補闕陳帖注浮屠書因供奉僧以聞除濠州刺史寬夫劾狀敬宗怒謂宰相曰帖不繇僧得州諫臣安受此言寬夫曰衆劾帖獨臣草狀應伏誅推言所從恐累國體帝讜其言釋之

子允章字蘊中咸通中爲禮部侍郎請諸生及進士第並謁先師衣青衿介幘以還古制改國子祭酒又建言羣臣輸光學錢治庠序宰相五萬節度使四萬刺史萬詔可後爲東都留守黃巢至分司李礪挈尚書印走河陽允章寄治河清巢僭號輒受僞官文書盡用金統遣取印礪所礪不與更悔愧移檄近鎮起兵扞賊礪持印還之後廢于家

楊憑字虛受一字嗣仁號州弘農人少孤其母訓道有方長善文辭與弟凝凌皆有名大厯中踵擢進士

第時號三楊憑重交游尙氣節然諾與穆質許孟容李鄴相友善一時歆慕號楊穆許李歷事節度府召爲監察御史不樂輒免去累遷太常少卿湖南江西觀察使性簡傲接下脫略人多怨之在二鎮尤侈休入拜京兆尹與御史中丞李夷簡素有隙因劾憑江西姦賊及它不法詔刑部尚書李鄴大理卿趙昌卽臺參訊于時憑治第永靈里功役叢煩又幽妓妾於永樂別舍謗議頗謹故夷簡藉之痛癢發欲抵以死既置對未得狀卽逮捕故官屬推躡憑家貲翰林學士李絳奏言憑所坐賊不當同逆人法乃止憲宗以憑治京兆有績但貶臨賀尉始德宗時假借方鎮習爲僭擬事夷簡首按憑時以爲宜而緣私怨論者亦不與俄徙杭州長史以太子詹事卒憑所善客徐晦者字大章第進士賢良方正擢樞密尉憑得罪姻友憚累無往候者獨晦至藍田慰餞宰相權德輿謂曰君送臨賀誠厚無乃爲累乎晦曰方布衣時臨賀知我今忍遽弃邪有如公異時爲姦邪譖斥又可爾乎德輿歎其直稱之朝李夷簡遠表爲監察御史晦過謝問所以舉之之由夷簡曰君不負楊臨賀肯負國乎後歷中書舍人彊直守正不沈浮於時嗜酒喪明以禮部尚書致仕卒

凝字懋功由協律郎三遷侍御史爲司封員外郎坐釐正嫡媵封邑爲權幸所忌徙吏部稍遷右司郎中宣武董晉表爲判官亳州刺史缺晉以凝行州事增墾田決汙偃築隄防水患訖息時孟叔度橫縱撓軍

治而凝亦荒涵管卒亂作凝走還京師閩門三年拜兵部郎中以痼疾卒凌字恭履最善文終侍御史子敬之

敬之字茂孝元和初擢進士第平判入等遷右衛胄曹參軍累遷屯田戶部二郎中坐李宗閔黨貶連州刺史文宗向儒術以宰相鄭覃兼國子祭酒俄以敬之代未幾兼太常少卿是日二子戎戴登科時號楊家三喜轉大理卿檢校工部尚書兼祭酒卒敬之嘗爲華山賦示韓愈愈稱之士林一時傳布李德裕尤咨賞敬之愛士類得其文章孜孜玩諷人以爲癖雅愛項斯爲詩所至稱之繇是擢上第斯字子遷江東人敬之祖客灞上見閩人濮陽愿閱其文大推挹徧語公卿間會愿死敬之爲歛葬

潘孟陽史亡何所人父炎大厯末官右庶子爲元載所惡久不遷載誅進禮部侍郎以病免方劉晏任權炎乃其婿雖書疏報答未嘗輒開時稱有古人節晏得罪坐貶澧州司馬時與疾上道不自言于邵高其介申救不見聽孟陽少以陰俄登博學宏詞科補渭南尉再遷殿中侍御史公卿多父行及外家賓客故被慰薦擢累兵部郎中貞元末王紹以恩倖進數稱孟陽才權知戶部侍郎杜佑判度支奏以自副時憲宗新立詔孟陽馳驛江淮視財賦加鹽鐵轉運副使并察諸使治否孟陽恃奧主又氣豪倨從者數百人所至會賓客留連倡樂招金錢多補吏譽望大喪使還罷爲大理卿其後左司郎中鄭敬宣慰江淮帝誠

曰朕宮中用尺寸物皆有籍唯賑民無所計卿是行宜諭朕意毋若潘孟陽殫財費酣飲游山寺而已元和三年出爲華州刺史遷劍南東川節度使宰相武元衡與孟陽舊復以戶部侍郎召判度支又兼京北五城營田使太府王遂爲西北供軍使持營田不可至私忿恨更請問列帝怒罷孟陽左散騎常侍明年復舊官盛葺第舍帝微行至樂游原望見之以問左右孟陽懼輟不敢治而伎媵用度過侈汰人多指怒之病風痺復改左散騎常侍卒贈兵部尚書諡曰康初孟陽爲侍郎年未四十其母謂曰以爾之材而位丞郎使吾憂之

崔元略博州人父敬貞元時終尚書左丞元略第進士更辟諸府遷累殿中侍御史以刑部郎中知御史雜事進拜中丞時李夷簡召爲大夫故詔元略留司東臺改京兆少尹行府事數月遷爲尹徙左散騎常侍初中丞闕議者屬崔植而元略謬謂植入閣不如儀使御史彈治及宰相以二人進元略果得之植恨悵旣當國以元略爲宣撫党項使辭疾不行植奏不少責無以示羣臣乃出爲黔南觀察使徙鄂岳久乃拜大理卿敬宗初還京兆尹兼御史大夫收貸錢萬七千緡爲御史劾奏詔刑部郎中趙元亮大理正元從質侍御史溫造以三司雜治元略素事宦人崔潭峻頗左右之獄具削兼秩而已俄授戶部侍郎譏謗大興諫官斥元略方劾而遷有助力元略自解辨乃止京兆劉栖楚又劾元略前造東渭橋縱吏增估物

不償直取工徒贓二萬緡詔奪一月俸於是栖楚規相位疑元略妨己路故舉疑似巖染之大和三年以戶部尚書判度支出爲東都留守改義成節度使卒贈尚書左僕射子鉉

鉉字台碩擢進士第從李石荆南爲賓佐入拜司勳員外郎翰林學士遷中書舍人學士承旨武宗好蹴鞠角抵鉉切諫帝褻納之會昌三年拜中書侍郎同中書門下平章事鉉入朝凡三歲至宰相而石猶在江陵澤潞平兼戶部尚書與李德裕不叶罷爲陝虢觀察使宣宗初擢河中節度使以御史大夫召用會昌故官輔政進尚書左僕射兼門下侍郎封博陵郡公鉉所善者鄭魯楊紹復段瓌薛蒙頗參議論時語曰鄭楊段薛炙手可熱欲得命通魯紹瓌蒙帝聞之題於展是時魯爲刑部侍郎鉉欲引以相帝不許用爲河南尹它日帝語鉉曰魯去矣事由卿否鉉惶懼謝罪久之出爲淮南節度使帝餞太液亭賜詩寵之時宣州軍亂逐觀察使鄭薰鉉出兵討擊詔兼宣歙池觀察使既平加檢校司空罷兼使居九年條教一下無復改民以順賴咸通初徙山南東道荆南二鎮封魏國公龐勛叛自桂管北還所過剽略鉉聞大募兵屯江湘邀歸路賊懼更踰嶺自准而北朝廷壯其忠卒官下

子沆字內融累遷中書舍人韋保衡逐于琮沆亦貶循州司戶參軍僖宗立召爲永州刺史復拜舍人進禮部吏部二侍郎乾符五年以戶部侍郎同中書門下平章事昕旦告麻大霧塞廷中百僚就班修慶大

風雨雹時謂不祥俄改中書侍郎兼工部尚書時王景崇進兼中書令讓其兄景儒求易定節度沆謂魏博盧龍且相援執不可盧攜專政而黃巢勢衰盛沆每建裁遏多爲攜沮抑賊陷京師匿張直方第遇害元略弟元受元式元儒皆舉進士第

元受以高陸尉直史館元和時于阜譽爲河北行營糧料使元受從之督供饋阜譽得罪元受遂死續表元式始署帥府僚佐累官湖南觀察使會昌中澤潞用兵遷河中拜河東義成節度使宣宗初以刑部尚書判度支拜門下侍郎同中書門下平章事進兼戶部尚書以疾罷卒贈司空諡曰莊大中時又有宰相崔龜從字玄告初舉進士復以賢良方正拔萃三中其科拜右拾遺太和初遷太常博士最明禮家沿革問不虛酬定敬宗廟室祝辭皇帝不可云孝弟九宮皆列星不容爲大祠大臣薨不於計日輟朝乃在數日外因引貞觀時任瓌卒有司對仗奏太宗責其不知禮岑文本歿是夕罷警嚴張公謹亡哭不避辰日故閔悼之切不宜過時又言三品以上官非經任將相密近不宜輟朝詔皆可其議九宮遂爲中祠再遷至司勳郎中知制誥真拜中書舍人歷戶部侍郎大中四年以中書侍郎同中書門下平章事再歲罷爲宣武軍節度使數徙鎮卒

韋綬字子章京兆萬年人有至性然好不經喪父鑿臂血寫浮圖書建中末爲長安尉朱泚亂羸服走奉

天拜華陰令佐襄陽于頓府數譏謔刺頓橫恣頓不能容薦諸朝三遷職方郎中穆宗爲太子綬入侍讀遷諫議大夫太子書依字輒去人曰上以此可天下事烏得全書耶綬白之帝喜卽賜綬錦綵方太子幼綬數爲俚言以悅太子它日侍太子爲帝道之帝怒曰綬當以經義輔導太子而反語此朕何賴焉外遷虔州刺史穆宗立召爲尙書右丞集賢院學士出入禁中怙寵甚建白帝誕日百官先詣光順門賀皇太后然後上皇帝千萬歲壽詔可久之宰相奏古無生日稱賀者綬議格時大臣論啟或未決綬居中助可否九月九日宴羣臣曲江綬請集賢學士得別會帝一順聽進位禮部尙書帝問所以振災邀福者對曰宋景公以善言退法星三舍漢文除祕祝勅有司祭而不祈此二君皆受自至之福書美前史如失德以却災媚神以丐助神而有知且因以譴也時帝不德故託諷焉俄以檢校戶部尙書爲山南西道節度使入辭請門戟十二以行又乞賜錢二百萬官子元弼太常丞帝以舊恩許之綬羞而貪不能事軍政綱維亂弛卒贈尙書右僕射帝遣中人弔其家有司諛通醜故吏以爲言改謬醜不報罷

唐書卷一百六十

唐書卷一百六十考證

呂渭傳中書省有古柳建中未枯死德宗自梁還復榮茂人以爲瑞渭令貢土賦之帝聞不以爲善○臣

西按舊書云上聞而嘉之與新書異

唐書卷一百六十考證

唐書卷一百六十一

宋 端 明 殿 學 士 宋 祁 撰

列傳第八十六

張趙李鄭徐王馮庾

張薦字孝舉深州陸澤人祖鸞字文成早惠絕倫為兒時夢紫文大鳥五色成文止其廷大父曰吾聞五色赤文鳳也紫文鸞也若壯殆以文章瑞朝廷乎遂命以名調露初登進士第考功員外郎鸞味道見所對稱天下無雙授岐王府參軍八以制舉皆甲科再調長安尉遷鴻臚丞四參選判策為銓府最員外郎員半千數為公卿稱鸞文辭猶青銅錢萬選萬中時號鸞青錢學士證聖中天官侍郎劉奇以鸞及司馬鐘為御史性躁下儻蕩無檢罕為正人所遇姚崇尤惡之開元初御史李全交劾鸞多口語訕短時政貶嶺南刑部尚書李日知訟斥太重得內徙鸞屬文下筆輒成浮豔少理致其論著率詆訕蕪猥然大行一時晚進莫不傳記武后時中人馬仙童陷默啜問文成在否答曰近自御史貶官曰國有此人不用無能為也新羅日本使至必出金寶購其文終司門員外郎薦敏銳有文辭能為周官左氏春秋初為顏真卿歎賞大厯中浙西觀察使李涵表薦才任史官詔授左司禦率府兵曹參軍以母老辭不就喪除禮部

侍郎于邵以聞召充史館修撰兼陽翟尉真卿爲李希烈所拘遣兄子峴及家僕奏事五輩皆留內客省不得出薦上疏曰去正月中真卿奉使淮西期不先戒行無素備受命之後不宿於家親黨不遑告別介副不及陳請辱僮單騎即日載馳冒姦鋒於臨汝折元惡於許下捐軀杖義威誥羣凶遂令脅制者回慮忠勇者肆情周曾奮發於外韋清伺應於內希烈蒼黃窘迫奔固舊穴蓋真卿義風所激也真卿逮事四朝爲國元老忠直孝友羽儀王室行年八十被羸老之疾拘囚環堵之間顧眄鉤戟之下呼嗟憤恚失寢忘食不知悲翁何以堪此伏聞希烈之母鍾念幼子目不絕泣求責希烈又希烈妻祖母郭及妻妹封並逮捕京師此三人留之無益請實境上以贖真卿先降詔書分明諭告且希烈知真卿人望不敢加害既無嫌隙但因循未遣耳若歸其親愛賊亦何怪還一使哉臣又聞真卿所遣兄子峴及家僮從官奉表來者五輩皆留中其子頴等拳拳實希一見望許休澣告以安否疏奏盧杞持之不報朱泚反詭姓名伏匿城中著史遁先生傳京師平擢左拾遺詔復用杞爲刺史薦與陳京趙需等論杞姦惡傾覆不當用入對擬確德宗納之貞元元年帝親郊時更兵亂禮物殘替用薦爲太常博士參綴典儀略如舊章刑部尚書關播持節送咸安公主于回紇以薦爲判官還遷工部員外郎久之擢諫議大夫復爲史館修撰方裴延齡用事中傷俊良建白無不當帝意薦將疏其惡延齡知之因言于帝曰諫議論朝政得失史官書人君

善惡二者不可兼薦改祕書少監延齡必欲以罪斥廢之會遣使册回鶻毗伽懷信可汗使薦至回鶻還爲監吐蕃贊普死擢薦工部侍郎爲弔祭使薦占對詳辯三使絕域始兼侍御史中丞後大夫次赤嶺被病卒年六十一吐蕃傳其柩以歸順宗立問至贈禮部尚書諡曰憲薦自拾遺至侍郎凡二十年常兼史館修撰初貞元時京師旱帝避正殿減膳薦白限日以應古制及定昭德皇后廟樂遷獻懿二祖定大儀位號大臣祔廟鼓吹法莫不參裁諸儒謂博而詳所著書百餘篇子又新別有傳

孫讀字聖用幼穎解大中時第進士鄭薰辟署宣州幕府累遷禮部侍郎中和初爲吏部選牒精允調官

丙留二年詔可榜其事曹門後兼弘文館學士判院事卒
趙涓冀州人幼有文天寶時第進士被郾城尉稍歷臺省河南王縉引署副元帥府判官德宗初爲衢州刺史始永泰時禁中火近東宮代宗疑之涓以監察御史爲巡使驗治明諦迹火所來乃宦人直舍帝在東宮頗德之及治衢不爲觀察使韓滉所容奏免官帝見其名問宰相曰是豈永泰時御史乎對曰然詔拜尚書左丞既至勞之曰卿正直朕所自知乃以罪聞不信也命典吏部選從狩梁興元元年卒贈戶部尚書子博宣亦擢進士第藻翰豪邁沈於酒傲忽少檢陳許曲環辟署於府久不能堪乃誣受吳少誠金爲反間數言休咎惑衆有詔杖四十流康州時人寃之

李紆字仲舒始仁爲校書郎大厯初李季卿薦爲左補闕遷累中書舍人德宗居奉天繇禮部侍郎選爲同州刺史帝次梁紆委城趨行在擢兵部侍郎高邑伯建言享武成王廟不宜與文宣王等制從之紆性樂易喜接後進其自奉養頗華裕不爲齷齪崖檢官雖貴而游縱自如奉詔爲興元紀功述及它郊廟樂章論撰甚多進吏部侍郎年六十二卒贈禮部尙書

鄭雲逵系本滎陽父昉爲郟城尉州刺史移職民之暴警者遮道留昉誅殺六七人採訪使奇之言狀擢北海尉安祿山反縣民孫俊毆市人以應昉率衆擊殺之改登州司馬李光弼表爲武寧府判官遷沂州刺史諭降賊李浩五千人終滁州刺史雲逵爲人誕譎敢言已登進士第去客燕朔朱泚善之表爲掌書記妻以滔女泚將朝使雲逵先入奏同府蔡廷玉譖于泚奏貶爲平州參軍滔代泚將復辟雲逵爲判官廷玉與要藉官朱體微它日與泚從容言滔非長者不可付以兵雲逵數漏其語以怒滔故滔論廷玉等皆得罪死滔助田悅雲逵諫不從遂棄室自歸德宗悅擢諫議大夫帝在梁雲逵依李晟晟表以禮部侍郎爲軍司馬時時咨逮戎略元和初爲京兆尹卒弟方達悖悖結徒剽劫父欲殺之不克雲逵自効不能教恐赤臣家詔錮死黔州

徐岱字處仁蘇州嘉興人世農家子於學無所不通辯論明銳座人常屈大厯中劉晏表爲校書郎觀察

二號第一百二十四

使李栖筠欽其賢署所居爲復禮鄉名達于朝擢偃師尉禮儀使蔣鎮薦爲太常博士專掌禮事從德宗出奉天以膳部員外郎兼博士貞元初爲太子諸王侍讀遷給事中史館修撰帝以誕日歲歲詔佛老者大論麟德殿并召岱及趙需許孟容韋渠牟講說始三家若矛盾然卒而同歸于善帝大悅資子有差兩宮恩遇無比性篤慎至宮殿中語未嘗近之不談人短宗族孤孺者皆爲婚嫁然吝嗇自持家管鑰世所譏云卒贈禮部尙書

王仲舒字弘中并州祁人少客江南與梁肅楊憑游有文稱貞元中賢良方正高第拜左拾遺德宗欲相裴延齡與陽城交章言不可後入閣帝顧宰相指曰是豈王仲舒邪俄改右補闕遷禮部考功員外郎奏議詳雅省中伏其能坐累爲連州司戶參軍再徙荆南節度參謀元和初召爲吏部員外郎未幾知制誥楊憑得罪斥去無敢過其家仲舒屢存之將直憑冤貶峽州刺史母喪解服除爲婺州刺史州疫旱人徙死幾空居五年里閭增完就加金紫服徙蘇州隄松江爲路變屋瓦絕火災賦調嘗與民爲期不擾自辦穆宗立每言仲舒之文可思最宜爲誥有古風召爲中書舍人既至視同列率新進少年居不樂曰豈可復治筆研於其間哉吾久棄外周知俗病利得治之不自愧宰相聞之除江西觀察使初江西榷酒利多佗州十八民私釀歲抵死不絕穀數斛易斗酒仲舒罷酤錢九十萬吏坐失官息錢五十萬悉產不能償

仲舒焚簿書脫械不問水旱民賦不入歎曰我當減燕樂他用可乎爲出錢二十萬代之有爲佛老法興浮屠祠屋者皆驅出境卒于官年六十二贈左散騎常侍諡曰成仲舒尙義槩所居急民廢置自爲科條初若煩密久皆稱其便

馮伉魏州元城人徙貫京兆第五經宏辭調長安尉三遷膳部員外郎爲睦王等待讀李抱真卒伉持節臨弔歸之帛不受又致京師伉上表固拒於是醴泉令缺宰相高選德宗曰前使澤潞不受幣者其人清可用也遂以授伉縣多鬻猾數犯法伉爲著論蒙書十四篇大抵勸之務農進學而教以忠孝鄉授之使轉相教督居七年韋渠牟薦爲給事中皇太子諸王侍讀對殿中賜金紫服進兵部侍郎出爲同州刺史以散騎常侍召領國子祭酒者再卒年六十六贈禮部尙書

庾敬休字順之鄧州新野人祖光烈與弟光先不受安祿山僞官遁去光烈終大理少卿光先吏部侍郎父何當朱泚反又與弟倬逃山谷不臣賊官兵部郎中敬休擢進士第又中宏辭辟宣州幕府入拜右補闕起居舍人建言天子視朝宰相羣臣以次對言可傳後者承旨宰相示左右起居則載錄季送史官如故事詔可旣而執政以幾密有不可露罷之召爲翰林學士文宗將立魯王爲太子慎選師傅敬休以戶部侍郎兼魯王傅初劍南西川山南道歲征茶戶部自遣巡院主之募賈人入錢京師太和初崔元略奏

責正道主當歲以四萬緡上度支久之逗留多不至敬休始請置院補歸收度支錢乃無遺沒又言蜀道米價騰踊百姓流亡請以本道闕官職田賑貧民詔可再爲尙書左丞卒贈吏部尙書敬休夷澹多容可不飲酒食肉不邇聲色弟簡休亦至工部侍郎

唐書卷一百六十一

唐書卷一百六十一考證

徐岱傳○此傳及王仲舒傳舊書俱入文學傳

馮仇傳○舊書入儒學傳

庾敬休傳○舊書入忠義傳

唐書卷一百六十一考證

唐書卷一百六十一

宋 端 明 殿 學 士 宋 祁 撰

列傳第八十七

姚獨孤顧章段呂許薛李

姚南仲華州下邳人乾元初擢制科授太子校書遷累右補闕大厯十年獨孤皇后崩代宗悼痛詔近城為陵以朝夕臨望南仲上疏曰臣聞人臣宅於家帝王宅於國長安乃祖宗所宅其可興鑿建陵其側乎夫葬者藏也欲人之不得見也今西近宮闕南迫大道使近而可視歿而復生雖宮以待之可也如今骨肉歸土魂無不之雖欲自近了復何益且王者必據高明燭幽隱先皇所以因龍首而建望春也今起陵目前心一感傷累日不能平且匹夫向隅滿堂不樂況萬乘乎天下謂何陛下諡后以貞懿而終以褻近臣竊惑焉今國人皆曰后陵在邇陛下將日省而時望焉斯有損聖德無益先后欲寵反辱惟陛下孰計疏奏帝嘉納進五品階以酬讜言坐善宰相常哀出為海鹽令浙西觀察使韓滉表為推官擢殿中侍御史內供奉召還四遷為御史中丞改給事中陝虢觀察使拜義成節度使監軍薛盈珍恃權撓政不能逞因毀南仲於朝德宗惑之俄遣小使程務盈誣表以罪會南仲裨將曹文洽入奏知其語則晨夜追至長

樂驛及之與同舍夜殺務盈投其誣于厠爲二書一抵南仲一治南仲寃且自言殺務盈狀乃自殺驛吏以聞帝駭異南仲不自安固請入朝帝勞曰盈珍橈卿政邪曰不橈臣政臣隳陛下法耳如盈珍輩所在有之雖使羊杜復生撫百姓御三軍必不能成愷悌之化而正師律也帝默然乃授尙書右僕射貞元十九年卒年七十五贈太子太保諡曰貞初崔位馬少微者俱在南仲幕府盈珍之譖也出位爲遂州別駕東川觀察使王叔邕希旨奏位殺之復出少微補外使宦官護送度江投之水云

獨孤及字至之河南洛陽人爲兒時讀孝經父試之曰兒志何語對曰立身行道揚名於後世宗黨奇之天寶末以道舉高第補華陰尉辟江淮都統李峘府掌書記代宗以左拾遺召既至上疏陳政曰陛下屢發德音使左右侍臣得直言極諫壬辰詔書召裴冕等十有三人集賢殿待制以備詢問此五帝盛德也然頃者陛下雖容其直而不錄其言所上封皆寢不報有容下之名無聽諫之實遂使諫者稍稍自鉗口飽食相招爲祿仕此忠鯁之人所以竊歎而臣亦恥之十室之邑必有忠信況朝廷之大卿大夫之衆陛下選授之精歟假令不能如文王之多士其中豈不有温故知新可懋陳政要而億則屢中者陛下議政之際曾不採其一說堯之疇咨禹之昌言豈若是邪昔堯設謗木於五達之衢孔子曰以能問於不能以多問於寡然則多聞闕疑不耻下問聖人之心也願陛下以堯孔子爲心日降清問其不可者罷之可者

議於朝與執事者共之使知之必言言之必行之必公則君臣無私論朝廷無私政陛下以此辨可否於獻替而建太平之階可也師興不息十年矣人之生產空於杼軸擁兵者第館巨街陌奴婢厭酒肉而貧人羸餓就役剝膚及隴長安城中白晝椎剽吏不敢詰官亂職廢將墮卒暴百揆隳刺如沸粥紛麻民不敢訴於有司有司不敢聞陛下茹毒飲痛窮而無告今其心踴躍獨恃於麥麥不登則易子餓骨矣陛下不以此時厲精更始思所以救之之術忍令宗廟有累卵之危萬姓悼心失圖臣實懼焉去年十一月丁巳夜星隕如雨昨清明霜降三月苦熱錯繆顛倒沓莫大焉此下陵上替怨讟之氣取之也天意丁寧譴戒以警陛下宜反躬罪己旁求賢良者而師友之黜貪佞不肖者下哀痛之詔去天下疾苦廢無用之官罷不急之費禁止暴兵節用愛人兢兢乾乾以徵福于上下必能使天神應反妖災爲和氣矣又言減江淮山南諸道兵以贖國用陛下初不以臣言爲愚然許卽施行及今未有沛然之詔臣竊遲之今天下唯朔方隴西有吐蕃僕固之虞邠涇鳳翔兵足以當之矣自此而往東洎海南至番禺西盡巴蜀無鼠竊之盜而兵不爲解傾天下之貨竭天下之穀以給不用之軍爲無端之費臣不知其故假令居安思危以備不虞自可阨害之地俾置屯禦悉休其餘以糧儲扉屨之資充疲人貢賦歲可以減國租半陛下豈遲疑於改作逡巡於舊貫使大議有所壅而率土之患日甚一日是益其弊而厚其疾也夫療癰者必決

之使潰今兵之爲患猶龐也不以漸戢之其害滋大而圖之必力倍而功寡豈易不俟終日之義邪俄改太常博士或言景皇帝不宜爲太祖及據禮條上諡呂誣盧弈郭知運等無浮美無隱惡得褒貶之正遷禮部員外郎歷濠舒二州刺史歲饑早鄰郡庸亡什四以上舒人獨安以治課加檢校司封郎中賜金紫徙常州甘露降其廷卒年五十三諡曰憲及喜鑿拔後進如梁肅高參崔元翰陳京唐次齊抗皆師事之性孝友其爲文彰明善惡長於論議晚嗜琴有眼疾不肯治欲聽之專也子朗郁

朗字用晦由處士辟署江西宣歙浙東三府元和中擢右拾遺建言宜用觀察使領本道鹽鐵罷場監管權吏除百姓之患不聽盜殺武元衡朗請貶京兆尹誅捕賊吏因勸罷兵忤憲宗意貶興元戶曹參軍久乃拜殿中侍御史兼史館修撰坐與李景儉飲景儉使酒慢宰相出爲韶州刺史召還再遷諫議大夫敬宗初宦官馮元胤發雞干下朗請誅首惡以正常法王播賂權近還判鹽鐵朗連疏論執遷御史中丞故事選御史皆中丞自請是時崔晃鄭居中繇宰相力得監察御史朗拒不納晃居中卒改他官侍御史李道樞醉謁朗劾不虔下除司議郎會殿中王源植貶官朗直其枉書五上不報即自劾執法不稱願罷去帝遣中人尉諭不許文宗初遷工部侍郎出爲福建觀察使創發背卒贈右散騎常侍

郁字古風始生而孤與朗育於伯父汜擢進士第最爲權德輿所稱以女妻之元和初舉制科高等拜右拾遺俄兼史館修撰進右補闕吐突承璀討王承宗郁執不可挺議顛固號稱職擢翰林學士德輿輔政以嫌去內職拜考功員外郎仍兼修撰憲宗歎德輿乃有佳婿詔宰相高選世族故杜悰尙岐陽公主然帝猶謂不如德輿之得郁也俄知制誥德輿去位還爲學士九年以疾辭禁近徙祕書少監屏居鄆卒年四十贈絳州刺史郁有雅名帝遇之厚議者亦謂當宰相共以早世惜之

子庠字賢府喪父始十歲有至性聞呼父官及用客來輒號慟幾絕後舉進士仕至尙書丞

顧少連字夷仲蘇州吳人舉進士尤爲禮部侍郎薛邕所器擢上第以拔萃補登封主簿邑有虎孽民患之少連命塞陷窳獨移文嶽神虎不爲害御史大夫于頔薦爲監察御史德宗幸奉天徒步詣謁授水部員外郎翰林學士再遷中書舍人閱十年以謹密稱嘗請徙先兆于洛帝重違去詔遣其子往且命中人護藏葬役歷吏部侍郎裴延齡方橫無敢忤者嘗與少連會田鎬第酒酷少連挺笏曰段秀實劾擊賊臣今吾笏將擊姦臣奮且前元友直在坐歡解之改京兆尹政尙寬簡不爲灼灼名先是京畿租賦薄厚不能一少連以法均之遷吏部尙書封本縣男徙兵部爲東都留守表禁苑及汝閑田募耕以便民閱武力利鎧仗號良吏卒年六十二贈尙書右僕射諡曰敬始少連攜少子師閔奔行在有詔同止翰林院車駕還授同州參軍

韋夏卿字雲客京兆萬年人少邃於學善文辭大厯中與弟正卿同舉賢良方正皆策高等授高陵主簿累遷刑部員外郎時仍歲旱蝗詔以郎官宰畿甸授奉天令課第一改長安令轉吏部員外郎郎中擢給事中出爲常蘇二州刺史徐州節度使張建封疾甚詔夏卿爲徐泗行軍司馬且代之未至而建封卒徐軍立其子愔爲留後召夏卿爲吏部侍郎時從弟執誼在翰林嘗受人金有所干請密以金內夏卿懷中夏卿毀懷不受曰吾與爾賴先人遺德致位及此顧當是哉執誼大慙轉京兆尹太子賓客檢校工部尚書爲東都留守辭疾改太子少保卒年六十四贈尚書左僕射諡曰獻夏卿性通簡好古有遠韻談說多聞晚歲將罷歸署其居曰大隱洞與齊映穆贊贊弟員友善雖同游終年不見其喜愠撫孤姪恩踰己子爲政務通理不甚作條教所辟士如路隋張賈李景儉等至宰相達官故世稱知人

正卿子瓘字茂弘及進士第仕累中書舍人與李德裕善德裕任宰相罕接士唯瓘往請無間也李宗閔惡之德裕罷貶爲明州長史會昌末累遷楚州刺史終桂管觀察使

段平仲字秉庸本武威人隋民部尚書達六世孫擢進士第杜佑李復之節度淮南連表掌書記擢監察御史磊落有氣節嗜酒敢言是時德宗春秋高躬自聽斷天下事有所壅隔羣臣畏帝苛察無敢言平仲常曰上聰明神武但臣下畏怯自爲循默爾使我一日得召見宜大有開納會京師旱詔擇御史郎官開

倉賑恤平仲與考功員外郎陳歸被選同得對粗陳賑恤事帝察其意有所畜以歸在側未言事訖平仲方獨進帝乃并留歸正色問之雜以它語平仲錯愕不得言乃謬稱名帝怒叱去之蒼黃向幄後歸趨降招之乃得去由是坐廢七年然名由此顯元和初爲諫議大夫憲宗使吐突承璀討鎮州亟疏爭不可及遭無功又請斬之再遷尚書右丞朝廷有得失未嘗不論奏世推其敢直云終太子左庶子

贊曰君有常尊臣有定卑自然之勢也然臣不自通於上君不降而逮諸下則治不得成而功不彰返是而天下之務繁焉幾矣德宗察察欲折伏臣下自爲聰明而治愈疏段平仲一忤上蒼惶失對而猶以取名何哉下知所職而上喪其所以爲上也故聖王屈己從諫君臣兩得其美知道之本歟

呂元膺字景夫鄆州東平人姿儀瓌秀有器識始游京師謁故宰相齊映映嘆曰吾不及識婁郝殆斯人類乎策賢良高第調安邑尉辟長春宮判官李懷光亂河中輒解去論惟明節度渭北表佐其府惟明卒王棲曜代之德宗敕棲曜留元膺自佐入拜殿中侍御史歷右司員外郎出爲蘄州刺史嘗錄囚囚或白父母在明日歲旦不得省爲恨因泣元膺惻然悉釋械歸之而戒還期吏白不可答曰吾以信待人人豈我違如期而至自是羣盜感愧悉避境去元和中累擢給事中俄爲同州刺史既謝帝遠問政事所對詳詣明日謂宰相曰元膺直氣讜言宜留左右奈何出之李藩裴洎謝因言陛下及此乃宗社無疆之休臣

等昧死請留元膺給事左右未幾兼皇太子侍讀進御史中丞拜鄂岳觀察使嘗夜登城守者不許左右曰中丞也對曰夜不可辨乃還明日擢守者為大將入拜尚書左丞度支使潘孟陽太府卿王遂交相惡乃除孟陽散騎常侍遂鄧州刺史詔辭無所輕重元膺上其詔請明枉直以顯寢懲江西裴堪按虔州刺史李將順受賊不覆訊而貶元膺曰觀察使奏部刺史不加覆雖當誅猶不可為天下法請遣御史按問宰相不能奪選拜東都留守故事留守賜旗甲至元膺不給或上言用兵討淮西東都近賊損其儀沮威望請比華汝壽三州帝不聽并三州罷之留守不賜旗甲自此始都有李師道留邸兵與山棚謀竊發事覺元膺禽破之始盜發都人震恐守兵弱不足恃元膺坐城門指縱部分意氣閑舒人賴以安東畿西南通鄧虢川谷曠深多麋鹿人業射獵而不事農遷徙無常皆趨悍善鬪號曰山棚權德輿居守將羈縻之未克至是元膺募為山河子弟使衛宮城詔可改河中節度使時方鎮多姑息獨元膺秉正自將監軍及中人往來者無不嚴憚入拜吏部侍郎正色立朝有台宰望處事裁宜人服其有體以疾改太子賓客居官始終無訾缺卒年七十二贈吏部尚書

許孟容字公範京兆長安人擢進士異等又第明經調校書郎辟武靈張建封府李納以兵拒境建封遣使諭止前後三輩往皆不聽乃使孟容見納數引逆順納即悔謝為罷兵表為濠州刺史德宗知其能召

一一號第一三十九

拜禮部員外郎公主子求補崇文生者孟容固謂不可主訴之帝問狀以著令對帝嘉其守擢郎中累遷給事中京兆上言好時風雹害稼帝遣宦人覆視不實奪尹以下俸孟容曰府縣上事不實罪應罰然陛下遣宦者覆視紊綱紀宜更擇御史一人參驗乃可不聽浙東觀察使裴蕭諉判官齊總暴斂以厚獻厭天子所欲會肅卒帝擢總自大理評事兼監察御史為衢州刺史衢大州也孟容還制曰方用兵處有不及待次而擢者今衢不他虞總無功越進超授羣議謂何且總本判官今詔書乃言權知留後攝都團練副使初無制授尤不見其可假令總有可錄宜暴課最解中外之惑會補闕王武陵等亦執爭於是詔中停帝召謂曰使百執事皆如卿朕何憂邪自袁高爭盧杞後凡十八年門下無議可否者至孟容數論駁四方知天子開納多士浩然想見其風貞元十九年夏大早上疏言陛下齋居損膳具牲玉走羣望而天意未答豈豐歉有定陰陽適然乎竊惟天人交感之際繫教令順民與否今戶部錢非度支歲計本備緩急若取一百萬緡代京兆一歲賦則京圻無流亡振災為福又應省察流移征防當還未還役作禁錮當釋未釋負逋饋送當免免之沉滯鬱抑當伸伸之以順人奉天若是而神弗祐歲弗稔未之聞也先是為裴延齡李齊運流斥者雖十年弗內移故孟容因早及之帝始不悅改太常少卿元和初再遷尚書右丞京兆尹神策軍自興元後日驕恣府縣不能制軍吏李昱貸富人錢八百萬三歲不肯歸孟容遣吏捕詣與

之期使償曰不如期且死一軍盡驚訴於朝憲宗詔以昱付軍治之再遣使皆不聽奏曰不奉詔臣當誅然臣職司輦轂當爲陛下抑豪彊錢未盡輸昱不可得帝嘉其守正許之京師豪右大震累遷吏部侍郎盜殺武元衡孟容白宰相曰漢有一汲黯姦臣寢謀今朝廷無有過失而狂賊敢爾尙謂國有人乎願白天子起裴中丞輔政使主兵柄索賊黨罪人得矣後數日果相度俄以尙書左丞宣慰汴宋陳許河陽行營拜東都留守卒年七十六贈太子少保諡曰憲孟容方勁有禮學每所折衷咸得其正好提掖士天下清議上之

弟季同始署西川章阜府判官劉闢反棄妻子歸拜監察御史歷長安令再遷兵部郎中孟容爲禮部侍郎徙季同京兆少尹時京兆尹元義方出爲郵坊觀察使奏劾宰相李絳與季同舉進士爲同年才數月輒徙帝以問絳絳曰進士明經歲大抵百人吏部得官至千人私謂爲同年本非親與舊也今季同以兄嫌徙少尹豈臣所助邪且忠臣事君不以私害公設有才雖親舊當白用避嫌不用乃臣下身謀非天子用人意帝然之終宣歙觀察使

薛存誠字資明河中寶鼎人中進士第擢累監察御史元和初討劉闢郵傳事叢詔以中人爲館驛使存誠以爲害體甚奏罷之轉殿中侍御史累遷給事中瓊林庫廣籍工徒存誠曰此姦人驛名以避征役不

可許又神策軍與咸陽尉袁儋不平誣奏之儋被罰二敕皆執不下憲宗悅遣使勞之拜御史中丞浮屠鑿虛者自貞元中關通賂遺倚官豎爲姦會坐于頔杜黃裳家事逮捕下獄存誠窮劾之得贓數十萬當以大辟權近更保救於帝有詔釋之存誠不聽明日詔使詣臺諭曰朕須此囚面詰非赦也存誠奏曰獄已具陛下必欲召赦之請先殺臣乃可不然臣不敢奉詔鑿虛卒抵死江西監軍高重昌妄劾信州刺史李位謀反追付仗內詰狀存誠一日三表請付位御史臺及按果無實未幾復爲給事中會御史中丞闕帝謂宰相曰持憲無易存誠者乃復命之會暴卒帝悼惜贈刑部侍郎存誠性和易於人無所不容及當官毅然不可奪子廷老

廷老字商叟及進士第讜正有父風寶厓中爲右拾遺敬宗政日僻嘗與舒元褒李漢入閣論奏曰比除拜不由宰司擬進恐綱紀寢壞姦邪放肆帝厲語曰更論何事元褒曰宮中興作太甚帝色變曰興作何所元褒不能對廷老曰臣等以諫爲職有聞卽應論奏然見外輦材瓦絕多知有所營帝曰已諭時造清思院殿中用銅鑑三千薄金十萬餅故廷老等懇言之尋加史館脩撰鄭注用事嶺南節度使鄭權附之悉盜公庫寶貨輸注家爲謝廷老表按權罪由是中人切齒又論李逢吉黨張權輿程昔範不宜居諫爭官逢吉怒會廷老告滿百日出爲臨晉令文宗立召爲殿中侍御史李讓夷數薦之拜翰林學士日酣飲

不持檢操帝不悅并讓夷罷之開成三年遷給事中在公卿間侃侃不干虛譽推爲正人卒贈刑部侍郎子保遜第進士擢累給事中保遜子昭緯乾寧中至禮部侍郎性輕率坐事貶礪州刺史

李遜字友道魏申公發之後趙郡所謂申公房者客居荊州始署山南東道掌書記累遷濠州刺史初濠州兵謀殺其將楊騰騰走揚州因滅騰家曹亡剽劫遜至鑄諭利害衆釋鎧自歸觀察使旨限外浮斂遜一不應入爲虞部郎中由衢州刺史以政最擢浙東觀察使當貞元初福建軍亂前觀察使奏益兵三千屯于境以折閩衝遂爲長戍幾二十年遜署事卽停其兵入爲給事中故事天子以晦日聽政對羣臣遜奏陛下求治而下有所陳當不時上豈宜限以日如是畢歲得望天子者幾何憲宗悅從之遷戶部侍郎代嚴綬爲山南東道節度使時方討蔡析山南東道爲兩節度以唐鄧隋三州授高霞寓得專攻討而遜督襄復郢均房五州賦饋之初襄陽兵隸霞寓者多逃還後霞寓戰賊不勝言爲遜所撓帝欲按狀宰相請置不問下遷太子賓客中人誣之更貶恩王傅久乃歷京兆尹國子祭酒以檢校禮部尚書爲忠武節度使時吳元濟始平治條疏類遜召會大衆申嚴約束明諭賞罰上下皆感畏衆遂安遜於爲政抑疆植弱貧富均一所至有績可紀長慶初幽鎮繼亂遜首建誅討計不聽詔以兵萬人會行營卽日上道先諸軍至由是進檢校吏部尚書未幾徙節鳳翔過京師以疾求解爲刑部尚書卒年六十三贈尚書右僕射

諡曰貞

子方立字景業第進士裴誼奏署江西府判官有大獄論死者十餘囚方立刺審其寃悉平貸之累爲池州刺史鉤檢戶籍所以差量傷賦者皆有科品程章吏不得私常曰沈約年八十手寫簿書蓋爲此云終處州刺史

遜弟建字杓直與兄俱客荊州鄉人爭鬪不詣府而詣建平決無頗母憐其孝每字之曰痿子勸吾食吾輒飽進藥吾意其瘳貞元中補校書郎德宗思得文學者或以建聞帝問左右宰相鄭珣瑜曰臣爲吏部時當補校書者八人它皆藉貴勢以請建獨無有帝喜擢左拾遺翰林學士順宗立李師古以兵侵曹州建作詔諭還之詞不假借王叔文欲更之建不可左除太子詹事改殿中侍御史以兵部郎中知制誥宰相有竄定詔藁者亟請解職除京兆少尹會遜被讒建申治之出爲澧州刺史召拜刑部侍郎卒贈工部尚書初建爲學時家苦貧兄造知其賢爲營丐使成就之故遜建皆舉進士後雖通顯未嘗置垣屋以清儉稱

建子訥字敦止及進士第遷累中書舍人爲浙東觀察使性疏下遇士不以禮爲下所逐貶朗州刺史召爲河南尹時久雨洛暴漲訥行水魏王堤懼漂泊疾馳去水遂大毀民慮議者薄其材初訥居與宰相楊

接收收欲市訥冗舍以廣第訥叱曰先人舊廬為權貴優笑地邪凡三為華州刺史歷兵部尚書以太子太傅卒遺命葬不請鹵簿避贈諡詔聽

唐書卷一百六十二

唐書卷一百六十二考證

獨孤及子郁始生而孤與朗育于伯父汜○臣酉按此則郁為朗之弟明矣而舊書謂郁弟朗疑誤

唐書卷一百六十二考證

唐書卷一百六十二考證

唐書卷一百六十三

宋 端 明 殿 學 士 宋 祁 撰

列傳第八十八

孔穆崔柳楊馬

孔巢父字弱翁孔子三十七世孫少力學隱徂來山永王璘稱兵江淮辟署幕府不應鏹蹟民伍璘敗知名廣德中李季卿宣撫江淮薦為左衛兵曹參軍三遷庫部員外郎出為涇原行軍司馬累拜湖南觀察使未行會普王為荆襄副元帥署行軍司馬俄而德宗狩奉天行在擢給事中為河中陝華招討使累上破賊方略帝嘉納未幾兼御史大夫為魏博宣慰使巢父辯而才及見田悅與言君臣大義利害逆順開曉其眾是時悅久不臣下皆厭亂雜然喜曰不圖今日還為王人酒中悅起自陳騎射工曰陛下見用何敵不摧巢父曰若爾不蚤自歸乃一劇賊耳悅曰能為劇賊豈不能為功臣乎巢父曰國方多虞待子而息悅謝焉數日田緒殺悅與大將邢曹俊等聽命巢父即以緒權知軍務紓其難李懷光據河中帝復令巢父宣慰罷其兵以太子太保授之懷光素服待命巢父不止眾忿曰太尉無官矣方宣詔乃謀而合害巢父并殺中人啖守盈初巢父至懷光以其使魏博而田悅死疑其謀出巢父故軍亂不肯救帝聞震悼

贈尚書左僕射諡曰忠詔具禮收葬賜其家粟帛存卹之從子幾戡

幾字君嚴擢進士第鄒滑盧羣辟爲判官羣卒攝摠留務監軍楊志謙雅自肆衆皆恐幾邀志謙至府與對榻臥起示不疑志謙嚴憚不敢動入爲侍御史累擢諫議大夫條上四事一多冗官二吏不奉法三百姓田不盡墾四山澤權酷爲州縣弊憲宗異其言中人劉希光受賕二十萬緡抵死吐突承瓘坐厚善逐爲淮南監軍太子舍人李涉知帝意投匭上言承瓘有功不可棄幾得副章不肯受面質讓之涉更因左右以聞幾劾奏涉結近倖營罔上聽有詔斥涉峽州司馬宦寵側目人爲危之幾自以適所志軒軒甚得俄兼太子侍讀改給事中江西觀察使李少和坐贓獄寢不下博陵崔易簡殺從父兄鞠狀具京兆尹左右之翻其情幾慷慨論正貶少和殺易簡奪尹三月俸再遷尚書左丞信州刺史李位好黃老道數祠禱部將韋岳告位集方士圖不軌監軍高重謙上急變捕位劾禁中幾奏刺史有罪不容繫伏內請付有司詔送御史臺幾與三司雜治無反狀岳坐誣罔誅貶位建州司馬中人愈怒故出爲華州刺史明州歲貢淡菜蚶蛤之屬幾以爲自海抵京師道路役凡四十三萬人奏罷之歷大理卿國子祭酒會嶺南節度使崔詠死帝謂裴度曰嘗論罷蚶菜者誰歟今安在是可往爲朕求之度以幾對卽拜嶺南節度使旣至免屬州逋負十八萬緡米八萬斛黃金稅歲八百兩先是屬刺史俸率三萬又不時給皆取部中白衣食幾

乃倍其俸約不得爲貪暴稍以法繩之南方鬻口爲貨掠人爲奴婢幾峻爲之禁親吏得嬰兒於道收育之幾論以死由是閭里相約不敢犯士之斥南不能北歸與有罪之後百餘族才可用之稟無告者女子爲嫁遣之蕃舶泊步有下碇稅始至有闕貨宴所餉犀琲下及僕隸幾禁絕無所求索舊制海商死者官籍其貲滿三月無妻子詣府則沒入幾以海道歲一往復苟有驗者不爲限悉推與貞元中黃洞諸蠻叛久不平容桂二管利虜掠幸有功乃請合兵討之幾固言不可帝不聽大發江湖兵會二管入討士被瘴毒死者不勝計安南乘之殺都護李象古而桂管裴行立容管陽旻皆無功憂死獨幾不邀一旦功交廣晏然大治穆宗立以吏部侍郎召改右散騎常侍還爲左丞以老自乞雅善韓愈謂曰公尙壯上三留何去之果幾曰吾豈要君者吾年一宜去吾爲左丞不能進退郎官二宜去愈曰公無留資何恃而歸曰吾負二宜去尙奚顧子言愈嗟嘆卽上疏言臣與幾同在南省數與幾相見其爲人守節清苦論議正平年七十筋力耳目未衰憂國忘家用意至到如幾輩在朝不過三數人陛下不宜苟順其求不留自助也禮大夫七十致仕若不得謝則賜之几杖安車不必七十盡許致仕今幾據禮求退陛下若不聽許亦無傷義而有貪賢之美不報以禮部尙書致仕歲致羊酒如漢徵士禮卒年七十三贈兵部尙書諡曰貞子遵孺溫裕仕爲天平節度使遵孺子緯

緯字化文少孤依諸父多與有名者游才譽蚤成擢進士第東川崔慎由表置幕府從崔鉉淮南復從慎由守河中再遷觀察判官宰相楊收薦以長安尉直弘文館遷監察御史進禮部員外郎兼集賢直學士母喪解還爲右司員外郎趙隱言其才拜翰林學士俄知制誥頻遷戶部侍郎擢御史中丞緯方雅疾惡若讐中外聞風未繩輒肅三遷吏部侍郎權要私謁至盈几一不省當路不悅改太常卿從僖宗西到蜀以刑部尚書判戶部蕭遘雅不喜坐調度不給改太子少保及帝避朱玫次陳倉惟黃門衛士數百扈乘輿詔拜緯御史大夫令趣百官至行在時羣臣露次蓋屋爲盜剽脅衣囊略盡緯謁宰相欲有所論遘與裴澈怨田令孜不欲行辭不見緯召御史曰吾等身被恩誼不辭難今詔羣臣皆不至夫與人布衣游猶緩急相卹況於君乎且泣下御史亦辭方寇敍丐衣食請辦一日費而行緯曰吾妻疾旦暮盡丈夫豈以家事後國事乎公善自謀吾行決矣往見李昌符曰詔書再至而羣臣顧未行僕大夫也不敢後願假兵護送天子所昌符具資裝送之既及行在緯策政必反建言關邑隱狹不足駐六師請幸梁州卽日去陳倉而攻兵至微緯言幾不脫進拜兵部侍郎同中書門下平章事政平從帝還領諸道鹽鐵轉運使累遷尚書左僕射賜號持危啟運保乂功臣鐵券恕十死又賜天興良田善和里第各一區兼京畿營田使昭宗卽位進司空以太學焚殘乃兼國子祭酒完治之加司徒封魯國公帝將郊見中尉樞密使索宰相朝

二號第一一四十一

服有司白中人無衣冠助祭事中尉怒責禮官必得緯言中人不朝服國典也陛下欲假借之則請以所兼官爲之服諫官固執帝召謂曰方舉大禮爲我容之進兼太保時天武都頭李順節疏暴人也以浙西節度使兼平章事臺史白已謝當班見百官緯判止之明日順節盛服至則無班怏怏去他日見緯以爲言緯曰固疑公見望也且百辟卿士天子廷臣班見宰相以宰相爲之長公提天武健兒據堂受禮安乎必欲用之去都頭乃可順節慙縮不敢言張溶將伐太原帝不決以問緯緯助溶請既溶敗坐傅會出爲荆南節度使俄貶均州刺史二人皆密結朱全忠爲請詔聽所便乃屏居華陰李茂貞入殺韋昭度帝惡大臣朋比與藩臣交更召緯入朝再擢吏部尚書以司空門下侍郎復輔政使者敦勸力疾到京師見帝嗚咽流涕自陳衰疾不任事乞歸田里帝動容詔使者送緯至堂視事會天子出次石門從至莎城以病還都家人召醫視緯曰天下方亂何久求生不肯服藥卒贈太尉
戡字勝始進士及第補修武尉以大理評事佐昭義李長榮節度府長榮死盧從史自別將代之留署掌書記從史稍得志益驕與王承宗田緒陰相結欲久連兵以固其位戡始陰爭不從則於會肆言以折之從史始若受其言後偃蹇不軌戡遂以疾歸洛陽未幾李吉甫鎮揚州表置幕府戡未應從史曰是欲舍我而從人邪卽誣以事奏三上詔以衛尉丞分司東都自貞元後帥鎮劾奏僚佐不驗輒斥至是給事中

呂元膺執不可憲宗遣使諭曰朕非不知戡行用之矣未幾卒年五十七從史敗追贈司勳員外郎
戢字方舉初父死難詔與一子官補修武尉不受以讓其兄戡擢明經書判高等爲校書郎陽翟尉累遷
殿中侍御史分司東都昭義判官徐攻故嘗助盧從史爲跋扈者從史敗孟元陽代欲復用之戢移書昭
義前繫攻乃上列其狀帝怒流攻播州轉侍御史庫部員外郎始朱泚以彭偃爲中書舍人偃子充符得
不死辟鄜坊府或薦其能召還京師戢謂京兆尹裴武曰泚所下詔令皆偃爲之悖逆子不烏竄獸伏乃
干譽求進乎子盍效季孫行父逐莒僕以勉事君者武卽逐出充符拜京兆少尹再遷爲湖南觀察使召
授右散騎常侍京兆尹歲旱文宗憂甚戢躬祠曲江池一夕大澍帝悅詔兼御史大夫卒贈工部尚書子

溫業

溫業字遜志擢進士第大中時爲吏部侍郎求外遷宰相白敏中顧同列曰吾等可少警孔吏部不樂居

朝矣後爲太子賓客

穆寧懷州河內人父元休有名開元間獻書天子擢偃師丞世以儒聞寧剛正氣節自任以明經調鹽山
尉安祿山反署劉道玄爲景城守寧募兵斬之檄州縣并力捍賊史思明略境郡守召寧攝東光令禦之
賊遣使誘寧寧斬以徇郡守恐怒賊令致死卽奪其兵罷所攝始寧過平原見顏真卿嘗商賊必反及是

聞真卿拒祿山卽遣真卿書曰夫子爲衛君乎真卿喜署寧河北採訪使寧以息屬其母弟曰苟不乏
嗣足矣卽馳謁真卿曰先人有嗣矣我可從公死旣而賊攻平原寧勸固守真卿不從夜亡過河見肅宗
行在帝問狀真卿對不用穆寧言故至此帝異之馳驛召寧將以諫議大夫任之會真卿以直忤旨寧亦
罷上元初爲殿中侍御史佐鹽鐵轉運住埇橋李光弼屯徐州餉不至檄取資糧寧不與光弼怒召寧欲
殺之或勸寧去寧曰避之失守亂自我始何所逃罪乎卽往見光弼光弼曰吾師衆數萬爲天子討賊食
乏則人散君閉廩不救欲潰吾兵邪答曰命寧主糧者敕也公可以檄取乎今公求糧而寧專饋寧有求
兵而公亦專與乎光弼執其手謝曰吾固知不可聊與君議耳時重其能守官累遷鄂岳沔都團練及租
庸鹽鐵轉運使當是時河漕不通自漢河徑商山以入京師淮西節度使李忠臣不奉法設戍邇以征商
賈又縱兵剽行人道路幾絕與寧夾淮爲治憚寧威掠劫爲衰漕賈得通坐杖死沔州別駕貶平集尉大
厯初起爲監察御史二遷檢校祕書少監兼和州刺史治有狀後刺史疾之以天寶舊版校見戶妄劾寧
多逋亡貶泉州司戶參軍事子質訴其枉三年始得通詔御史覆視實增戶數倍召入拜太子右諭德寧
性不能事權右毅然寡合執政者惡之雖直其誣猶置散位寧默不樂喏曰時不我容我不時徇又可以
進乎遂移疾滿百日屢矣親友疆之輒復一朝德宗在奉天奔詣行在擢祕書少監改太子右庶子帝還

京師乃曰可以行吾志矣卽罷歸東都以祕書監致仕卒寧居家嚴事寡姊甚嘗撰家令訓諸子人一
通又戒曰君子之事親養志爲大吾志直道而已苟枉而道三牲五鼎非吾養也疾病不嘗藥時稱知命
四子贊質員嘗寧之老贊爲御史中丞質右補闕員侍御史賞監察御史皆以守道行誼顯先是韓休家
訓子姪至嚴貞元間言家法者尙韓穆二門云

贊字相明擢累侍御史分司京東陝虢觀察使盧岳妻分貲不及妾子妾訴之中丞盧侶欲重妾學贊不
聽侶與宰相竇參共誣贊受金捕送獄弟賞上寃狀詔三司覆治無之猶出爲郴州刺史參敗召爲刑部
郎中對延英擢御史中丞裴延齡判度支屬吏受賕具獄欲曲貸吏贊執不可延齡白贊深文貶饒州別
駕久之拜州刺史憲宗立進宣歙觀察使卒于官贈工部尙書

質性彊直舉賢良方正條對詳切類擢至給事中政事得失未嘗不盡言元和時鹽鐵轉運諸院擅繫囚
笞掠嚴楚人多死質奏請與州縣吏參決自是不寃後論吐突承瓘不宜爲將憲宗不悅改太子左庶子
坐與楊憑善出爲開州刺史卒

員字與直工爲文章杜亞留守東都署佐其府蚤卒兄弟皆和粹世以珍味目之贊少俗然有格爲酪質
美而多入爲酥員爲醍醐賞爲乳腐云

崔邠字處仁貝州武城人父儻三世一爨當時言治家者推其法至德初獻賦行在肅宗異其文位吏部
侍郎邠第進士復擢賢良方正授渭南尉遷補闕上疏論裴延齡姦以鯁亮知名由中書舍人再遷吏部
侍郎性溫裕沈密行己又簡儉憲宗器之裴瑄亦薦邠材可宰相會病遂不拜久乃爲太常卿知吏部尙
書銓故事太常始視事大閱四部樂都人縱觀邠自第去帽親導母輿公卿見者皆避道都人榮之以母
憂解卒于喪年六十贈吏部尙書諡曰文簡弟鄴鄒鄒鄒

鄴字廣略姿儀偉秀人望而慕之然不可狎也中進士第補集賢校書郎累遷吏部員外郎下不敢欺每
擬吏親挾格褻黜必當寒遠無留才三遷諫議大夫穆宗立荒于游畋內酣蕩昕曙不能朝鄴進曰十一
聖之功德四海之大萬國之衆其治其亂繫於陛下自山以東百城地千里昨日得之今日失之西望戎
壘距宗廟十舍百姓憔悴畜積無有願陛下親政事以幸天下帝動容慰謝遷給事中敬宗嗣位拜翰林
侍講學士旋進中書舍人謝曰陛下使臣侍講歷半歲不一問經義臣無功不足副厚恩帝慙曰朕少聞
當請益高鉞適在旁因言陛下樂善而無所咨詢天下之人不知有嚮儒意帝重咎謝咸賜錦幣鄴與高
重類六經要言爲十篇上之以便觀省遷禮部侍郎出爲虢州觀察使先是上供財乏則奪吏奉助輸歲
率八十萬鄴曰吏不能贍私安暇卹民吾不能獨治安得自封卽以府常費代之又詔賦粟輸太倉者歲

數萬石民困於輸則又輦而致之河鄆乃旁流爲大敖受粟實而注諸艘民悅忘輸之勞改鄂岳等州觀察使自蔡人叛鄂岳常苦兵江湖盜賊顯行鄆修治鎧仗造蒙衝駛追窮躡上下千里歲中悉捕平又觀察浙西遷檢校禮部尙書卒于官贈吏部尙書諡曰德鄆不藏貲有輶周給親舊爲治其昏喪居家怡然不訓子弟自化室處庫漏無步廡至霖淖則客蓋而屐以就外位治鏡以寬經月不答一人及涖鄂則嚴法峻誅一不貸或問其故曰陝土瘠而民勞吾撫之不暇猶恐其擾鄂土沃民剽雜以夷俗非用威莫能治政所以貴知變者也聞者服焉五子瑤瑰瑾珮瑤瑤任禮部侍郎浙西鄂岳觀察使瑾禮部侍郎湖南觀察使瑰珮俱達官

鄆擢進士累遷至左金吾衛大將軍暴卒以韓約代之不閱旬李訓亂約死於難世謂鄆之亡崔氏積善報也贈禮部尙書

鄆及進士第補渭南尉累除刑部郎中出副杜元穎西川節度府召入爲工部侍郎集賢殿學士再遷吏部侍郎由宣歙觀察使入爲太常卿文宗未擢同中書門下平章事改中書侍郎罷爲劍南西川節度使宣宗初以檢校尙書右僕射同平章事節度淮南卒于軍崔氏四世總麻同爨兄弟六人至三品邠鄆凡爲禮部五吏部再唐興無有也居光德里構便齋宣宗聞而歎曰鄆一門孝友可爲士族法因題曰德

星堂後京兆民卽其里爲德星社云

柳公綽字寬京兆華原人始生三日伯父子華曰興吾門者此兒也因小字起之幼孝友性質嚴重起居皆有禮法屬文典正不讀非聖書舉賢良方正直言極諫補校書郎閏一年再登其科授渭南尉歲歉饑其家雖給而每飯不過一器歲豐乃復或問之答曰四方病饑獨能飽乎累遷開州刺史地接夷落寇常逼其城吏曰兵力不能制願以右職署渠帥公綽曰若同惡邪何可撓法立誅之寇亦引去遷侍御史吏部員外郎時武元衡節度劍南與裴度俱爲判官尤相引重召爲吏部郎中憲宗喜武功且數出游畋公綽奏太醫箴以諷曰天布寒暑不私於人品類既一高卑以均人謹好愛能保其身清靜無瑕輝光以新寒暑滿天地浹肌膚於外好愛在耳目誘心知於內端潔爲隄奔射猶敗氣行無間隙不在大謂天高矣氛蒙晦之謂地厚矣橫流潰之飲食資身過則生患衣服稱德侈則生慢唯過與侈心必隨之氣與心流疾乃伺之畋遊恣樂流情蕩志馳騁勞形叱吒傷氣不養其外前脩所忌人乘氣生嗜慾以萌氣離有患氣完則成巧必喪真智實誘情醫之上者理於未然患居慮後防處事先心靜樂行體和道全克施萬物以享億年聖人在上各有攸處臣司太醫敢告諸御天子高其才遣使謂曰卿言氣行無間隙不在大愛朕深者當置之坐隅踰月拜御史中丞公綽本與裴垍善李吉甫復當國出爲湖南觀察使以地卑溼不

可迎養求分司東都不聽後徙鄂岳觀察使時方討吳元濟詔發鄂岳卒五千隸安州刺史李聽公綽曰朝廷謂吾儒生不知兵邪即請自行許之引兵度江抵安州聽以軍禮迎謁公綽謂曰公所以屬鞬負弩豈非兵事邪若褫戎容則兩郡守耳何所統壹哉以公世將曉兵吾且欲署職以兵法從事聽曰唯命即以都知兵馬使中軍先鋒行營都虞候三牒授之選兵六千屬焉戒諸校曰行營事一決都將聽被用畏威遂盡力當時服其知權軍出公綽數省問其家疾病生死厚給之婦人敖蕩者沉之江軍中感服曰中丞爲我知家事敢不死戰故鄂軍每戰輒克元和十一年爲李道古代還除給事中李師道平遣宣諭鄆州復命拜京兆尹方赴府有神策校乘馬不避者即時榜死帝怒其專殺公綽曰此非獨試臣乃輕陛下法帝曰既死不以聞可乎公綽曰臣不當奏在市死職金吾在坊死職左右巡使帝乃解以母喪去官服除爲刑部侍郎領鹽鐵轉運使轉兵部兼御史大夫長慶元年復爲京兆尹時幽鎮用兵補置諸將使驛係道公綽奏曰比館遞置驛置多闕敕使衣緋紫者所乘至三四十騎黃綠者不下十數吏不得視券隨口輒供驛馬盡乃掠奪民馬怨嗟驚擾行李殆絕請著定限以息其弊有詔中書條檢定數由是吏得紆罪宦官共惡疾之改吏部侍郎遷御史大夫韓弘病自河中還詔百官問疾弘遣子辭不能見公綽謂曰上使百司省候是謂異禮宜力疾以見公卿安可臥令子姓傳言邪弘懼挾扶以出改禮部尚書以祖

諱換左丞俄檢校戶部尚書山南東道節度使行部至鄧縣吏有納賄舞文二人同繫獄縣令以公綽素持法謂必殺貪者公綽判曰賊吏犯法法在姦吏壞法法亡誅舞文者其廢馬害圍人公綽殺之或言良馬可愛曰安有良馬而害人乎寶曆元年就遷檢校左僕射牛僧孺罷政事爲武昌節度使公綽具軍容伏謁左右諫止之答曰奇章始去台宰方鎮重宰相所以尊朝廷也有道士獻丹藥問所從來曰自蘭門時朱克融方叛遠曰惜哉藥自賊境來雖驗何益卽棄藥而逐道士入爲刑部尚書俄拜邠寧節度使先是神策諸鎮列屯部中不聽本道節制故虜得窺間公綽論所宜因詔屯營緩急悉受節度復爲刑部尚書京兆獄有姑鞭婦至死者府欲殺之公綽曰尊歐卑非闕也且在以妻而戮其母不順遂減論大和四年爲河東節度遭歲惡擢節用度輟宴飲食與士卒鈞北虜遣梅祿將軍李暢以馬萬匹來市所過皆厚勞飭兵以防襲奪至太原公綽獨使牙將單騎勞問待以至意關牙門令譯官引謁宴不加常暢德之出涕徐驅道中不妄馳獵陜北有沙陁部勇武喜鬪爲九姓六州所畏公綽召其酋朱邪執宜治廢柵十一募兵三千留屯塞上其妻母來太原者令夫人飲食問遺之沙陁感恩故悉力保鄣以病乞代授兵部尚書不任朝請忽顧左右召故吏韋長衆謂屬諉以家事及長至乃曰爲我白宰相徐州專殺李聽親吏非用高瑀不能安因瞑目不復語後二日卒年六十八贈太子太保諡曰元公綽居喪毀墓三年不澡

沐事後母薛謹甚雖姻屬不知非薛所生外兄薛宮早卒爲育其女嫁之嘗曰吾莅官未嘗以私喜怒加於人子孫其昌乎與錢徵蔣父杜元穎薛存誠善取士如許康佐鄭朗盧簡辭崔瑛夏侯孜李拭韋長皆知名顯貴云

子仲郢字諭蒙母韓卽皇女也嘗訓子故仲郢幼嗜學嘗和熊膽丸使夜咀嚼以助勤長工文著尙書二十四司箴爲韓愈咨賞元和末及進士第爲校書郎牛僧孺辟武昌幕府有父風矩僧孺歎曰非積習名教安及此邪入爲監察御史遷侍御史有禁卒誣里人斫父墓栢射殺之吏以專殺論而中尉護免其死右補闕蔣係爭不省仲郢監罰執曰賊不死是亂典刑有詔御史蕭傑監之傑復爭遂獨詔京兆杖之不監朝廷嘉其守會昌初累轉吏部郎中時詔減冗長者仲郢條簡浹日損千二百五十員議者厭伏遷左諫議大夫武宗延方士築望仙臺累諫諄切帝遣中人愧諭御史崔元藻以覆按吳湘獄得罪仲郢切諫宰相李德裕不爲嫌奏拜京兆尹置權量於東西市使貿易用之禁私製者北司吏入粟違約仲郢殺而尸之自是人無敢犯政號嚴明會廢浮屠法盡壞銅象爲錢仲郢爲鑄錢使吏請以字識錢者不答旣淮南鑄會昌字久之僧反取爲鐘鉞云中書舍人紇干泉訴甥劉詡歐其母詡爲禁軍校仲郢不待奏卽捕取之死杖下宦官以爲言改右散騎常侍知吏部銓德裕頗抑進士科仲郢無所徇是時以進士選無

受惡官者又嘗調者持闕簿令自閱卽擬唱吏無能爲姦宣宗初德裕罷政事坐所厚善出爲鄆州刺史周墀鎮滑而鄆爲屬郡高其績及入相薦授河南尹召拜戶部侍郎墀罷宅宰相惡仲郢左遷秘書監數月復出河南尹以寬惠爲政或言不類京兆時答曰鞶轂之下先彈壓郡邑之治本惠養烏可類乎擢劍南東川節度使大吏邊章簡挾勢肆貪前帥不能制仲郢因事殺之官下肅然居五年召爲吏部侍郎俄改兵部領鹽鐵轉運使有劉習者以藥術進詔署鹽官仲郢以爲醫有本色官若委錢穀名分不正帝悟乃賜織還大中十二年辭疾以刑部尙書罷使轉戶部封河東縣男爲山南西道節度使南鄭令權奔以罪仲郢杖之六日死貶雷州刺史頃之以太子賓客分司東都起爲虢州刺史以檢校尙書左僕射東都留守會盜發父墓棄官歸華原徙華州刺史不拜咸通五年爲天平節度使初仲郢爲諫議大夫後每遷必烏集升平第庭樹戟架皆滿五日乃散及是不復集卒於鎮仲郢方嚴尙氣義事親甚謹李德裕貶死家無祿不自振及領鹽鐵遂取其兄子從質爲推官知蘇州院宰相令狐綯持不可乃移書開諭綯感悟從之每私居內齋束帶正色服用簡素父子更九鎮五爲京兆再爲河南皆不奏瑞不度浮屠急於摘貪吏濟單弱每旱潦必貸匱蠲負里無逋家衣冠孤女不能自歸者斥稟爲婚嫁在朝非慶弔不至宰相第其迹略相同家有書萬卷所藏必三本上者貯庫其副常所閱下者幼學焉仲郢嘗手鈔六經司馬

遷班固范曄史皆一鈔魏晉及南北朝史再又類所鈔它書凡三十篇號柳氏自備旁錄仙佛書甚眾皆楷小精真無行字子璞珪璧玼

璞字韜玉學不營仕著春秋三氏異同義又述天祚長祿斷自漢武帝紀元為編年以大政大祥異侵叛戰伐隨著之閭位者附見其左常謂杜征南春秋後序述紀甲祿為得實自餘史家皆差蔣係以為然終著作郎

珪字交玄大中中與璧繼擢進士皆秀整而文杜牧李商隱稱之杜悰鎮西川表在幕府久乃至會悰徙淮南歸其積俸珪不納悰舉故事為言卒辭之以藍田尉直弘文館遷右拾遺而給事中蕭儆鄭裔綽謂珪不能事父封還其詔仲郢訴其子冒處諫職為不可謂不孝則誣請勒就養詔可始公綽治家均韓滉及珪被廢士人愧悵終衛尉少卿

璧字賓玉馬植鎮汴州辟管書記又從李瓚桂州規止其不法瓚不聽乃拂衣去未幾軍亂擢右補闕再轉屯田員外郎僖宗幸蜀授翰林學士累遷右諫議大夫

玼以明經補秘書正字由書判拔萃累轉左補闕高湜再鎮昭義皆表為副擢刑部員外郎湜貶高要尉玼三疏申理湜後得瘞嗟歎以為其言雖自辨不加也出為嶺南節度副使麻中橋熟既食乃納直於官

黃巢陷交廣逃還除起居郎巢入京師奔行在再遷中書舍人御史中丞文德元年以吏部侍郎脩國史拜御史大夫直清有父風昭宗欲倚以相中官譖玼煩碎非廊廟器乃止坐事貶瀘州刺史卒光化初帝自華還詔復官爵玼嘗述家訓以戒子孫曰夫門地高者一事墜先訓則異它人雖生可以苟爵位死不可見祖先地下門高則自驕族盛則人窺嫉實懿懿行人未必信纖瑕微累十手指矣所以修己不得不至為學不得不堅夫士君子生於世已無能而望它人用已無善而望它人愛猶農夫鹵莽種之而怨天澤不潤雖欲弗餒可乎余幼聞先公僕射言立己以孝弟為基恭默為本畏怯為務勤儉為法肥家以忍順保交以簡恭廣記如不及求名如儻來莅官則絜己省事而後可以言家法家法備然後可以言養人直不近禍廉不沽名憂與禍不偕絜與富不並董生有云弔者在門賀者在閭言憂則恐懼恐懼則福至又曰賀者在門弔者在閭言受福則驕奢驕奢則禍至故世族遠長與命位豐約不假問龜著星數在處心行事而已昭國里崔山南瑄子孫之盛仕族罕比山南曾祖母長孫夫人年高無齒祖母唐夫人事姑孝每旦櫛縱笄拜階下升堂乳姑長孫不粒食者數年一日病言無以報吾婦冀子孫皆得如婦孝然則崔之門安得不大乎東都仁和里裴尚書寬子孫眾盛實為名閥天后時宰相魏玄同選尚書之先為婿未成婚而魏陷羅織獄家徙嶺表及北還女已踰笄其家議無以為衣食資願下髮為尼有一尼自外

至曰女福厚豐必有令匹子孫將遍天下宜北歸家人遂不敢議及荆門則裴齋裝以迎矣今勢利之徒捨信誓如返掌則裴之蕃衍乃天之報施也余舊府高公先君兄弟三人俱居清列非速客不二羹藜夕食齏菹而已皆保重名於世永寧王相國涯居位賈氏女歸請曰玉工貨釵直七十萬錢王曰七十萬錢豈於女惜但釵直若此乃妖物也禍必隨之女不敢復言後釵爲馮球外郎妻首飾涯曰爲郎更妻首飾有七十萬錢其可久乎馮爲賈相國餽門人賈有奴頗橫馮愛賈召奴責之奴泣謝未幾馮晨謁賈賈未出有二青衣齋銀嬰出曰公恐君寒奉地黃酒三杯馮悅盡舉之俄病渴且咽因暴卒賈爲歎息出涕卒不知其由明年王賈皆遭禍噫王以珍玩爲物之妖信知言矣而不知恩權隆赫之妖甚於物邪馮以卑位貧貨不能正其家忠於所事不能保其身不足言矣賈之奴害客于牆廡間而不知欲始終富貴其得乎舒相國元與李繁有隙爲御史鞫譙獄窮致繁罪後舒亦及禍今世人盛言宿業報應曾不思視履考祥事歟夫名門右族莫不由祖考忠孝勤儉以成立之莫不由子孫頑率奢傲以覆墜之成立之難如升天覆墜之易如煖毛余家本以學識禮法稱於士林比見諸家於吉凶禮制有疑者多取正焉喪亂以來門祚衰落基構之重屬於後生夫行道之人德行文學爲根株正直剛毅爲柯葉有根無葉或可俟時有葉無根膏雨所不能活也至於孝慈友悌忠信篤行乃食之醴醬可一日無哉其大槩如此

公權字誠懸公綽弟也年十二工辭賦元和初擢進士第李聽鎮夏州表爲掌書記因入奏穆宗曰朕嘗於佛廟見卿筆蹟思之久矣卽拜右拾遺侍書學士再遷司封員外郎帝問公權用筆法對曰心正則筆正筆正乃可法矣時帝荒縱故公權及之帝改容悟其以筆諫也公綽嘗寓書宰相李宗閔言家弟本志儒學先朝以侍書見用頗類工祝願徙散秩乃改右司郎中弘文館學士文宗復召侍書遷中書舍人充翰林書詔學士嘗夜召對子亭燭窮而語未盡宮人以蠟液濡紙繼之從幸未央宮帝駐輦曰朕有一喜邊戍賜衣久不時今中春而衣已給公權爲數十言稱賀帝曰當賀我以詩宮人迫之公權應聲成文婉切而麗詔令再賦復無停思天子甚悅曰子建七步爾乃三焉常與大學士對便殿帝稱漢文帝恭儉因舉袂曰此三澣矣學士皆賀獨公權無言帝問之對曰人主當進賢退不肖納諫諍明賞罰服澣濯之衣此小節耳非有益治道者異日與周墀同對論事不阿墀爲惴恐公權益不奪帝徐曰卿有諍臣風可屈居諫議大夫乃自舍人下遷仍爲學士知制誥開成三年轉工部侍郎召問得失因言郭旼領邠靈而議者頗有臧否帝曰旼尙父從子太皇太后季父官無玷郵自大金吾位方鎮何所更議答曰旼誠勳舊然人謂獻二女乃有是除信乎帝曰女自參承太后豈獻哉公權曰嫌疑間不可戶曉因引王珪諫廬江王妃事是日帝命宦官自南內送女還旼家其忠益多類此遷學士承旨武宗立罷爲右散騎常侍宰相崔

琪引爲集賢院學士知院事李德裕不悅左授太子詹事改賓客累封河東郡公復爲常侍進至太子少師大中十三年天子元會公權稍耄忘先輩臣稱賀占奏忽謬御史劾之奪一季俸議者恨其不歸事成通初乃以太子太保致仕卒年八十八贈太子太師公權博貫經術於詩書左氏春秋國語莊周書尤邃每解一義必數十百言通音律而不喜奏樂曰聞之令人驕怠其書法結體勁媚自曰一家文宗濟召與聯句帝曰人皆苦炎熱我愛夏日長公權屬曰薰風自南來殿閣生微涼它學士亦屬繼帝獨諷公權者以爲詞情皆足命題於殿壁字率徑五寸帝歎曰鍾王無以尙也其遷少師宣宗召至御座前書紙三番作真行草三體奇祕賜以器幣且詔自書謝章無限真行當時大臣家碑誌非其筆人以子孫爲不孝外夷入貢者皆別署貨貝曰此購柳書嘗書京兆西明寺金剛經有鍾王歐虞褚陸諸家法自爲得意凡公卿以書貺遺蓋鉅萬而主藏奴或盜用嘗貯孟孟一笥滕識如故而器皆亡奴妄言叵測者公權笑曰銀孟羽化矣不復詣唯研筆圖籍自鏤祕之

子華公綽諸父也始辟嚴武劍南府累遷池州刺史代宗將幸華清宮先命葺欲以子華爲京兆少尹尹惡其剛方沮解之遂爲昭應令檢校金部郎中修宮使設棘園於市徇邑中曰民有得華清宮瓦石材用投園中踰三日不還者死不終日已山積矣營辦略足宰相元載有別墅以奴主務自稱郎將怙勢縱

暴租賦未嘗入官子華因奴入謁收付獄劾發宿罪杖殺之一邑震伏載不敢怨遣吏厚謝預知其終自爲墓銘子公器公度善攝生年八十餘有強力常云吾初無術但未嘗以氣海煖冷物熟生物不以元氣佐喜怒耳位光祿少卿公器生遵遵生燦別有傳

楊於陵字遠夫本漢太尉震之裔父太清倦宦客河朔死安祿山之亂於陵始六歲間關至江左連具有奇志十八擢進士調句容主簿節度使韓滉剛嚴少許可獨奇於陵謂妻柳曰吾求佳婿無如於陵賢因以妻之辟鄂岳江西使府滉居宰相領財賦權震中外於陵隨府罷避親不肯調退廬建昌以文書自娛樂混卒乃入爲鄴部員外郎以吏部判南曹選者恃與宰相親文書不如式於陵駭其違宰相怒以南曹郎出使甲宣武軍未幾遷右司郎中換吏部出爲絳州刺史德宗雅聞其名留拜中書舍人時京兆李實恃恩暴橫於陵與所善許孟容不離附爲所譖短徙祕書少監帝崩宣遺詔於太原幽州節府獻遺無所納拜華州刺史遷浙東觀察使越人飢請出米三十萬石拊贖貧民政聲流聞入爲京兆尹先是編民多竄北軍籍中倚以橫閭里於陵請限丁制減三丁者不得著籍姦人無所影賴京師豪右大震遷戶部侍郎元和初牛僧孺等以賢良方正對策於陵被詔程其文居第一宰相惡其言出爲嶺南節度使辟韋詞李翱等在幕府咨訪得失教民陶瓦易蒲屋以絕火患監軍許遂振者悍戾貪肆憚於陵不敢撓以私則

爲飛語聞京師憲宗不能無惑有詔罷歸遂振領留事管吏剔抉其贓吏呼曰楊公尙拒他方賂遺肯私官錢邪宰相裴垪亦爲帝別白言之乃授吏部侍郎而遂振終得罪初吏部程判別詔官參考齊抗當國罷之至是尙書鄭餘慶移疾乃循舊制於陵建言佗官但第判能否不知限員有司計員爲留遺之格事不相謀莫如勿置於是詔三考官止較科目選至常調悉還吏部又請修甲麻南曹置別簿相檢實吏不能爲姦始奏選者納直給符告居四年凡調三千員時謂爲適以兵部兼御史大夫判度支王師討淮西於陵用所親爲供軍使主唐鄧而高霞寓騰牒度支以餉道乏及戰敗詔責之指以爲言帝怒貶於陵郴州刺史徙原王傅復以戶部侍郎知吏部選李師道平詔宣慰淄青朝廷始議分其地而劉悟節度滑州未出鄆於陵趣使上道還奏帝悅其能會浙西觀察使李翊死皇甫鏘素忌於陵薦以代翊帝不之可穆宗立遷戶部尙書爲東都留守數上疏乞身不許授太子少傅封弘農郡公俄以尙書左僕射致仕詔賜實俸讓不受於陵器量方峻進止有常度節操堅明始終不失其正時人尊仰之太和四年卒年七十八册贈司空諡曰貞孝四子景復仕至同州刺史紹復中書舍人師復大理卿中子嗣復位宰相自有傳馬總字會元系出扶風少孤雙不妄交游貞元中辟署滑州姚南仲幕府監軍薛盈珍誣南仲不法總坐貶泉州別駕盈珍入用事福建觀察使柳冕希旨欲誅之會刺史穆贊保護乃免徙恩王傅元和中以慶

州刺史遷安南都護廉清不撓用儒術教其俗政事嘉美獠夷安之建二銅柱於漢故處劉著唐德以明伏波之裔徙桂管經略觀察使入爲刑部侍郎十二年兼御史大夫副裴度宣慰淮西吳元濟僞爲彰義節度留後蔡人習僞惡相掉許獷戾有夷貊風總爲設教令明賞罰磨治洗汰其俗一變始奏改革義爲淮西尋擢拜淮西節度使徙忠武改華州防禦鎮國軍使李師道平析鄆曹濮等爲一道除總節度賜號天平軍長慶初劉總上幽鎮地詔總徙天平而召總還將大用之會總卒穆宗以鄆人附賴總復詔還鎮二年檢校尙書左僕射入爲戶部尙書總篤學雖吏事倥傯書不去前論著頗多卒贈右僕射諡曰懿贊曰巢父恃正義觸羣不肖謀不以權遂喪其身靈邪皆所謂邦之司直者後世卒蕃衍公綽仁而勇於陵方重總沈懿皆有大臣風才堪宰相而用不至果時有不幸邪穆崔柳代爲孝友聞家君子之澤遠哉

唐書卷一百六十三

唐書卷一百六十三考證

柳公綽傳父儼○宰相世系表作儼

柳公綽傳其廐馬害圍人公綽殺之○臣酉按韓愈與公綽書此事在元和用兵時今敘在長慶三年為
山南東道節度時與舊書同誤

唐書卷一百六十四

宋 端 明 殿 學 士 宋 邢 撰

列傳第八十九

歸奚三崔盧二薛衛胡丁二王殷

歸崇敬字正禮蘇州吳人治禮家學多識容典擢明經遭父喪孝聞鄉里調國子直講天寶中舉博通墳
典科對策第一遷四門博士有詔舉才可宰百里者復策高等授左拾遺肅宗次靈武再遷起居郎贊善
大夫史館修撰兼集賢殿校理修國史儀注以貧求解歷同州長史潤州別駕未幾有事橋陵建陵召還
參掌儀典改主客員外郎復兼修撰代宗幸陝召問得失崇敬極陳生人疲敝當以儉化天下則國富而
兵可用時百官朝朔望皆服袴褶崇敬非之建言三代逮漢無其制隋以來始有服者事不稽古宜停詔
可又言東都太廟不當置木主按禮虞主用桑練主用栗作栗主則瘞桑主猶天無二日土無二王也東
都太廟本武后所建以祀諸武中宗去主存廟以備行幸遷都之置且商遷都前八後五不必每都別立
神主也若曰神主已經奉祀不得一日而廢則桑主以虞至練祭而埋之明是不然時有方士巨彭祖建
言唐家土德請以四季月郊祀天地詔禮官儒者雜議崇敬議禮以先立秋十八日迎黃靈祀黃帝黃帝

於五行爲土而火爲母故火用事之末而祭之三月月則否彭祖率緯候說事詭不經不可用又議五人帝於國家爲前後無君臣義天子祭宜毋稱臣祭而稱臣於天帝無異又春秋釋奠孔子祝版皇帝署北面揖以爲太重宜准武王受丹書於師尙父行東面之禮事皆施行大厯初授倉部郎中充弔祭册立新羅使海道風濤舟幾壞衆驚謀以單舸載而免答曰今共舟數十百人我何忍獨濟哉少選風息先是使外國多齋金帛買舉所無崇敬囊橐惟衾衣東夷傳其清德還授國子司業兼集賢學士八年遣祀衡山未至而哥舒晁亂廣州監察御史憚之請望祀而還崇敬正色曰君命豈有畏邪遂往皇太子欲臨國學行齒冑禮崇敬以學與官名皆不正乃建議古天子學曰辟雍以制言之壅水環綠如璧然以誼言之以禮樂明和天下云爾在禮爲澤宮故前世或曰璧池或曰璧沼亦言學省漢光武立明堂辟雍靈臺號三雍宮晉武帝臨辟雍行鄉飲酒禮別立國子學以殊士庶永嘉南遷唯有國子學隋大業中更名國子監今聲明之盛辟雍獨闕請以國子監爲辟雍省祭酒司業之名非學官所宜業者拘箴大版今學不教樂於義無當請以祭酒爲太師氏位三品司業爲左師右師位四品近世明經不課其義先取帖經顯門廢業傳受義絕請以禮記左氏春秋爲大經周官儀禮毛詩爲中經尙書周易爲小經各置博士一員公羊穀梁春秋共準一中經通置博士一員博士兼通孝經論語依章疏講解德行純絜文詞雅正形容莊重

可爲師表者委四品以上各舉所知在外給傳七十者安車蒲輪敦遣國子太學四門三館各立五經博士品秩生徒有差舊博士助教直講經直律館算館助教請皆罷教授法學生講師費用服脩一束酒一壺衫布一裁色如師所服師出中門延入與坐割脩酌酒三爵止乃發篋出經摳衣前請師爲說經大略然後就室朝晡請益師二時堂上訓授道義示以文行忠信孝悌睦友旬省月試時考歲貢生徒及第多少爲博士考課上下有不率教者擯楚之國子移禮部爲太學生太學又不變徙之四門四門不變徙本州之學復不變繇役如初終身不齒雖率教九年學不成者亦歸之本州禮部考試法請罷帖經於所習經問大義二十而得十八論語孝經十得八爲通策三道以本經對通二爲及第其孝行聞鄉里者舉解具言試日義闕一二許兼收焉天下鄉貢如之習業考試並以明經爲名得第授官與進士同有詔尙書省集百官議皆以習俗久制度難分明省禁非外司所宜名周官世職者稱氏國學非世官不得名辟雍省太師氏大抵憚改作故無施行者坐史給稟錢不實貶饒州司馬德宗立召還復拜國子司業稍遷翰林學士左散騎常侍充皇太子侍讀又兼晉王元帥參謀封餘姚郡公田悅李納稟命持節宣慰稱旨表歸上冢寵賜繪帛儒生以爲榮遷工部尙書仍前職年老以兵部尙書致仕卒年八十八贈尙書左僕射諡曰宣論撰數十篇子登

登字冲之事繼母篤孝大厯中舉孝廉高第貞元初策賢良爲右拾遺裴延齡得幸德宗欲遂以相右補闕熊執易疏論之以示登登動容曰願竄吾名雷霆之下君難獨處故同列有所諫正輒聯署無所回諱轉右補闕起居舍人凡十五年僚類有出其下而進趨自喜得顯官惟登與右拾遺蔣武退然遠權勢終不以淹晚槩懷遷兵部員外郎順宗爲皇太子登父子侍讀及卽位以東宮恩超拜給事中遷工部侍郎復爲皇太子諸王侍讀獻龍樓箴以諷從左散騎常侍入謝憲宗問政所先登知帝睿而果于斷勸順納諫爭內外傳爲讜言後判國子祭酒事進工部尚書累封長洲縣男卒年六十七贈太子少師諡曰憲登性溫恕家僮爲馬所躓笞折馬足登知不加責有遺金石不死藥者給曰已嘗及登服幾死飢之乃未之嘗人皆爲怒而登不爲愠常慕陸象先爲人世亦許其類云子融

融字章之元和中及進士第累遷左拾遺事文宗爲翰林學士進至戶部侍郎開成初拜御史中丞湖南觀察使盧周仁以南方屢火取羨錢億萬進京師融劾奏天下一家中外之財皆陛下府庫周仁陳小利假異端公違詔書徇私希恩恐海內效之因緣漁刻生人受敝罪始周仁請重責遷所進代貧民租入詔不從置錢河陰院以虞水旱初戶部員外郎盧元中左司員外郎判戶部案姚康受平糶官秦季元絹六千匹貸乾沒錢八千萬俱貶嶺南尉數年金部員外郎韓益判度支子弟受賕三百萬未入者半帝問融

益所犯與盧元中姚康孰甚對曰元中等枉失庫錢益所坐子弟受賄事異法輕故益止貶梧州參軍融遷京兆尹李固言爲相惡之徙祕書監固言罷擢權知兵部侍郎歲間出爲山南西道節度使徙東川還歷兵部尚書累封晉陵郡公會昌後儒臣少朝廷禮典多本融議辭疾以太子少傅分司東都大中七年卒贈尚書左僕射

奚陟字殷卿其先自譙遷西徙故爲京兆人少篤志通羣書大厯末擢進士文辭清麗科授弘文館校書郎德宗立諫議大夫崔河圖持節使吐蕃表陟自副以親老辭不拜楊炎輔政召授左拾遺居親喪毀瘠過禮朱泚反走間道及車駕于興元拜起居郎翰林學士不就職賊平改太子司議郎歷金部吏部員外會左右丞缺轉左司郎中貞元八年遷中書舍人於是江南淮西皆大水詔陟勞問循慰所至人人便安中書吏倚宰相勢常姑息獨陟遇之無假借先是右省雜給賦職田粟主事與拾遺等陟以奉稍爲率由是吏官有差中書令李晟有紙筆猥料積于省它日以遺舍人而雜事舍人常私有之陟均舍寮無厚薄雖細務皆身親其勞久益強力人以爲難遷刑部侍郎京兆尹李充有美政裴延齡惡之誣劾充比陸贄數遺金帛當抵罪又乾沒京兆錢六十八萬緡請付比部鈎校時郎中崔元翰怨贄揣延齡指逮繫撈掠甚急內以險文陟持平無所上下具獄上且言京兆錢給縣館傳餘以度支符用度略盡充旣免元翰不

得意以志死陟尋知吏部選事遷侍郎銓綜平允時謂與李朝隱略等不能適發清明如裴行儉盧從愿也十五年病癱帝遣醫療視敕曰陟賢臣爲我善治之卒年五十五贈禮部尚書陟少自底厲誓名節常薦權德輿爲起居舍人知制誥楊於陵爲郎中其後皆有名子敬玄位左補闕

崔衍字著深州安平人父倫字敘居父喪跣護柩行千里道路爲流涕廬冢彌年服除及進士第歷吏部員外郎安祿山反陷于賊不汙僞官使子弟間表賊事賊平下遷晉州長史李齊物訟其忠授長安令封武邑縣男寶應二年以右庶子使吐蕃虜背約留二歲執倫至涇州逼爲書約城中降倫不從更囚遷娑城闕六歲終不屈乃許還代宗見之爲感動嗚咽卽具陳虜情僞山川險易指畫帝前人服其詳遷尚書左丞以疾改太子賓客卒年七十一贈工部尚書諡曰敬衍天寶末擢明經調富平尉繼母李不慈倫自吐蕃歸李徹衣以見問故曰衍不吾給倫怒召衍將袒而鞭之衍涕泣無所陳倫弟殷趨白衍所稟舉送夫人所尙何云倫悟繇是譖無入調清源令勸民力田懷附流亡觀察使馬燧表其能徙美原父卒事李益謹歲爲李子卽償負不勝計故官刺史妻子僅免飢寒歷蘇號二州號居陝華間而賦數倍入衍白太重裴延齡領度支方聚斂私謂衍前刺史無發明公當止衍不聽復奏州部多巖田又郵傳劇道屬歲無秋民舉流亡不蠲減租額人無生理臣見長吏之患在因循不以聞不患陛下不憂恤也患申請不實不

患朝廷不矜貸也陛下拔臣大州竄欲視民困而顧望不言哉德宗公其言爲詔度支減賦遷宣歙池觀察使簡靜爲百姓所懷幕府奏聘皆有名士後多顯于時卒年六十九贈工部尚書衍儉約畏法室無妾媵祿稍周於親族葬埋嫁娶倚以濟者數十家及卒不能藏喪表諸朝賜賻帛三百段米粟稱之先是天下以進奉結主恩州藏耗竭草阜劉贊裴肅爲之倡贊死衍代之舊貢金錫凡十八品皆倍直市于州民匱多逃去衍至蠲革之居十年蓄用度府庫充衍及穆贊代州以錢四十萬緡假民賦故雖旱人不流捐由衍蓄積有素也路應爲觀察使以衍有惠在民言狀元和元年詔書褒美賜一子官云諡曰懿

盧景亮字長晦幽州范陽人少孤學無不覽第進士宏辭授祕書郎張延賞節度荆南表爲枝江尉掌書記入遷右補闕朱泚反景亮勸德宗曰陛下罪已不至則感人不深帝然之景亮志義峯然多激發與穆質同在諫爭地書數上鯁殺無所回宰相李泌劾景亮等嘗衆會漏所上語言引善在己卽有惡歸之君帝怒貶爲朗州司馬質亦斥去廢抑二十年至憲宗時由和州別駕召還再遷中書舍人景亮善屬文根於忠仁有經國志嘗謂人君足食足兵而又得士天下可爲也乃興軒項以來至唐剗治道之要著書上下篇號三足記又作答問言輓運大較及陳西戎利害切指當世公卿伏其達古今云元和初卒贈禮部侍郎憲宗時以直諫知名者又有王源中

源中字正蒙擢進士宏辭累遷左補闕是時中官領禁兵數亂法捕臺府吏屬繫軍中源中上言臺憲者紀綱地府縣責成之所設吏有罪宜歸有司無令北軍亂南衙磨下重於仗內帝納之累轉戶部郎中侍郎擢翰林學士進承旨學士源中嗜酒帝召之醉不能見及寤憂其慢不悔不得進也他日又如之遂失帝意以疾自言出爲山南西道節度使入拜刑部侍郎未幾領天平節度使開成三年卒贈尚書右僕射源中澹名利率身治人約而簡當時咨美

薛莘河中寶鼎人七世祖道實爲隋禮部尚書父順爲奉天尉與楊國忠有舊及用事將引之輒謝絕莘以吏最拜長安令歷虢州刺史憲宗時奏最擢湖南觀察使徙浙東以治行遷浙西加御史大夫累封河東郡公所居守法度務在安人治身穀薄所衣綠袍更十年至緋衣乃易居三鎮聲樂不聞于家所得祿卽分散親屬故人而無餘藏除左散騎常侍年七十致仕是時有年過莘不肯去故論者高莘居四年卒贈工部尚書諡曰宣莘於文章中長於詩兄芳有器幹萊與莘其母代宗從母也以外戚奉朝請皆贊善大夫

莘子膺太和初爲右補闕內供奉其弟齊佐興元李絳幕府絳遇害齊死于難膺聞不及請馳赴之哀甚聞者垂泣後歷工部員外郎

衛次公字從周河中河東人舉進士禮部侍郎潘炎異之曰國器也高其第調渭南尉嚴震在興元辟佐其府累遷殿中侍御史貞元中擢左補闕翰林學士德宗崩與鄭綱皆召至金鑾殿時皇太子久疾禁中或傳更議所立衆失色次公曰太子雖久疾豕嫡也內外係心久矣必不得已宜立廣陵王綱隨贊之議乃定順宗立王叔文等用事輕弄威柄次公與綱多所持正知禮部貢舉斥華取實不爲權力侵橫由中書舍人充史館修撰改兵部侍郎綱以宰相罷坐與善下除太子賓客久乃爲陝虢州觀察使蠲橫租錢歲三百萬復入爲兵部侍郎故英公李勣大理卿徐有功之孫皆以貢不得調次公召見曰子之祖勳在王府靈限常格乎卽優補而遣進尚書左丞時方討蔡數建請罷兵帝將相之制稟具而蔡捷書至乃追止以檢校工部尚書爲淮南節度使久之召還道病卒年六十六贈太子少傅諡曰敬次公本醫家方未顯時京兆尹李齊運使子與游請授之法次公拒絕因終身不復鼓其節尚終始完潔子洙舉進士尚臨眞公主檢校祕書少監駙馬都尉文宗曰洙起家以文進宜諫官寵之乃爲左拾遺歷義成節度使咸通中卒

薛戎字元夫河中寶鼎人客毗陵陽羨山年四十餘不仕江西觀察使李衡辟署幕府三返乃肯應故宰相齊映代衡奏留之府罷復歸陽羨福建觀察使柳冕辟佐其府先是馬總佐鄭滑府監軍宦人誣劾之

貶泉州別駕冕欲除總以附倖家即使戎攝刺史按置其罪戎曰以是待我邪我始不願仕正謂此爾不肯從還白其狀冕怒據索引戎入戎叱引者曰見賓客乃爾乎由東廂進冕度未可屈揖而去囚之宅館環兵脅辱之累月戎終不爲屈淮南節度使杜佑聞之書責冕會冕亦病死得解自放江湖間復爲藩府交奏稍遷河南令吐突承璀討鎮州所過吏迎廷畏不及治道前驅惟戎境內按故無所治延留府卒犯令者縛置獄留守怒遣將略出之不與累遷浙東觀察使所部州觸酒禁者罪當死橋未貢先鬻者死戎弛其禁卒治下年七十五贈左散騎常侍戎爲吏不尙約束詭名譽其有善歸之所部故居官時無灼灼可驚者已罷則懷之悉奉粟賑濟內外親無疏遠皆歸之既病以所有分遺之曰吾死矣可持爲歸資衆皆哭而去

弟放端厚寡言第進士擢累兵部郎中穆宗爲太子拜侍讀及卽位參贊機命帝謂曰小子新立懼不克荷先生宜相以輔不逮放叩頭曰臣庸淺不足塵大任自有賢能處之帝美其誠進工部侍郎集賢學士寵待尤至改刑部侍郎帝嘗問朕欲學經典史何先放曰六經者聖人之言孔子所發明天人之極也史記道成敗得失亦足以鑒然謬於是非非六經比帝曰吾聞學者白首不能通一經安得其要乎對曰論語六經之菁華也孝經人倫之本也漢時論語首立於學官光武令虎賁士皆習孝經玄宗親爲注訓蓋

人知孝慈則氣感和樂也帝曰聖人以孝爲至德要道信然終江西觀察使諡曰簡

胡証字啟中河中河東人舉進士第渾瑊美其才又以鄉府奏實幕下繇殿中侍御史爲韶州刺史以母老辭爲太子舍人更從襄陽于頔署掌書記入爲戶部郎中田弘正以魏博內屬請使自副詔兼御史中丞爲弘正副使入遷諫議大夫元和九年党項屢擾邊而單于都護府累更武將職事廢証以儒而勇選拜振武軍節度使道河中時趙宗儒爲帥以州民入謁里人榮之居四年召任金吾大將軍又充京西京北巡邊使太和公主降回鶻以檢校工部尙書爲和親使舊制行人有私覲禮縣官不能具召富人子納貲於使而命之官証請儉受省費以絕鬻官之濫次漠南虜人欲屈脅之且言使者必易胡服又欲主便道疾驅者証固不從以唐官儀自將訖不辱命還拜工部侍郎改京兆尹左散騎常侍寶厓初以戶部尙書判度支固辭拜嶺南節度使卒年七十一贈尙書右僕射廣有舶貝奇寶証厚殖財自奉養奴數百人營第脩行里彌亘閭陌車服用珍侈遂號京師高營素與賈餗善李訓敗衛軍利其財聲言餗匿其家爭入剽劫執其子激內左軍至斬以徇証旅力絕人晉公裴度未顯時羸服私飲爲武士所窘証聞突入坐客上引觥三醕客皆失色因取鐵燈檠摘枝葉櫟合其跗橫膝上謂客曰我欲爲酒令飲不醕者以此擊之衆唯唯証一飲輒數升次授客客流離盤杓不能盡証欲擊之諸惡少叩頭請去証悉驅出故時人

稱其俠

丁公著字平子蘇州吳人三歲喪母甫七歲見隣媪抱子哀感不肯食請於父緒願絕粒學老子道父聽之稍長父勉敕就學舉明經高第授集賢校書郎不滿秩輒去侍養于家父喪負土作冢貌力癯懷見者憂其死孝觀察使薛萃表上至行詔刺史弔問賜粟帛旌闕其閭淮南節度使李吉甫表授太子文學兼集賢校理會入輔政擢爲右補闕遷直學士充皇太子諸王侍讀因著太子諸王訓十篇穆宗立未聽政召居禁中條詢治理且許以相公著陳讓牢切乃擢給事中遷工部侍郎知吏部選事公著內知帝欲進用故辭疾求外遷授浙西觀察使徙爲河南尹治以清靜聞四遷禮部尚書翰林侍講學士長慶中浙東災癘拜觀察使詔賜米七萬斛使賑饑捐久之入爲太常卿大和中以病丐身還鄉里卒年六十四贈尚書右僕射公著清約守道每進一官輒憂見顏問四十喪妻終身不畜妾及卒天下惜之

崔弘禮字從周系出博陵北齊左僕射懷遠六世孫磊磊有大志通兵略過宣武從劉玄佐繼夷門玄佐酒酣顧曰崔生獨不知此樂邪弘禮笑曰我固喜武請爲公歡玄佐臂鷹與弘禮馳逐急緩在手一軍驚曰安得此奇客玄佐大悅欲留之固辭厚爲資餉至京師所善李觀病且死弘禮殯褚爲治喪葬畢乃去及進士第平判異等靈武李樂表爲判官以親老不應更署東都留守呂元膺參謀時天子討蔡李師道

謀襲洛脅沮朝廷以釋蔡危弘禮爲箱揣賊情部分設張東都卒無患遷留守判官擢忻汾二州刺史田弘正請朝表弘禮徙衛州兼魏博節度副使伐李師道弘正多所咨逮還魏博又表爲相州刺史長慶初張弘靜鎮幽州詔弘禮往副未及行軍亂改絳州刺史李宥反于汴詔徙河南尹倚以捍賊遷河陽節度使治河內秦渠溉田千頃歲收八萬斛徙華州刺史改天平節度使李同捷叛與李聽合師討之至濮州大將李萬瑀劉宗擁兵自固弘禮表萬瑀守沂州宗守黃州奪其兵擊賊禹城破之獲鎧裝數十萬時徐泗節度使王智興檄兗鄆曹淄青當徐道者出車五千乘轉粟饋軍弘禮度道遠乃自兗開盲山故渠自黃隊抵青巨師人大濟李祐以鄆滑兵三千入齊而潰弘禮悉斬之爲出鄆兵二千祐遂大破賊尸藉十餘里祐望鄆拜曰活我者崔公也加檢校尚書左僕射徙東都留守召還以病自乞改刑部尚書復爲留守卒年六十五贈司空弘禮短於治民少愛利晚頗務多積素議疵之

崔玄亮字晦叔磁州昭義人貞元初擢進士第累署諸鎮幕府父喪客高郵臥苫終制地下溼因得瘧病不樂進取元和初召爲監察御史累轉駕部員外郎清慎介特澹如也稍遷密欵二州刺史欵人馬牛生駒犢官籍踏噉故吏得爲姦玄亮焚其籍一不問民山處輸租者苦之下令許斛輸錢民賴其利歷湖曹二州辭曹不拜太和四年繇太常少卿改諫議大夫朝廷推爲宿望拜右散騎常侍每遷官輒讓形於

色鄭注構宋申錫捕逮倉卒內外震駭玄亮率諫官叩延英苦諍反復數百言文宗未諭玄亮置笏在陛曰孟軻有言衆人皆曰殺之未可也卿大夫皆曰殺之未可也天下皆曰殺之然後察之乃實於法今殺一凡庶當稽典律況欲誅宰相乎臣爲陛下惜天下法不爲申錫言也俯伏流涕帝感悟衆亦服其不橈繇此名重朝廷頃之移疾歸東都召爲虢州刺史卒年六十六贈禮部尙書玄亮晚好黃老清靜術故所居官未久輒去遺言山東士人利便近皆葬兩都吾族未嘗遷當歸葬滎陽正首丘之義諸子如命王質字華卿五世祖通爲隋大儒質少孤客壽春力耕以養母講學不勸諸生從授業者甚衆年逾四十偃蹇無進取意姻友苦勸以仕乃舉進士中甲科繇祕書省正字累佐帥府五遷侍御史繇山南西道節度副使再轉諫議大夫宋申錫之得罪質與諫官伏閣文宗開延英召見泣涕陳諫帝稍寤申錫得不死爲宣豐所惡出虢州刺史李德裕素器之擢給事中河南尹徙宣歙觀察使卒年六十八贈左散騎常侍諡曰定質清白畏慎爲政必先究風俗所至有惠愛雖與德裕厚善而中立自將不爲黨奏署幕府者若河東裴夷直天水趙哲隴西李行方梁國劉贊皆一時選云

殷侗陳州人幼有志於學不治貲產長通經術以講道爲娛貞元末及五經第其學長於禮擢太常博士元和八年回鶻請和親朝廷以仰費廣劇欲紓以期詔侗宗正少卿李孝誠使回鶻可汗驕甚盛陳甲兵

欲臣使者侗不爲屈已傳命虜責其倨宣言欲留不遣衆色怖侗徐曰可汗唐婿欲坐屈使者拜乃可汗無禮非使臣倨也虜憚其言不敢逼還虜部員外郎王承宗叛遣侗招諭承宗聽命進諫議大夫侗論朝廷治亂得失前後凡八十四通以語切出爲桂管觀察使寶曆元年徙江西所至以潔廉稱入爲衛尉卿文宗卽位李同捷叛而王廷湊陰爲脅齒兵久不解詔五品以上官議尙書省帝銳欲討賊羣臣無敢異論者獨侗請舍廷湊而專事同捷且言願以宗社安危爲計善師攻心爲武舍垢安人爲遠圖網漏吞舟爲至誠帝不納然內嘉尙同捷平以侗嘗爲滄州行軍司馬遂拜義昌軍節度使於時瘴荒之餘骸骨蔽野墟里生荆棘侗單身之官安足纒淡與下共勞苦以仁惠爲治歲中流戶襁屬而還遂爲營田丐耕牛三萬詔度支賜帛四萬匹佐其市初州兵三萬仰稟度支侗始至一歲自以賦入贖其半二歲則周用乃奏罷度支所賜戶口滋饒庾儲盈腐上下便安請立石紀政以勞加檢校吏部尙書六年徙天平節度自李師道亂朝廷雖析三鎮然務安反側賦入盡爲軍費無輸王府者侗以餉軍有贏當上送官乃裁制經費歲以錢十五萬糴粟五萬石歸有司加檢校尙書右僕射御史大夫温造劾侗違制擅賦斂民爲無名之獻詔以庾承宣代還會濮州掾崔元武受吏賊又率屬邑奉錢增私馬估售官壘三罪計絹百二十匹大理以入私馬一重削三官刑部覆訊當流未決侗奏三犯不同坐所重律頻贓者累論元武犯皆枉

法當死詔用覆訊流元武賀州帝嘉佑守法進刑部尚書以造所奏不直復用爲天平節度開成元年再召爲刑部尚書時李訓鄭注已誅帝問佑治安術佑言朝廷宜任耆德毋輕用新進帝善之賜綵三百匹初鹽鐵度支使屬官悉得以罪人繫在所獄或私置牢院而州縣不聞知歲千百數不時決佑奏許州縣糾列所繫申本道觀察使并具獄上聞許之賜黃金十斤以酬直言涇原節度使朱叔夜坐侵牟士卒贖數萬家畜兵器罷爲左武衛大將軍佑薄其罪天子由是疏之賜叔夜死出佑爲山南東道節度使坐減兵不先論敗左遷太子賓客分司東都俄領忠武軍節度卒年七十二贈司空佑以經術進臨事銳敏有彊直名晚節內冀台輔稍務交結而素望少衰云孫盈孫

盈孫廣明初爲成都諸曹參軍僖宗至蜀聞有禮學擢太常博士光啟三年帝將還京而七廟焚殘告享無所盈孫白宰相始乘輿西有司盡載神主以行至郭悉爲盜奪今天子還宮宜前具其禮宰相建言脩復宗廟功費廣請與禮官議時仇博士不在獨盈孫從議曰故廟十一室二十三楹楹十一梁垣墉廣袤稱之今朝廷多難宜少變禮按至德時作神主長安殿饗告如宗廟廟成乃祔今正衙外無它殿伏聞詔旨以少府監寓太廟請因增完爲十一室其三太后廟權舍西南夾廡須廟成議遷詔可自是神主樂縣皆所制定舊學禮家當其議龍紀元年昭宗郊祠兩中尉及樞密皆以宰相服侍上盈孫奏言先世典令

無內官朝服侍祠必欲之嘗隨所攝資品雖無援據猶免僭逼詔可時喪亂後制度彫紊追補容典皆盈孫折衷焉終大理卿贈吏部尚書

王彥威其先出太原少孤家無貲自力於學舉明經甲科淹識古今典禮未得調求爲太常散吏卿知其經生補檢討官彥威采獲隋以來下訖唐凡禮沿革皆條次彙分號元和新禮上之有詔拜博士憲宗以正月崩有司議葬用十二月下宿彥威建言天子之葬七月春秋之義志崩不志葬必其時也舉天下葬一人故過期不葬則譏之高祖中宗葬皆六月太宗四月高宗九月睿代二宗皆五月德宗十月順宗七月惟玄宗二宗皆十二月有爲爲之非常典也且葬畢而虞虞而卒哭卒哭而祔皆卜日今葬卜歲暮則畢祔在明年正月是改元慶賜皆廢矣有詔更用五月淮南李夷簡上言大行皇帝功高宜稱祖穆宗下其議彥威奏古者始封爲太祖而降則又祖有功宗有德故夏人祖顓頊而宗禹商人祖契而宗湯周人祖文王而宗武王魏晉而下務欲推美自始祖外並建列祖之議叔世亂象不可以爲訓唐本周禮以景皇帝爲太祖祖神堯而宗太宗自高宗後咸稱宗以爲成法不然太宗致升平玄宗清內難肅宗收復兩都皆撥亂反正猶不稱祖今當本三代之制黜魏晉亂法大行廟號宜稱宗制可又舊事祔廟必告於太極殿然後奉主入廟既事則已而有司祔主畢又還告太極殿彥威以爲不可執政怒坐祝辭誤

奪二季俸削一階彥威終不回屈後累擢司封郎中弘文館學士諫議大夫李師道既平其十二州賦法未均詔彥威爲勘定兩稅使差量纖悉人不爲煩還兼史館修撰興平民上官興殺人亡命吏囚其父興聞自首請罪京兆尹杜棕御史中丞宇文鼎以自歸死免父之囚可勸風俗議減死彥威上言殺人者死百王共守原而不殺是教殺人有詔貸死彥威詣宰相據法爭論下遷河南少尹俄改司農卿李宗閔執政雅善之進拜平盧節度使開成初召爲戶部侍郎判度支彥威於儒學固該邃亦善吏事但經總財用出入米鹽非所長也而性剛訐自恃嘗見文宗顯奏曰百口家知有歲計而軍用一切可不謹邪臣按見財量入以爲出隨色占費終歲用之無毫釐差假令臣一旦迷愚欲自欺沒亦不可得因上占額圖又言至德迄元和天下觀察者十節度者二十有九防禦者四經略者三大都通邑皆有兵最凡八十餘萬長慶籍戶三百五十萬而兵乃九十九萬率三戶資一兵今舉天下之入歲三千五百萬上供者三之一又三之二則衣賜仰給焉自留州留使外餘四十萬衆皆仰度支又爲供軍圖上之彥威雖自謂樞樞姦賈著定其費於利害無益也始神策軍多以稟糶於度支取直吏私增賈厚給之經用益耗開成初有詔禁止時宦者仇士良魚弘志方用事彥威乃奏復與直悅媚士良等又劾王播貢羨贏以冀速進會邊兵訴所賜不時糶皆徹惡攝吏送臺獄而彥威視事自如及詔停務始惶恐就第貶衛尉卿俄檢校禮部尙書

爲忠武節度使毀山房三千餘所盜無所容徙節宣武封北海縣子性彊敏著書頗行于時卒贈尙書

右僕射諡曰靖

贊曰韓愈稱郡邑通得祀社稷孔子獨孔子用王者事以門人爲配天子以下北面拜跪薦祭禮如親弟子者句龍棄以功孔子則以德固自有次第崇敬乃請東揖以殺太重方是時公卿無韓愈之賢無有折其非是者道州刺史薛伯高嘗謂夫子稱顏回爲庶幾其從於陳蔡者亦各有號出於一時後世坐祀十人以爲哲豈夫子志哉觀七十子之賢未有加於十人坐而祀之始於開元非特牽於一時之稱號記曰祭有其舉之莫敢廢也如崇敬誠不知禮尊君以媚世歷朝循而不改矣伯高之語柳宗元志之於其書必有辨其妄者

唐書卷一百六十四

Blank columns for text on the right page.

唐書卷一百六十四考證

崔衍傳○舊書入孝友傳

